

Eveniments tuatschins

(1) La Gasetta Romontscha ch'ei cumparida per l'emprema gada igl onn 1857, ei ina fontauna preciosa per la historia dalla val.

Tissi da mustgas

Ins ha schon legiu vi e neu da sventiras daventadas cun affons tras tassis da mustgas. Quels dis vess era gleiti in affon da **Tujetsch** saviu vegnir per la veta sin quella moda. Ses geniturs vevan rasau ora en stiva pupi da mustgas che cuntegn era arsenic e per giavinar las mustgas pli fetg vevan els bess empau zucher sissu. Ferton ch'els eran occupai, va la buobetta vid il pupi, pren quel en bucca, il gust dultsch plai, ed ella maglia in ton. Per ventira ha ella cuninaga stuui render ed entras spert agid medicinal eis ella mitschada dalla mort ed ils geniturs culla tema. In niev exempl ch'ins sa mai esser precauts avunda el survigilar ils affons.

Nova Gasetta Romontscha, 1857, nr. 30, 24 da fenadur

Fautur dil pauperesser

Signur assistent Gion Ludwig Bèr *Beer* da **Tujetsch** ch'ei morts la jamna vargada, ha fatg si als paupers dalla vischnaunca in legat da 1000 frs. Milsanavon duei ei vegnir partiu ora ad els ina buot sal. Per rugalar si ina baselgia ch'era en decadenza ha el per plirs onns testamentau il tscheins d'ina acla. Ultra da quei ha el era seregurdau da dus paupers orfens da siu vischinadi per ton pli tgunsch gidar quels tier in mistregn. *Il cudisch da mortoris noda: 17-9-1857 D. Assistentes Joannes Ludovic Beer, fegl da statalter Jacob Martin Beer e Maria Margarita Rueras e la remarca: Fautor pauperum, 37 onns.*

Nova Gasetta Romontscha, 1857, nr. 39, 25 da settember

Baghegiar cun crappa e destruir Putnengia

La vischnaunca da **Tujetsch** survescha per muster d'in bien uorden d'uauls e baghegiar si spirontamein clavaus da crap. Igl ei aschia da capir, che glieud sedattan ora per biala crappa, denton fuss ei tuttina da giavischar, ch'ins schanegiass las venerablas reliquias dil bien temps vegl. Ei fa mal d'udir, che las cantunadas dalla biala ruina dil casti da **Putnengia**, ch'orneschla l'entira val, vegnan disfatgas per duvrar la crappa vid in clavau. Igl ei memia prosaic, gie empau barbaric d'applicar las cantunadas dil casti dil fundatur da nossa Ligia Grischa vid in nuegl! Videant consules ne queid detrimenti capiat res sacra!

GR 13.3.58 nr. 5

Disfar la ruina dil casti da Putnengia.

Nossa critica sul disfar la biala ruina da **Putnengia** ni **Pontaningen** ha provocau reclamaziuns. Buca ch'ins hagi astgau snegar la barbarica commessa, na nus vein cun nos agens egls saviu seperschuader da quella, cun profunda indignaziun observau, che la tuor porscha tuttavia buca pli il romantic aspect da vivon. Bein aber eis ei vegniu pretendiu, che quella ruina derivi dil temps dils Romans, seigi buca stada ina possessiun da Pieder de Putnengia, ed in secreigi buca da meritari il num da barbars per disfar las ruinas, nua che tirans habitavan vivon. Nus dein tier, ch'ils Romans hagien baghiau bein enqual casti per lur garnischuns e per segirezia dallas vias, sco il Spinòl e Maretiòl a **Cuera**, mo paucs han surviviu l'emigraziun dils pievels ed umens savieivels declaran da bunamein negliu saver observar il stil roman vid nossas ruinas. Nus dumbrein en nies cantun circa 170 castials ni ruinas ed ins po dir, che quels tuts seigien cun pintg' excepiun vegni fundai en differentas periodas dil temps miez, pli tard vegni construi autruisa e biars puspei alzai ord lur ruinas. Muort sia situaziun denter igl imperi **German** e l'**Italia** veva **Rezia** da gliez temps in gronda impurtonza militara e buca mo mercantila e schon per quella raschun eis ei vegniu menau si bia castials.

Ins sto buca tertgar, che tut quels castials seigien stai ignivs da tirans che mudergiavan il pievel. En biars habitavan nobels signurs ch'eran en temps da pasch ed uiara babs e menaders dil pievel. Bein enqual niebel baghegiava si da quels forts per porscher alla glieud in asil en temps d'uiara ni invasiuns. Aschia han era plirs uestgs da **Cuera** cumprau ni baghegiau castials per protecziun da lur subdits. Auters ein vegni baghegiai per schurmetg dallas vias e dil traffic, en in temps nua che perfin cavaliers sedevan giu cun engular e sblundergiar, aschia anfl'ins tals monuments en aultas cuntradadas, nua che negina noblezia fuss schiglioc sedomiciliada, sco en **Stussavia, Avers** etc.

Las famiglias noblas che vivevan en quellas tuors ein pella gronda part mortas giu ni emigradas. Aschia eis ei era iu culla respecatada famiglia de Putnengia. L'**Acla Putnengia** ch'ei damaneivel dil „casti“, sco ils Tuatschiners numnan la ruina e segiramein porta era quel il num **Putnengia**. Per motiv ch'el era il sulet casti ella val, sche vegnev'el per ordinari numnaus cuortamein mo „casti“, gest sco quei ch'ils habitonts da **Mustér** e **Sumvitg** numnan aunc ozildi lur capitalas mo „vitg“. Sch'ei exista en **Tujetsch** in casti de Putnengia e sch'il fundatur dalla Ligia Grischa senumnavva Pieder de Putnengia, avat da **Mustér** ed oriunds da **Tujetsch**, sche pon ins tuttina concluder cun buna raschun che quella tuor udevi a sia parentella. Nus pretendin mo quei, che Röder e Tscharner dian, dus umens che han legiu atras tuttas cronicas grischunas. Era Mohr numna en siu archiv quella tuor **Putnengia ni Pontaningen**.

Tuts viandonts che passan tras **Tujetsch** considereschan cun veseivel plascher la ruina da **Putnengia**, igl ei la pli gronda remarcabladad historica, che l'entira val posseda e tier quei pitoresc ornament da quella cuntarda. Legian ils viandonts en lur viadès da quella renomada tuor, duessen ei aber buc anflar pli ella ed udir tgei tresta sort che sia miraglia hagi giu, sche vegnan els segiramein a far curvien sur in tal barbarissem. Il ministeri da **Württemberg** ha dacuort relaschau in avis allas suprastonzas, als plevons e scolasts, ch'els dueien haver quitau che tuttas antiquitads vegnien bein reservadas e sin quei lessan era nus haver fatg attents las valladas romontschas. Denton schein nus suandar cheu in inserat tarmess tier a nus ord la capitala cantunala.

Ils da **Tujetsch** vulan ornar lur val cun bials clavaus da crap e destrueschan denton lur pli bi e renomau ornament – il casti da **Putnengia ni Pontaningen**. Tgei nova revolta eis ei rut ora encounter las tuors e castials ella **Rezia?** Il temps dils tirans ei vargaus! En nies temps eis ei pintga honur pli da ragischar ora las veglias ruinas, quels monuments sepulerals, che fan memoria dalla decadenza da tuttas forzas humanas; sunder plitost da mantener e schanegiar ellas schi ditg sco pusseivel. Era en lur decadenza ein ellas aunc adina remarcablas pils historiografs, viandonts e habitonts dil liug, nua ch'ellas existan. Igl ei pia ina enzenna da pauca stema ed honur encounter venerablas antiquitads, sche habitonts dalla tgina dil **Rein** entscheivan en moda vandalica a sespogliar sesez da lur veglias reliquias! Ins duess buca crer d'anflar schi freid patriotissem sco la glatscha dil **Badus**. Ei tutta simpatia per nies renomau avat Pieder de Putnengia svanida? Nus tertgassen, ch'ei fuss adual schi cunvegnent als Tuatschiners d'esser empau loschs sillla miraglia da quei um gigantic per l'entira **Surselva**, che sin in bi clavauet niev, fabricaus da mauns temeraris, che schanegian gnanc las trestas ruinas dil fundatur dalla libertad sursilvana! La glienda sper **Trun** ha tiegl engrirament digl onn 1424 viu gl'avat Pieder de Putnengia sco cau dil pievel. Fuss ei pia buca dueivel da tener en honur las davosas reliquias da quei um meriteivel per nossa patria, sch'ins posseda aunc zanua ina sbrenzla senn patriotic e senn d'engraziament; pertgei quel san ins mussar encounter las meffas ruinas da quei romantic casti **Putnengia**.

Entschatta matg neviu 55 uras

Strusch ha ei giu dau la davos'ura digl avrel, sche ha il matg spert bess anavos nus el pli sgarscheivel unviern. Quels che tegnan sin striegn sesmarveglan buca giud la sgarscheivla nevada. L'aura ei gie secavestrada la notg da Walburga, dils 30 d'avrel sigl 1. da matg, nua che las strias tegnan da vegl enneu in solemn barlot cul demuni ... sche ha ei entschiet a never e neviu 55 uras, bunamein treis dis e duas notgs! A **Mustér, Medel e Tujetsch** seregordan umens da siatonta onns e varga onns buca da quellas nevadas. Egl emprem liug er'ei 9 – 10 quartas neiv, ella **Val Medel e Tujetsch** 11 – 12 quartas. Ellas vischnauncas da **Sursassiala** ei tutta communicaziun stada interrutta per treis dis, als perveseders er'ei in grond sforz per arrivar en nuegl e tiella scartezia da fein, stuevan ei aunc semudergiar per survegnir aua. Per ventira ha igl Altissim pertgirau da grondas disgrazias. Ils habitonts da **Selva** ein fugi a dretg temps en **Novaselva**, la lavina da cauld ei veginida giu, mo senza far donn al vitget. La bun'aura luenta la neiv cun ualти bien ried ed aschia eis ei da sperar ch'ins possi scappentlar ils tiers.

GR 08-05-1858 nr. 19.

Trest'aura il davos uost

Dumengia vargada eran las muntognas vestgidas en alv, ed ella **Cadi** era la neiv tschentada tochen viers **Trun**. Tras quei ein ils èrs vegni terrai aschizun sco sch'ins vess zulau els. Tier tutta sventira han ins silmeins giu la ventira, ch'igl ei vegniu neginas scheltiras sissu, sco ins vess pudiu temer sillla serenezia da dumengia sera. Oz venderdis, ein ils cuolms puspei nevi giu e sillla dracca da quels dus dis eis ei strusch da sperar pli, ch'ils èrs levien puspei si. Igl ei da temer ch'els encaglien e ch'en bia loghens vegn ins a far pauc graun ni nuot diltut, tonpli ch'ei sedi: „Gl'uost mett'il paun en canaster“. Ils truffels vevan aunc biala pareta, mo ins auda tscheu e leu, principalemin a **Trun**, a selamentond sulla veglia malsogna. Ellas alps, nua ch'ei flesseggiava uonn tschelluisa pauca latgira, pon ins comprender ch'en tala ruha aura „mondi il latg els corns“. Schi grondas ruhas egl uost han ins da bia onns enneu mai giu; duess aunc la biestga buca trer bein, sche vein nus in onn da miseria avon esch, ed il stupent avrel ha menau nus egl avrel.

GR 28-08-1858 nr. 35

Dus camutschs cun in siet

Era dus catschadurs da **Tujetsch** han sittau igl emprem di da catscha quater camutschs e zuar era dus cun in siet. Ei vegn selamentau, ch'ils catschadurs dil **Tessin** ed er'enqual d'**Uri**, hagien fatg catscha da camutschs sin territori grischun e lu aunc d'in temps scumandau. Il meglier fuss ei, sch'ei vegness dalla Confederaziun anora scumandau diltut la catscha per entgins onns.

GR 11-9-1858 nr. 37

Il mèl da Tujetsch

... En **Surselva** vegn la tratga d'aviuls pli e pli impurtonta e rendabla; il renomau mèl da **Tujetsch** e **Medel** vegn da fetg biars viandonts prius egl jester sco per ina raritad. ...

GR 25-09-1858 nr. 39

(2) Quels onns era ei la normalitat da numnar, ton ils Medelins sco Tuatschins, ils selvadis. - Da l'autra vart vegn il mèl d'aviuls ludaus pir che mai sco era l'innovativitat dils Tuatschin cul meglie uorden forestal.

Collectau pil Ritli

Ellas scolas dil district Reinsu:

Rueras	contribuents	21	1.71 frs.
Selva		18	2.85 frs.
Cavorgia		13	0.95 frs.
Sedrun		45	1.90 frs.
GR 1859			

Spigias salin

Sco remarcabladad dalla presenta vegetaziun remarchein nus, ch'ei duei da S. Antoni, ils 13 da quest, esser vegniu anflau spigias salin a **Tujetsch**. (?) GR nr. 25, 1859

Ils selvadis cun buna raccolta

Nus havein schon relatau ch'ils selvadis secumentien zun fetg culla raccolta dils fregts. Denter quels ventireivels ei era la **Val Tujetsch**, che seregorda darar d'in aschi fritgeivel onn. Siu glin, renomaus ell'entira **Surselva**, para da dar ina splendida rendita. In particular ha giu semnau ina curtauna semmlin e fatg 27 curtaunas e mesa. El ha giu mess stubla e fregt suravia cultem da tiers manedels. Tiella reha fenada e risdivada han ils Tuatschiners aunc fatg – sco ei vegn segirau – da mellis buordis fein a pastg ellas muntognas, ed aschia pon ins spitgar, ch'ils stiarls vegnan quest unviern ad esser tschercai sils marcaus da **Glion**. – Tuccont tier la fiera da **Ligiaun** vulan ei pretender, ch'ei seigi ussa buca pli schi bunas tunas.

GR nr. 38, 1859

137 borlas sin ina spiglia

Nus vein en in da nos davos numers giu fatg menziun dil destinguu glin da **Tujetsch**. In um da fei ord quella vischnaunca ha ussa raquintau a nus ina secunda raritat sur da quei fregt. El hagi giu en siu iert ina teglia ni plonta da glin che vevi 137 borlas! Da quintar sco solit per ina borla 11 cauls, vess pia quella teglia purtau ina raccolta dils 1507 dubels.

GR, nr 40, 1859

Altezia dils divers vitgs ed uclauns

En pign temps vegn ei puspei a cumparer in niev blatt dalla gronda carta federala da general Dufour; quel cuntegn l'entira **Surselva** cun pliras parts cunfinontas. Sco nus vein schon remarcau inaga, ei quei la pli gronda, bial'ed exacta carta, ch'exista sulla **Svizra**, gie neginas outras tiaras han da mussar si ina semeglionta. Quei stupent blatt vegn a far plascher a scadin Sursilvan. Nus vein denton copiau giu las altezias dallas vischnauncas sursilvanas, per far veser il successiv sbassament da nossa vallada. L'altezia ei dada en meters sulla mar, in meter ei $3 \frac{1}{2}$ peis ni 5 bratscha nova.

Pass d'Ursera:	sur Tiarms	2154 meters
	sur Tschamut	2052 meters
Pass sul Crizli		2350 meters
Tschamut		1660 meters
Selva		1540 meters
Rueras		1360 meters
Camischolas		1424 meters
Sedrun		1398 meters

GR, nr. 49, 1859

Pastira als paupers

Tujetsch, nua ch'ils paupers pudevan vivon mirar tier co il terment muvel dils beinstonts sbutlava giu las stupentas pastiras ed alps cuminas, ha ussa encuretg da

bonificar ils „murdius“ cun dar ora ad els tocs pastira per schar semnar truffels e graun. Cun quellas sorts han gia bia vischnauncas segidau, ed aunc biaras savessen far il medem.

Nova Gasetta Romontscha nr. 1, 1860

Probabel la pli veglia lètg

Quels dis ha la numisericurdeivla mort separau a **Tujetsch** ina letg da 62 onns, 2 meins e 2 dis. Probabel la pli veglia letg dall'entira **Cadi**, sche buca dall'entira **Surselva**. Igl um ch'ei ussa morts, veva varga 88 onns e la dunna che viva aunc, ha cumpleniu ils 93 onns. Sch'enzatgi duess dumandar co quels seigien vegni vegls, sche san ins rispunder: cun viver en pasch e buna veglia, esser activs, setener vid la broda e tschagrun fiers e buca cun tudi sevilar, esser lischents e slavidrar caffè. *Ei retracta da Simon Fidel Decurtins fegl da Gion Antoni e Riedi Margreta Catrina, Ruera, remarca: Senilites, vegliadetgna: 88 onns; naschius 1773; maridau 1798 Maria Catrina Berther (1767-1960)*

Nova Gasetta Romontscha nr. 1, 5 da schaner

Il meglier uorden forestal

Per ina emprova, che nos meinis cheu allegai selaschien tgunschamein exequir, alleghein nus igl exempl dal vischnaunca da **Tujetsch**, che ha segiramein in dils megliers uordens forestals, ch'ei dat tier nus e nua ch'il quitau e l'energia dalla suprastonza spargna tut cumandar e dictar dils bostgers. En quella vischnaunca vegn ei pagau per in lenn tochen 20 francs. Quels onns eis ei vegniu baghegiau leu in grond diember da stupents clavaus da crap e vid sias classenas vesan ins spirontamein lenna fendida enstagl lattas. Persuenter aber ei la cassa da vischnaunca en bien stan ed ils uauls serefan ch'igl ei in plascher.

Nova Gasetta Romontscha nr. 2, 1860

Promoziun dil mèl

Ils 23 d. q. eis ei serimnau a **Mustér** 22 amaturs d'aviuls, spirituals e seculars ord las vischnauncas da **Tujetsch**, **Mustér**, **Medel**, **Sumvitg** e **Trun** ed han concludiu da constituir ina societad per promover la cultivaziun d'aviuls. Sco president ei signur farrer Durgiai da **Sedrun** vegnius numnaus.

Nova Gasetta Romontscha nr. 8, 25 da fevrier 1860

Il fevrer ha ballistrau

Il fevrer ei vargaus e satraus. El ei buca mo staus pli liungs ch'igl ordinari sonder era pli ruhs. El ha entschiet cun cufla ed ha ballistrau tochen il davos di. Gie, bia casas e clavaus vessen negin tetg pli, sche quel fuss buca staus fermaus giu entras ina brava neiv. El ha fatg siu duer cumpleinamein e tonaton parev'ei ch'el lessi aunc far bien ils davos dis, sch'el vess giu schau muncar enzatgei. Da plirs mauns aud'ins da sgarscheivels suffels dils 27 e 28. Enta **Medel** ha el buca mo rut en l'escha e bess las grundas da tetgs-londas pli lunsch, sonder perfin ruinau ina grunda da tetg cun plattas. Calonda mars ha purtau stupenta serenezia da 4 grads calira e favugn.

Nova Gasetta Romontscha nr. 9, 3 da mars

94 onns veglia

Questa jamna ei vegniu satrau a **Tujetsch** ina femna da 94 onns e 3 meins. Ella gudeva tochen il davos buna sanadad corporala e bien appetit, era aber totalmein sespiarsa dil spért e mava fetg en fanzegna. Veva ella per exempl gentau bravamein, sche era ella suenter in'ura puspei el stan da dumandar il gentar e sesmarvegliava, cura ch'ins scheva ch'ella hagi schon gentau. Essend siu um morts quest unviern, vegn ei in temps suenter fatg ad ella la damonda dad ina femna jastra, sche siu um seigi morts ed ella rispunda sissu: "Po schon esser, ch'el seigi morts." *Il cudisch da*

morts noda: 29-6-1860 Maria Catrina Berther, feglia da Gion Giachen e Berther Maria Elisabeth, Rueras, remarca: senilites, 93 onns,
Nova Gasetta Romontscha nr. 27, 6 da fenadur 1860

Cargau ils 25 da fenadur

Il fenadur ei staus in ruh gast, pli adattaus pigl unviern che per la stad. In' alp da **Tujetsch** ei vegnida cargada da s. Giachen, *ils 25 da fenadur*, ed ha ils emprems otg dis mintga damaun giu la neiv el stavel. Fein vess ei dau pli bia che quei ch'ins manegiava, mo igl ei gleiti da temer ch'el fetschi catschar pauc latg igl unviern.

Nova Gasetta Romontscha, nr. 31, ils 4 d'uost 1860

Sedustai sco liuns

Il pugn da recapitulaziun pervia da sminuir il temps dalla catscha sin camutschs ei ella **Cadi** vegnius enviaus anavos cun in grond pli e zuar a **Tujetsch**, **Medel** e **Trun** unanimamein. Ils catschadurs ein sedustai sco liuns e declarau per ina malgiustia da vuler scursanir ad els il temps da catscha per schar vegnir neu ils Tudestgs e Taliens e sittar naven nos camutschs. Ins vesa denton con necessari ch'igl ei da sentelgir cun nossas vischinontas tiaras sur dad ina generala fermada dalla catscha per enzacons onns. ...

Nova Gasetta Romontscha nr. 31, 4 d'uost 1860

La tema dil Run

La gronda malaura dils 17 d.q. ha caschunau gronds donns ella **Cadi** ed egl **Uri**. Sil **Lucmagn** ein treis armauls vegni pella veta, denter auter ei in bov vegnius menaus leu dil **Rein** giu e satraus enzanua en ina buola. Las punts da **Perdomat** e **Surrein-Sumvitg** ein dadas pell'aua ora. A **Sedrun** savevan ei buca qual'ura ch'il **Run** menassi naven ils morts en santeri. ...

Nova Gasetta Romontscha nr. 34, 25 d'uost 1860

Bulius sil ladretsche

Ina vegetaziun mai sudida! Ins temeva schon ch'il fein, ch'ins ha mess en uonn pudessi selevagar, mo dil sequent cass daventaus en **Tujetsch** vess negin semiau. Sin tut ils ladretschs dil **Dulezi** eis ei carschiu ord il fein bulius (parisols) dua, trei detta liungs! Il fein era suren ell'altezia d'ina mesas quarta tut bletschs e marschs.

Nova Gasetta Romontscha, nr. 37, ils 15 da settember 1860

Aua gronda

... Las auas ein carschidas, cunzun ils reins da **Tujetsch** e d'Acletta. ...

Nova Gasetta Romontscha nr. 39, 29 da settember 1860

Far baselimann

Tenor novas metereologicas da **Medel** eis ei stau leu 8 grads ferdaglia ed oz 8 zolls neiv, mo per ventira fan ils selvadis da **Medel** e **Tujetsch**, inaga ch'il temps ei neutier, buca aschi ditg baselimann (*far circumstanзias*) culs fretgs, sco ils da **Mustér**.

Nova Gasetta Romontscha nr. 42, 18 d'october 1860

(3) Ils habitants digl onn 1861 vulan buca la via, mo els han igl aspect da survegnir in "bahnhof" sut Sedrun. - Il manteniment dalla via Alpsu vegn aunc a fatschentar ils Tuatschins per entgins decennis e setschentar in di tochen a Losanna. - Ils 3868 animals ella val drovan in brav mantun fein e la munconza da fein sforza dad ir culs animals ord la val.

Tujetsch vul ni viafier nia via

Il resultat definitiv dalla votaziun sul pugn da recapitulaziun ariguard la viafier e las vias da communicaziun ei a nus aunc buc enconuschents, mo carteivel vegen el ad esser acceptaus tras la maioritad dils votants. ... Ella **Cadi** han **Medel, Mustér, Sumvitg, Breil e Schlans** acceptau el, **Tujetsch** (muort il manteniment) e **Trun** refusau. En tut en quei circuit 484 vuschs persuenter e 187 encunter.

Nova Gasetta Romontscha, nr. 50, ils 15 da december

Tujetsch cun 863 habitonts

Ord la dumbraziun dalla populaziun grischuna. **Cadi**.

	casas	casadas	habitonts	umens	femnas	burghéis
Tujetsch	132	206	863	417	446	827

Nova Gasetta Romontscha, nr. 1, ils 5 da schaner 1861

In "bahnhof els Plauns Sedrun

El novissim temps eis ei vegniu alla glisch in project per ina fusiun dallas rivalisontas viasfier sul **Gottard** e **Lucmagn**. Tenor quel duessen ins menar la viafier alpina naven dil **Lag da Lucerna** tochen sur **Amsteg**, da leu ella **Val Maderana** e tras in tunnel da 7-8 kilometers, circa in'ura e mesa, sut il **Pass Krüzli** a **Sedrun** e da leu sul **Pass Lucmagn**. Sin quella moda savessi ins unir la **Svizra Meridiunala e Centrala** cull'**Italia** tras ina viafier che custassi 14 milliuns pli pauc che quella sul **Gottard**. Ei para ch'ils Tuatschins, che vulan „nuet“ survegنان tut: la via sul **Cuolm d'Ursera** e la viafier cun in stupent „bahnhof“ el **Plaun Sedrun**.

(GR 1861, nr. 1)

Gia suttascret duas gadas

Ina gasetta raquenta, che la regenza hagi era tarmess tier a nossa vischnaunca in formular per far suttascriver da surprender l'expropriaziun dil sulom ed il manteniment della via ad **Ursera**. Ella segiresha che quei segi per nus bluttamein ina formalidad, per raschun che nus hagien schon duas gadas suttascret claramain e noncondiziunadament da surprender il manteniment tochen sil cuolm e di alla fin: Quei ei lu aschia!

Bien, sche quei ei aschia, sche drov'ei buca da suttascriver quater gadas la medema caussa; ins laschi cun quei che ei schon suttascret, ni ei quei buc avunda? Al gasettist cussegliassen nus da far suttascriver igl emprem a **Berna** ils 12 tschien melli francs, ch'el manegiava da ver enta pugn, suenter duei el vegnir tiels da **Mustér** e pér il davos tiels Tuatschiners, che han fatg nuot e teman nuot. Capeschias. Denton nuota per mal.

Tujetsch a Sumsassi, nua che las uolps dattan ina l'autra la buna notg.

Giachen dallas Stgellas

Nova Gasetta Romontscha, nr. 1, ils 5 da schaner 1861

3868 animals ella val

Dumbrada dalla biestga ella **Cadi**:

	Tujetsch
Vaccas	401
Genetschas	191
Stiarlas e muias	72
Bos	-
Stiarls	236
Taurs	4
Vadials	190
Cavals	35

Cauras	1420
Nuorsas	1060
Pors	259

Nova Gasetta Romontscha, nr. 6, ils 9 da fevrier 1861

Tagliau giu dus dets

En **Tujetsch** seglian dus umens vid ina buora per retener ella. In carga cul maun, l'auter vul fitgar en la sigir e taglia giu dus dets agl emprem.

Nova Gasetta Romontscha, nr. 8, ils 23 da fevrier 1861

Tujetsch dumba 149 votants.

Nova Gasetta Romontscha, nr. 11, ils 14 da mars 1861

Emigraziun dalla biestga

Ella **Val Tujetsch** eis ei rut ora ina gronda emigraziun – aber mo denter la biestga armentiva. Per munconza da fein han ei leu stuiu tarmetter tschiens armauls pella **Cadi** giu “ell’ustria”. Il pli frequentau ei il grond hotel da **Laus**, nua ch’in brav pur ha vendiu fein per varga 800 frs. e zuar mo per 7 frs. il fiertel, ferton ch’ei vegn pagau en auters loghens tochen 10 frs. ... Malgrad tutta bun’aura va ei aunc in per gievgias avon ch’ils stiarls sappien pastgar en **Tujetsch**. Ei era leu avon 8 dis ina nevada da varga 10 quartas altezia, gie ina part pretendan ch’ei eri ual aschi bia neiv sco il matg 1858. Per ventira han neginas lavinas fatg donn. Denton san ils Tuatschiners seconsolar cul vegl proverbi: “Dad ina gronda nevada e numerusa casada duei negin sestermentar”.

Nova Gasetta Romontscha, nr. 13, ils 30 da mars 1861

Premiaziun dils bos

Pertucont ils bos. ... Ils da **Sursassiala** vessen pli bugen che l’urentada dils bos daventassi amiez liug dalla **Cadi**, a **Sumvitg**, buc a **Trun**. Tschelluisa ston ils bos da **Tujetsch** e **Medel** far in viadi da 5 uras, ch’ei per els in pregiudezi da trer premi. ... Nova Gasetta Romontscha, nr. 15, ils 13 d’avrel 1861

Las tschereschas tostas da Tujetsch

Il Tagblatt cusseglio allas femnas da tener en honour la pera tosta, las sneclas e zuescas, essend ch’ei selaschi spitgar pauca puma uonn. Bia pumera veglien buca flurir ed il matg vegnien ils baus a far grond donn vi dad ella. – Nus stuein denton remarcar, ch’il tscherscher da **Tujetsch** fetschi ina ludeivla excepziun, quel ei ussa decoraus cun tschereschas e zuar – tostas!

Nova Gasetta Romontscha, nr. 15, ils 20 d’avrel 1861

Tujetsch ha refusau la damonda

Sco ei tuna ha il pievel dalla **Surselva** buca grond tschaffen da separticipar vid la viafier cun in milliun francs, schegie ch’el ha cun resalva da tschun vischnauncas giu offeriu 1853 da schenghegiar tut ils funs e pastiras, ch’il sulom dalla viafier drovi! Ferton che **Tujetsch** ha secartiu da nuot entrar en quella damonda, ha la vischnaunca da **Mustér** concludiu da prender aczias pellas pastiras, pil material ch’ella sa dar e pella indemnisiatzun dils donns ch’ella sco tala savess pigliar. Sco ins auda eis ei pliras vischnauncas che vulan far las medemas offertas.

Nova Gasetta Romontscha, nr. 22, igl 1. da zercladur 1861

Collecta

Per il barschament dil marcau da Glaruna, l’emprema dumengia da matg 1861, ha la vischnaunca da **Tujetsch** dau 105 frs. en daner.

Nova Gasetta Romontscha, nr. 23, ils 8 da zercladur 1861

In Run vehement

... A Sedrun ei il **Drun** da biars onns enneu mai staus aschi vehements sco quei di, numnadamein ils 13 d'uost 1861.
(GR, 1861, nr. 33)

Bia fein els cuolms

... Ils mises ni cuolms han dau bia fein ed ultra da quei han las vischnauncas sco **Tujetsch** e **Medel** fatg ina gronda quantitat fein a pastg, taluisa ch'ils avdonts da leu ston speronza igl unviern proxim buc ir ord vischnaunca cun lur muvels. Ei vegn quintau ch'in um pudevi far in fiertel fein a pastg a di e che sia schurnada purtavi aschia in taler. ...

Nova Gasetta Romontscha, nr. 36, ils 6 da settember 1861

Bunas cundiziuns pil spazzatgamin

La ludeivla vischnaunca da **Tujetsch** tscherca in **spazzatgamin** sut fetg favoreivlas cundiziuns per el. Da s'adressar tier la suprastonza.

Nova Gasetta Romontscha, nr. 39, ils 27 da settember 1861

Nevada il davos settember

La neiv dil davos settember ha tut anetgamein dau a nossa tiara gl'aspect d'unviern. Igl ei stau ina nevada da quei temps mai sudida da regurdientschas da glieud. ...
Nova Gasetta Romontscha, nr. 40, ils 4 d'october 1861

Ei quei giustia e dueivladad?

Nossa Wochenzitung setegn si sul pareri dalla cumissiun dil stan pervia dil manteniment dallas vias. Ella sa denter auter buca capir, co il cantun selaschi en da mantener il **Cuolm d'Ursera** schon naven da **Sedrun**. Mo nus savein capir aunc bia meins, cun tgei dretg ch'il cantun vul far pagar **Mustér** e **Tujetsch** l'entira expropriaziun ed el lu metter en sac las duas tiarzas che la Confederaziun paga da quella summa, sco da tuts auters cuosts che van si per quella via.

Nova Gasetta Romontscha, nr. 42, ils 19 d'october 1861

Quasi in milliun facultad

Il november 1861 figurescha **Tujetsch** cun ina facultad da 941 300 frs. ... Cun dar en igl avanzament da quels 5 onns eis ei generalmein iu vess, tuttina dat ei bravs purs a **Tujetsch** e **Medel** che han en quels onns recaltgau lur facultad per 4 – 10 000 frs.

Respect da tals casarins!

Nova Gasetta Romontscha, nr. 44, igl 1. da november 1861

Stagiada dalla via

La projectada via sul **Cuolm d'Ursera** vegn da miez october enneu stagiada giu e prida si da plirs inschigniers sut direcziun da signur Depuoz; ella survegn ina munta da 5 procent.

Nova Gasetta Romontscha, nr. 44, igl 1. da november 1861

(4) La mercanzia da biestga, cauras e nuorsas

La fiera da Ligiaun era la fiera la pli impurtonta per la tratga da biestga ella val. Ella fuva era la gronda fontauna da daners. Dasperas deva ei numerusas fieras ella regiun e lu quella en Tujetsch, alternond in onn a Rueras e l'auter onn a Sedrun. La fiera da Ligiaun era adina empau dubiusa ton ch'il proverb scheva che treis

caussas seigien grevas da lignar: "L'aura, la fiera da Ligiaun e la luna dil pievel sin cumin".

La mendra caura per in marenghin

La fiera da **Trun** ei stada frequentada da bia glieud e tiers. Vaccas, stiarls e vadials eis ei vegniu vendiu e zuar per bials prezis. Era la mendra caura ei vegnida sin in marenghin. La dretga fiera da cauras vegn denton tenida mardis proxim a **Tujetsch**, nua ch'in sulet pur ha quest matg vendiu cauras per 340 frs. Silla fiera d'**Ursera** eis ei uonn catschau zun paucas vaccas. Ils purs fussen bein narradira, sch'els massen cun lur tiers sur cuolm, cura ch'els san vender quels en nuegl per stupents prezis.

Nova Gasetta Romontscha, nr. 23, 5 da zercladur 1857

Ils capomarcadonts muncavan

Il marcau da **Glion** ei quellaga buca staus frequentaus sco quel dil december. Ils capomarcadonts da stiarls muncavan, ed aschia eis ei aunc restau dabia da quels tiers sin plazzafiera. Cun quella marcanzia „dalla cuu“ ei lura in da **Trin** serendius a **Tujetsch** per vegnir sura da quels tiers – in cass aunc mai s'udiis!

GR nr. 4, 23.1.1958

Cumprau in taur per 14 marenghins

La tratga da biestga ha el novissim temps fatg bials progress, schegie ch'ils premis cantunals per s.v. bos han calau si e ch'ils geraus da vischnaunca han buca pli in bov per lur honorific uoppen da dignitad. Sco ins auda vegn ei ussa teniu pli e pli bials bos e la razza da biestga vegn pli e pli biala. – Era **Tujetsch** ha uonn vuliu far in'emprova e cumprau in per 14 marenghins. Sch'igl ei uonn vegniu vendiu a **Mustér** in vadi da siat jamnas per 85 frs. – in cass aunc mai s'udiis en quella vischnaunca – sch'ei quei era da perscriver tier al meglier indrez da bos. Tgei grir e selamentar, cura ch'ils geraus han tenor lescha cantunala stuiu vegnir liberau da tener bov, sco sch'igl entir mund bestial stuess cheutras ir sutsura! Ed ussa vesa tut en, che quei ei stau in grond avantatg pella tratga da biestga.

GR 1858

Fiera a Sedrun

La fiera da **Tujetsch** vegn tenida mardis proxim, ils 15 da quest e zuar a **Sedrun**.

Tujetsch, ils 10 da zercladur 1858

Igl actuaritat da vischnaunca

GR nr. 24, 12.6.1858

La pli viva fiera

La fiera da **Tujetsch** ei stada la pli viva da tuttas fieras ch'ein vegnidas tenidas questa primavera en **Surselva**. Dil cumin da **Rueun** e dalla **Cadi** eis ei vegniu catschau bia biestga, ch'ei vegnida vendida per bials prezis, schegie ch'ils d'**Uri** fagevan la fiera d'**Ursera** mo beffas cun quellas. Igl ei era vegniu schau via da bia cavals per tscheins als Tudestgs. Els han pagau 24 – 30 talers per cavagl, aber enviau anavos il rufid. Il bia han ils numerus Tudestgs marcadau, ils marcadonts da **Tujetsch**, ch'ein schiglioc plein fiug, miravan mo tier, sulet el consum dil gustus bier da **Glion**, han ils Tuatschiners fatg concurrenza culs jasters. – Las nuorsas da piazas (*nuorsas da maz*) han uonn tratg mal e biars manegian perquei tenor in vegl proverbi, ch'era ils stiarls vegnien d'atun buc a trer bein.

GR nr. 25, 19-6-1858

Fiera 1859 a Rueras

Ei vegn cheutras fatg da saver che la fiera da **Tujetsch** vegni tenida gievgia proxima, ils 16 da quest e zuar a **Rueras**.

La suprastanza da **Tujetsch**.

GR nr.24, 1859

Bia glieud e tiers

La fiera da **Tujetsch** ei uonn stada frequentada da bia glieud e tiers. Digl **Uri** era ei vegniu neu ina massa umens e femnas. Las cauras – il capoartechel da quella fiera – mavan l'entschatta tut el luft per aults prezis, mo cura ch'il cavrer da **Medel** ei arrivaus sin plazzafiera, han ei entschiet a dar sut en e tgi che ha buca vuliu turnentar, ha stuiu vender in taler pli bienmarcau ch'avon. Era da bia vaccas eis ei vegniu marcadau per fetg andants prezis. – Il davos han Tudestgs perfin giu commiseraziun culs cavals e priu si enzacons a tscheins, bein aber per pauc pli che pella mesadad dils prezis d'onn.

GR nr. 25, 1859.

Tochen a Meiringen, Altdorf e Lucerna

Marcadonts da Tujetsch ein i cun vaccas silla fiera da **Meiringen** e cun quellas, che els han buca saviu vender ad **Altdorf**, ein els sembarcai pil cantun **Lucerna**.

Beinenqual renconuschiu pretenda ch'ei seigi buca schi grond gudogn, sco ins manegi, da vender ora tontas dallas bialas vaccas, schegie ch'ellas paghien bein, per motiv che la razza piteschi memia fetg cheutras; mo speronza che las vaccas, che restan anavos, vegnien tenidas ton meglier e ch'ins hagi da quellas la dubla rendita.

GR, nr. 43, 1859

Ei ha caztgau da vender

Questa jamna eis ei stau per la **Surselva** si marcadonts da vaccas tochen **Medel** e **Tujetsch**. Ei han cumprau si dabia tiers e pagau fetg bein. Vaccas danvons eis ei zuar fetg paucas, mo ils bials prezis caztgan da vender.

Nova Gasetta Romontscha nr. 5, 4 da fevrer 1860

Gudignau pauc ni nuot

Ils 12 e 13 d. q. ei stada la fiera d'**Ursera**. Cumpraders eis ei stau zun negins auters che Uranès. Sin las vaccas ha nossa glieud gudignau pauc. Era cun las nuorsas han ei fatg pintgas fatschentas, schegie ch'ins sa dir che 22 – 23 frs. il pèr seigi pagau pial e quagl dallas nuorsas, sche han ils marcadonts gudignau nuot. Il pli fetg eran ils cavals tschercai. In da **Tujetsch** dueigi ver vendiu in cavagl da siu tratg per 35 marenghins, per da nos cavals in prezi maisudiu. A tscheins per treis meins prendevien ei si cavals per 30 – 35 talers. – Ils 19 ei la fiera da **Tujetsch**, la davosa tier nus avon cargar ad alp.

Nova Gasetta Romontscha nr. 24, 16 da zercladur 1860

Moviment da marcadonts

... Per quella gada han ei aunc segidau cun brevs, che han lu mess ella **Cadi** en grond moviment ils marcadonts dalla secunda classa; perfin Tudestgs ein vegni neu da **Ursera** e han cumprau si stiarls a **Tujetsch** e **Medel**. ...

Nova Gasetta Romontscha nr. 40, 6 d'october 1860

Catschau tochen giu la Baviera

Posteriuramein remarchein nus ch'ei seigi quest atun tras Tuatschiners vegniu catschau en duas gadas circa 130 vaccas sursilvanas ella **Baviera Bassa**. Schon avon in per onns vevan ei catschau giu leu dabia vaccas ord la **Partsura**, ils cumpraders ein fetg cuntents da quellas e laudan ch'ellas dettien bia latg inaga ch'ellas hagien tuchiau il strom grischun.

Nova Gasetta Romontscha nr. 49, 8 da december 1860

Nus mein buca pli lunsch!

Fuss ei buca pli adattau da destinar la fiera da **Tujetsch** sin in di fix che da mintg'onn

stuer leger el calender, ch'ella crodi 8 dis suenter quella dad **Ursera**, dalla quala negin sa cura ch'ella vegn tenida tochen ch'ella ei buca neutier? Era l'alteraziun da quella fiera denter **Sedrun** e **Rueras** savess calar si senza che la **Val Tujetsch** pitess cheutras il minim donn. Ins duei mirar sin la cunvegnentscha dils biars jasters che vegnan sin fiera e cheu sa scadin seperschuader che **Medel**, **Mustér** e **Sumvitg** furneschan pli bia glieud e tiers ch'ils Tudestgs e per quella raschun duess la fiera vegnir tenida a **Sedrun**. Tgei lessan ils Tuatschiners far encunter, sch'ils vischins da quellas treis vischnaucas declarassen, nus mein buca pli lunsch che **Sedrun**. Nus lessen lu uardar, nua che la gronda fiera vegeness tenida, schebein ils da **Rueras** vegnessen buc o **Sedrun**, ni silmeins tochen **Camischolas**, nua ch'ins vess ina pulita piazza-fiera, ustrias e caffès en abundonza. Denton veies nuota per mal vus da **Rueras**.

Nova Gasetta Romontscha, nr. 23, ils 8 da zercladur 1861

Fira 1861 a Rueras

Ei vegn cheutras fatg da saver al respectiv publicum che la **fiera da Tujetsch** vegni tenida ils 18 d.q. a **Rueras**.

La suprastanza da Tujetsch

Nova Gasetta Romontscha, nr. 23, ils 8 da zercladur 1861

Vaccas e cauras per bials prezis

La fiera da **Tujetsch** ei stada frequentada ualti bein da glieud e tiers ed igl ei vegniu marcadau pli bia vaccas e cauras per pli bials prezis che la fiera da **Trun**. Tudestgs eis ei stau neu da biars ed ein turnai envi cun ina roscha cauras, muias e da bia cavals pri si per tscheins. Els han cheu pagau meglier che sch'ins fuss ius leuora culs tiers. Al scribeint che ha giu fatg tscheidi beinfundadas remarcas en nossa gasetta sur da quella fiera, stuein nus rapportar la legreivla nova, che siu giavisch pervia da tener inaga e per adina quella fiera a **Sedrun** vegni fetg probabel ademplius. Ils Romontschs eran malidis da stuer ir a catschergnond lur tiers en tutta calira pli lunsch che necessari. Ils Tudestgs han medemamein declarau, ch'els seigien fetg cuntents da vegnir a **Sedrun**. In Romontsch ha a nus expressivamein supplicau da notificar, ch'el hagi spendiu 4 frs. dapli cun ir pli lunsch e sper pli bia ustrias ora, che sch'el vessi stuiu ir mo tochen **Sedrun**. Sco ei vegn detg vulan ils da **Rueras** sez semussar generus e meriteivels pil publicum e sill'emperma vischnaunca voluntariamein resignar sin lur piazza-fiera.

Nova Gasetta Romontscha, nr. 25, ils 22 da zercladur

Fiera da Ligiaun

Ils 22 d.q. ein nos marcadonts da **Tujetsch** e **Medel** semess sin via pella fiera da **Ligiaun** cun lur tiers cumprai si la primavera. Els han per ventira pintgas roschas e buca sefidau da comprar si enzatgei da num. Ils Glarunes ch'ein uonn stai sentardai per 2 dis muort il sbagl dil calender culla fiera da **Glaruna**, han passau il **Lucmagn** ils 25 d. q. cun circa 400 tgaus, era cumprai si il bia la primavera. Plirs famus marcadonts dalla **Cadi** prefereschau uonn da star a casa enstagl frequentar l'emperma fiera da **Ligiaun**. Ils mulissiers han aunc mai tarmess aschi schliatas novas sco uonn. In da quels ha giu scret, ch'ins dueigi nuota vegnir uonn cun tiers, ni cun biars ni cun paucs. Speronza che la pintga catschada seigi empau scompa.

Nova Gasetta Romontscha, nr. 39, ils 27 da settember 1861

1861

Sco ins auda ei la fiera da s. Andriu, *dils 30 da november*, a Ligiaun buc ida bein. Ei seigi stau fetg bia tiers, mo vegniu vendiu pauc, perquei han plirs stuiu vargar giu. Tuttina han dus stiarls da **Tujetsch**, ils pli bials ch'ein i sul **Lucmagn**, in favega 7 quartas en massa m. v. pagau 8 dublas in sur tuttas spesas.

Nova Gasetta Romontscha, nr. 49, ils 6 da december

1861

Havend in marcadont da **Tujetsch** ed in da **Medel** instradau la jamna targada ina roscha vaccas da maz per passar il **Lucmagn**, han ei dadens **Varghera**, il cuolm denter **Mustér** e **Medel**, schau ir surengiu duas da quellas, ina ei stada ventschida cun inaga, l'autra han ins l'auter di stuiu far giu. Il miserabel pass denter **Mustér** e **Medel** ha schon laguttia bia unfrendas ed igl ei bien ch'igl onn 1864 ei gleiti neutier, nua ch'ei sto vegnir baghegiau ina viafier sul **Lucmagn** ni in stradun che vegn baghegiaus e mantenius sin quen cantunal. L'expropriaziun vegn cheu franc buc a dar tontas difficultads sco igl ei il cass tiel **Cuolm d'Ursera**.

Nova Gasetta Romontscha, nr. 51, ils 20 da december

La fiera da Tujetsch

vegn tenida gievgia, ils 12 da zercladur a **Sedrun**

La suprastonza

Nova Gasetta Romontscha nr. 23, ils 7 da zercladur

(5) Per la via nova sto la vischnaunca supreender ils cuosts dalla expropriaziun.
Quei fa mal, munta la summa rodund 20'000 francs. Vid quella damonda penda l'acceptanza dalla via entras ils Tuatschins. – Ina radunanza dramatica cun la preschientscha digl avat dalla calustra decida finalmein per la via. – Il schaner 1862 ha ei dau in suffel che derscheva femnas.

Quater uras e vegn minutias munta la distanza denter Mustér ed Andermatt

La nova via sul **Cuolm d'Ursera** vegn naven dil vitg da **Mustér** tochen sils cunfins d'**Uri** 20'926 meters liunga ni 4 uras e 20 minutias. Da **Tschamut** munta ella sil cuolm mo cun 8 procent.

Nova Gasetta Romontscha, nr. 46, ils 22 da november 1861

Expropriaziun e manteniment?

In per plaid a **Mustér** e **Tujetsch** ariguard la via sull'**Alpsu**.

Silla fin december sto nossa Regenza declarar al Cussegl Federal, schebein nus laien supreender da baghegiar la via sull'**Alpsu** ni **Cuolm d'Ursera** encounter ina bonificaziun federala da 200'000 frs. Nies Cussegl Grond ha da sia vart acceptau quella generusa offerta e per levgiar ed animar las vischnauncas da **Mustér** e **Tujetsch**, ha el aunc concludiu, che quella nova via dueigi en sia entira extensiun dil vitg **Mustér** tochen sils cunfins d'**Uri** vegnir mantenida dil cantun anora. Essend che quei cuolm sto buca vegnir tenius aviarts gl'unviern, sche han las duas vischnauncas mo da menar la galera (*chisa*), che vegn preparada e bess ora sin quen cantunal. Il manteniment dalla via – la pli gronda grevezia – ei aschia prida giu ad ella ed ei resta mo aunc l'expropriaziun, quei ei il pagament pils beins, ch'ins drova tiel sulom dalla via. Ellas han ussa en cuort da rispunder al ludeivel Cussegl Pign, sche era elllas veglien da lur vart ir en la cunvenziun ni buc.

Aunc buca daditg vegneva ei insinuau da far supreender **Mustér** e **Tujetsch** duas grevezias: L'expropriaziun ed il manteniment. Sut quellas condiziuns vessen nus buca saviu cussegliar da retscheiver la via, dapi aber che la pli greva condiziun ei curdada naven, essan nus decisivamein per l'acceptaziun da quella biala offerta.

Ei sedamonda ussa mo: *Vus da Mustér e Tujetsch leis supreender l'expropriaziun, sch'ei vegn baghegiau e manteniu a Vus ina stupenta via che porscha a Vus ina tut pli avantagiusa communicaziun denter Vossas duas vischnauncas e la Svizra Interiura?* Sch'ins ponderscha ils avantatgs ch'in stradun porta als vivents ed allas suandontas generaziuns: **gie**. En mintga cass ponderei e turnei a ponderar avon che dir na,

pertgei quella favoreivla occasiun vegn forsa mai a turnar pli e gronda ei en quei risguard Vossa responsabladad visavi a vos vognentsuenter.

...

Vus da **Tujetsch** aber che smuldis ton sulla schliata via sil territori dils da **Mustér** e smanatscheis da tgisar els alla Regenza, patertgei ch'ei seigi il mument da survegnir ina oreifra via. Patertgei ch'il cantun stoppi baghegiar e mantener las punts e vias sur vos prigulus druns e che vegnan a tener quels empau meglier a frein, duront ch'els smanatschan ussa d'ir cun vossa baselgia e vos morts. Vus che scheis adina, che vus survegnessies ad **Ursera** la rauba bia pli bienmarcau ch'ensi, sch'ei custassi mo buca ton da purtar neu. Bien, quellaga vegn ei fatg a vus ina via che vus saveis menar neu ella cun pintga spesa. Co sa l'expropriaziun tementar giu vus che saveis dar ora pastira per in grond capital e senza pregiudezi. Contas muschnas vegnan a vegnir schubergiadas giud ils praus denter **Mustér** e **Tschamut**; tgei reha resursa da fadigias arva la construcziun dalla via nova?

Visavi aschi considerabels avantatgs svanescha la summa da 30 – 40 000 frs. che l'expropriaziun po custar a **Mustér** e **Tujetsch**. Quella tucca ei da pagar mo inaga, ferton ch'ils avantatgs cuozan adina. Meditei madiramein la caussa senza pissiuns e pregiudezis, patertgei buca mo vi da vus, sonder era vid vos affons, beadis e sutbeadis; reflectei che l'entira **Surselva** giavischia l'avertura dil **Cuolm d'Ursera** e seigi spanegiada sin vossa decisiun e prendei lu vossas conclusiuns vengonzas ad in liber e savieivel pievel.

Sco ins auda duei il niev prelat *avat* da **Mustér** esser fetg importaus per la via dall'**Alpsu** e la claustra prompta da purtar tuttas dueivlas unfrendas.

Gasetta Romontscha, nr. 48, ils 29 da november 1861

Radunanza dramatica

La via sill'**Alpsu** avon la vischnaunca a **Mustér** e **Tujetsch**.

Allegrai tras il bien success a **Mustér** ein ils signurs cumissaris aunc il medem di serendi a Tujetsch. Essend pli datier dils glatschers e la contrada, priu ora las suleglivas spundas da **Sedrun** e **Camischolas**, aunc cuvretgas cun neiv, han ei gleiti sentiu ch'ei seigi cheu in pli ruh clima che a **Mustér** e ch'ei drovi perquei gronda forza per sgarglientar ils pregiudezis e che lur vuschs vegnien bia pli tgunsch raukas che quellas dils Tuatschins. Gliendisdis – nua che l'entira val ei vegnida inundada da bulletins che purtavan igl unanim conclus da **Mustér** ed il plaid da monsignur avat, - eis ei vegniu tier fermas debattas en repetidas conferenzas. Ferton che plirs respectai vischins han cheu plidau e luvrau en favur dalla via ed in per perfin offeriu da garegiar negina indemnisiatiun pils orts ni funs che quella prendi naven ad els, era ei denteren da quels che levan saver nuot dil grond schenghetg ch'ins offereva ad els. Il success era aunc dubius e buca senza tema e passadetgna han ils signurs delegai spitgau sill'a vischnaunca fixada sin s. Leci, 2 da december.

Igl impurtont e decisiv mument ei arrivaus. Ils umens da **Tujetsch** ein serimnai sin publica piazza, serrada en dil prigulus **Drun**, dalla periclitada baselgia cun santeri, dalla casa da scola e dalla via imperiala ed ual en fatscha al bi **Cuolm d'Ursera** – tut facturs che plidavan cun aulta vusch en favur dalla via. Dentuorn era ei plirs vischins da **Mustér**, ch'eran oz ual aschi plein marveglias sco las feglias dad Eva che formavan in bi rudi entuorn la radunanza. Il president arva la vischnaunca cun relatar l'impurtonta questiun pella quala ei retracti oz e cun recumandar ruaus e prudientscha, senza aber cheutras vuler pregiudicar il liber votum. Sin formala invitaziun dalla vischnaunca cumparan ils cumissaris dalla regenza, dalla **Surselva** e dalla **Cadi** enamiez il pievel, buca senza grevadetgna che lur aulta missiun vegni oz buc a reussir. Il cumissari guvernativ, signur Latour pren il plaid. El fa attents il pievel sil legreivel resultat a **Mustér**, co il niev monsignur avat hagi leu cooperau cun el, tgei la harmonia denter spiritual e secular vegli dir, el vegni a far il pusseivel pil manteniment da quella e dalla claustra. El hagi cheu encunter era speronza che

Tujetsch vegni oz tras siu conclus a consolidar quella biala harmonia. Il Cussegl Grond hagi fatg tut pusseivel per levgiar la vischnaunca da **Tujetsch** cun prender giu il manteniment. El alleghescha ils gronds avantatgs che la via sull'**Alpsu** porti e per ton pli tgunsch gudignar il pievel per quella idea lai igl oratur aunc leger avon il plaid da monsignur avat.

Tut nunspitgadamein e senza ch'enzatgi a **Mustér** e **Tujetsch** vessi saviu, arriva cheu monsignur avat, *Paul Birker (1861-1877)* el vitg da **Sedrun**. Ina honorifica deputaziun envida en el da prender part dalla deliberaziun. Sia cumparsa e siu discuors han fatg buna impressiun: „Jeu vevel questa damaun negin ruaus a **Mustér**,“ di el denter auter, „tochen che jeu sun buca seresolvius da vegrir tier Vus en Vossas bialas muntognas e da dir a Vus ch'ei retracti cheu d'ina impurtonta questiun per quella vallada.“ El fa attents sin lur responsabladad visavi agl avegnir e di lu, ch'el vegli aunc dir in per plaids en romontsch, essend ch'ils biars capeschien buca siu lungatg. „Jeu prendel la libertad da vegrir tier Vus e supplicar Vus, da ariguard il generalbeinstar purtar ina unfrenda pella realisaziun dalla projectada via. Il tschiel benedeschi vus persuenter!“

Il plevon ed il conventual che veva accumpaignau gl'avat, sustegnan ils plaids da quel e sin quei plaidan ditg e bein signur cusseglie naziunal Toggenburg e bundsstatalter Seeli. Els fan attents che las vischnauncas da sut hagien suttascret da supreender il manteniment e la expropriaziun sin lur territori mo cun la speranza, che ils cuolms vegrinen aviarts. Il mument seigi ussa cheu ed ins spetgi che **Tujetsch** vegni buc a resister al general giavisch – **Tujetsch** che hagi quels onns tras sias bialas reperaziuns da vias mussau, ch'el sappi preziar tgei ch'ina buna communicaziun vegli dir.

Suenter ch'il signur president dalla **Cadi** ha aunc giu fatg attents sillas ligiontas cunvenziuns, vegrinan ils ufficials dalla vischnaunca dumandai si per lur meinis. Gl'emprem gerau, *Hans Giachen Beer, Gonda*, e secund gerau, *Gion Andriu Berther, Camischolas (1805 - 1887)*, recamondan al pievel da prender si la via; il tierz, *statalter Duri Venzin, Rueras*, – gl'um dalla buorsa – vul saver nuot da quella. Ils purs dueien mirar bein tgei ch'ei fetschien, las taglias seigien schon ussa grevas e vegrinen tras la via nova a vegrir nunsuportablas, il sulegl, che seigi oz levaus bials, pudessi ir giu stgirs. Quels plaids han dau anim alla opposiziun che sereghigliava pir che mai. Mo suenter quei fegl dat siu bab, *statalter Paul Wenzin, Rueras*, giu il meini – in respectau um da 68 onns – „Jeu sun pella via, mo buca tonta tema per quei deivet, ei va schon, mo curascha, curascha ed uniu!“

Quels plaids ein pli u meins vegrini susteni dils suandonts votums, priu ora in ex-gerau, che ha bugen ses meinis aparti. Suenter ditg haver plidau vi e neu e segirau ch'ins vegrini a far tut pusseivel per vegrir culla via giu el vitg da **Rueras**, vegr ei finalmein priu si il pli – circa duas tiarzas han votau pella via ed ina tiarza encounter. Deplorabel eis ei stau d'observar ch'ils mats che han il pli grond avantatg dalla via, eran fetg biars encounter e remarcabel ch'era las bia femnas, che van tschelluisa buca nuidis per las vias, eran cun peis e mauns encounter la via, gie ina feglia ha cun sia malaveglia declarau da buca dar tscheina al bab che veva plidau en favur dalla via. – Speranza che quellas antipatias vegrinan tuttas a svanir cul temps.

Nova Gasetta Romontscha, nr. 49, ils 6 da december 1861

Il buf ha pudiu derscher femnas

Culla vegrinda dil tscheiver ha era gl'unviern vuliu dar in segn da veta. La cufla dils 6 da schaner ha interrut il regular cuors da posta ed era enviau bia cauras en nuegl, ch'eran digl atun naven manidas ora. En **Tujetsch** eran ils bufs schi stermentus ch'els han pudiu fierer entuorn femnas, per ventira purtavan elllas neginas crinolinas, tschelluisa havess ei pudiu dar tut pli grondas sventiras.

Nova Gasetta Romontscha, nr. 2, ils 6 da schaner 1862

Publicaziun

Ei vegn cheutras fatg da saver ad in ludeivel publicum ch'ei vegni ils 15 dil meins current mess egl ingant a **Rueras** la casa, ils funs e baghetg, sco era igl entir mobiliar digl ustier Hans Giachen Berther. Tuts che han plascher d'in ni l'auter da quels effects, ein envidai en da cumparer sin quei di a **Rueras**.

Tujetsch, ils 4 da schaner 1862

Morts a Buffalo

Tenor novas d'ina gasetta dall'America ei ils 27 da schaner spartius el Segner igl aultreveriu pader Lucas Cavegn, gesuit, el marcau **Buffalo ell'America**. Tuts catolics da quei grond marcau, cunzun la vischnaunca da s.Michael, fundatur dalla quala el ei staus, condoleschan zun fetg la sperdita da lur carezau pastur. El rauassi en pasch. – Pader Lucas Cavegn ei naschius a **Tujetsch** igl onn 1806 ed igl onn 1830 intraus egl uorden dils Gesuits, nua ch'el ha operaou gl'emprem el cantun **Sviz** e lura el cantun **Valeis** cun gronda premura ed era perquei zun carezaus. Igl onn 1847 eis el vegnius tarmess ell'**America** sco missiunari, ha operaou leu cun premura quater onns en **Canada Su** ed igl auter temps eis el sin desideri digl uestg staus a **Buffalo** sco missiunari. Cheu ein duas bialas baselgias (s.Michael e s.Onna) sco permanents mussaments da sia premura apostolica.

Nova Gasetta Romontscha, nr. 11, ils 14 da mars 1862

(6) Ina tragedia, la via e la zoppina fatschentan la val igl onn 1862

Ils da Rueras vulan buca la via sul vitg ora. – Cass targic a Seiva: In mat ha mazzau siu agen frar. – La maslogna "bestiala" dils peis tiella biestga ei rutta ora a Selva ed ils cunfins viesr uri ston vegnir serrai. Il zercladur ei la malsogna dalla zoppina sederasada ell'entira Surselva. – Il fenadur lavura 300 luvrers vid la nova via. – Pauc mèl d'aviuls ed ils Tuatschins selamentan d'esser vegni menai davos la cazzola

La via mondi sul vitg ora

Ils vischins da **Rueras** – la residenza dils vegls diplomats tuatschins – ein era malcuntents che la via mondi sul vitg ora. Sin lur instanza ha la vischnaunca da **Tujetsch** medemamein concludiu da far da quellas varts novs pass tier las autoritads. Ella ha semussau aber pli mala e pli carina ch'ils da **Mustér**; ella vul ch'ei vegni midau giu quella direcziun senza che la cumissiun vegni sin in'uatga e caschunassi considerabels cuosts alla vischnaunca. Ch'ei va vess da vegnir ora culla buorsa per da quels fatgs, ei da capir, denton manegein nus, ch'ils Tuatschins vegnien ad envidar en tier els la cumissiun dil stan, inaga ch'ella ei tochen a **Mustér**, per schar ver quels signurs lur stupenta vallada e schigiar lur gustus magnuc caura e lur famus mèl alpin. Ne betg? Gie, lu pon las bialas da **Rueras** sefar si e clamar tier a quels signurs sisum il vitg: „Vegnien giu tscho, tscho ei nairas!“ Nus agurein bien success e ventira als da **Rueras**, mo ei para bunamein sco sch'ei smanatschass in castitg ad els, perquei ch'els han vertiu da schar metter maun vid il venerabel monument da lur renomau convischin, dil fundatur dalla Ligia Grischa, Pieder de Putnengia, e schau menar si nuegls e clavaus cul material da quella respectabla antiquitad.

Nova Gasetta Romontscha, nr. 17, ils 25 d'avrel 1862

Ina nova lingia per Rueras

... Ils da **Rueras** eran vegni cuntentai tras ina nova lingia e levan perquei schar quels signurs mo als da **Mustér**.

Nova Gasetta Romontscha, nr. 19, ils 9 da matg 1862

Ina vera tragedia a Selva

Gliendisdis eis ei succediu a **Selva** in trest cass. In mat carschiu ch'ei avon entgins onns vegnius menaus anavos ord la **Germania** sco in stuorn, e semussava era a casa beinduras sco tal, schegie ch'el saveva leu luvrar dis ora sco in um da giudezi, ha mazzau siu agen frar – in affon en tgina, ch'el veva tschelluisa il pli bugen da tutz ils auters fargliuns. Suenter haver fatg ora lenna, fa el dar la mumma ina cut per mular la sigir, lu va el en stiva, nua ch'ei era negin perpeis, priu ora in affon en tgina che durmeva. Cun siu uaffen mulau dat el a quel in tribel tagl tral culiez, che quel sto esser morts agradgiu. Il stuorn tuorna lu ora tiella mumma cun ina fatscha pleina suadetsch e di ad ella, ch'ella dueigi i en stiva e mirar co il pop mieri. La mumma va dabot ed ins po cumprender cun tgei dolorus sentiment ch'ella anfla siu carin affon en ina sanganada. Sin siu grir e bargir dat ei neutier glieud, il stuorn vegn ligiaus e serraus en. El lai far quei senza sedustar e sillla damonda, pertgei ch'el hagi commess quei terribel mazzament, rispunda el cun saung freid: „Sinaquei ch'il car frar vegni enta parvis e davanti buc in schliet prè, sco quei che jeu sun.“ Dus umens ein silsuenter vegni cun el a **Mustér** en casa cumin. Schigleiti sco el vesa leu il schendarm di el a quel: „Jeu vess cheu dus umens da schar metter en perschun.“ – Quei deplorabel schabetsch ei in serius avis, ch'ins dueigi haver precauziun cun glieud stuorna. *Cudisch da morts sut il datum dils 5 da matg 1862: Vigeli Venzin, 1 onn, da statalter Giachen Fidel Venzin e Maria Monica Condrau; remarca: necatus a fratre suo fatuo.* Nova Gasetta Romontscha, nr. 19, ils 9 da matg 1862

Alp da cavals

La vischnaunca da Tujetsch pren si la stad 5 cavals jasters sin pastira u alp da cavals. Pella jarva vegn ei pagau 20 frs. per cavagl e lu aunc ina indemnisiatiun pil pustretsch ed auter. Tgi che vul tarmetter cheu cavals, duei schar saver sigl emprem da zercladur.

La suprastonza da Tujetsch

Nova Gasetta Romontscha, nr. 21, ils 25 da matg 1962

Offertas per la via principala

Finalmein ei la via sul **Cuolm d'Ursera** scretta ora cun quella sulla **Bernina**. Quei che vegn baghegiau uonn, ei partiu en duas secziuns, l'emprema dil vitg **Mustér** tochen sils cunfins da quella vischnaunca, ina lunghezia da 6400 meters ni 21 333 peis svizzers. La secunda secziun va dils cunfins da **Tujetsch** tochen en **S. Brida**, dador **Selva**, 6500 meters, ni 21 800 peis. Tochen ils 10 da zercladur ston quels, ch'han tschaffen da surprender da baghegiar quella via dar en lur offertas al signur capoinschigner Salis.

Nova Gasetta Romontscha nr. 22, 29 da matg 1862

Malsogna da tiers

La malsogna bestiala dils peis e dalla bucca ei ussa era rutta ora a **Selva** e perquei ha **Uri** serrau encunter **Tujetsch**, il qual ei in grond donn per l'entira **Cadi** e fa ir en nuot la fiera da **Tujetsch**, nua ch'ei vegneva tschelluisa cumprau si bia tiers dils Tudestgs. ... Cun ina part vegn ei meglier en 4 – 5 dis, cun auters pér en 8 – 10 dis. Las vaccas dattan pauc e schliet latg. Denton eis ei tuttina meglier che la malsogna grasseschi ussa e buca per d'atun.

Nova Gasetta Romontscha nr. 22, ils 13 da zercladur 1862

Interpresas talianas baghegian la via

... l'emprema secziun dalla via sull'**Alpsu**, naven da **Mustér** tochen tiels cunfins da **Tujetsch**, baghegia Leon. Frik da **Cazas** e Giovanni Pattista Ghilmetti dalla **Lombardia**, la secunda secziun, che va tochen **S. Brida** han ils frars Berther da **Tujetsch** e comp. da baghegiar. Gl'uost 1863 dueien quellas duas secziuns esser

finidas. Las lavurs vegnan ad entscheiver aunc quest meins; per direger e survigilar quellas ei signur inschigner Depuozi destinaus.

Nova Gasetta Romontscha nr. 25, 18 da zercladur 1862

La zoppina

La zoppina serasa ora pli e pli ella **Cadi** e grassescha ussa ell'entira **Sursassiala, Mustér, Tujetsch e Medel**. Il mender eis ei per las alps, nua ch'ei deva uonn fetg bia latg.

Nova Gasetta Romontscha nr. 26, ils 27 da zercladur 1862

300 luvrers vid la via nova

Vid la via nova sull'**Alpsu** ein ussa circa 300 luvrers occupai, bunamein tut Taliens. Schigleiti sco quels han udiu da quell'interpresa, ein els dai neutier sin tuts mauns; ins ves'aschia ch'ei maunca nuota luvrers, mo donn ch'ils Romontschs fan pintga concurrenza ed ein ella cumentientscha cullas tschaveraas ed ella perseveronza da luvrar fetg anavos als Tessines e Lombards. Ferton che la via en **Surselva** vegneva ils davos onns baghegiada digl interprendider cun parders e buca tras sutaccordants, han ils impressaris dalla via sull'**Alpsu** dau vi quasi tuttas lavurs en accords. Denter ils sutaccordants eis ei mo ina campignia romontscha.

Nova Gasetta Romontscha nr. 28, 10 da fenadur 1862

Senza medischinas

Ferton ch'ins ha a **Mustér, Tujetsch e Medel** teniu ils tiers malsauns mo schuber e cauld ed applicau pauc ni neginas medischinas per quella malsogna, ha **Sumvitg** aschigleiti che la zoppina ei leu passada si, spert telegraftau pil miedi da biestga a **Glion**. Vedremo la differenza digl effect.

Nova Gasetta Romontscha nr. 29, ils 18 da fenadur 1862

Pauc mèl

Cul mèl alpin, che vegn tschercaus pli e pli fetg, stat ei uonn mal; sez las principales cuntradas da quei dultsch product, **Tujetsch e Medel**, nua che latg e mèl flessegian tschelluisa en abundanza, survegnan uonn zun pauc mèl. La schliat'aura dil zercladur e las purginas dil fenadur han ruinau la biala speronza ch'ins veva aunc il davos dil matg sils aviuls.

Nova Gasetta Romontscha nr. 34, ils 23 d'uost 1862

Vegni menai miserablamein davos la cazzola

(Tarmess en) Las lavurs vid la via nova a **Tujetsch** van spert vinavon ed ein schon avanzadas aschi lunsch, che nus purs pudein era enconuscher tgei figura, che quella nova signura vegni a far. Enstagl aber che quella biala dama fetschi sin nus purs ina emperneivla sensaziun, (*Tedlei tscho. Remarca dalla redacziun.*) sch'eis ella per nus in trest mussament, co nus essan puspei vegni menai miserablamein davos la cazzola. (*Betga la verdad!*) Patertgein nus anavos sur da nossa vischnaunca fatga quest atun davart il surprender l'expropriaziun vid questa via, sch'eis ei vegniu figurau e perdegau, ch'ils praus che mondien vid questa via, sco era las lennas, cuostien pressapauc 15 tochen 20 melli francs, dapli eis ei vegniu segirau als purs, ch'ella mondi ton sco pusseivel per la via vedra ed era atras ils vitgs e cheutras era spargnau bia praus ed auters cuosts dalla vischnaunca. Entras quei ed aunc bia auter figurem havein nus tras il pli dalla vischnaunca surpriu sin nossas costas l'expropriaziun e dar la lenna e crappa leutier. -

Aber co va ei ora ussa? Ei vegn fatg ina via bunamein 8 quartas (*lu han ils da Tujetsch buca aschi liunga detta sco ils Svizzers*) pli lada che quella naven da **Mustér** engiu, ella va per esser biala atras ils megliers funs (*cheu dat ei gie da menar la pli biala grascha ed il pli bia fregt*), enstagl mires vegn ei fatg scarpas sco las pli grondas crinolinas (*quei ei ussa halt la moda, la scarpa ei mai aschi scuada sco ils mires e sa aschia survir per moda-*

schurnal allas finas mattauns da Tujetsch), tras il qual ei vegn priu ina tiarza, sche buc aunc dapli terren. Cuort, scadin vesa, scadin sto palpar, ch'ei vegni zuar fatg ina biala, mo era ina via da luschezia e cheutras mirau memia pauc sin donn dalla vischnaunca. Eis ei aber stau dueivel da dir a nus: Ei vegn aschia, ei va aschia ed ussa tut autruisa. (*Era la via buca schon stigiada, che tut veseva nua ella massi?*). Nua eis ei pusseivel ad ina paupra vischnaunca da pagar in deivet da 30 entochen 40 melli francs (*ils Tuatschins teman buc ils deivets, ed han en sac pli bia marenghins, che quei ch'auters han centims*), sco quei che la via vegn a custar, sche buc aunc dapli. Entras questas gestas lamentaschuns lessen nus mo refrestgentar empau la memoria als nos babs dalla patria (*gliez fa nuet*) e cun quei aunc enzatgei dapli, essend che lur ureglias han udiu e lur lieunga ha plidau. Denton vegn ei matei ad ir cun nus paupers purs sco cun tut quels, che ein enzacuras stai ella falla – els han stuiu mirar co mitschar ord quella ed aschia era nus – leu gida nuota pli schemer e plirar, aunc bia meins smuldir e zachergiar (*Bravo!*), ei muossa a nus, bugen ni nuidis, da patertgar co saver pagar e sur da quella dira nusch lessel era schar sentir mes sentiments mes cars vischins e purs e quei ina autra gada. (*Gliez ben!, gliez plai a nus meglier*)

In sempel pur da **Tujetsch**

Nova Gasetta Romontscha nr. 37, ils 12 da settember 1862

(7) Ils da Tujetsch che han tuts 5 senns vegnan lu a dir: Mai e pli mai desister dalla via

Buns cussegls als Tuatschins d'in sempel pur e la redacziun dalla gasetta publichescha buca ina brev nunsuttascreta e commentescha la malsimpatia dils Tuatschins pertucccont la via nova. - In clavau ed ils tetgs da duas casas barschavan gia. - La zoppina serepeteva cun regularitat e tuccava sil viv ils possessurs da tiers. - Per suenter la curontina astgava il pass puspei vegnir aviarts. - Ils maracdonts da Sursassiala catschan rodund 800 tgaus sul Lucmagn, ils biars da Tujetsch che vevan aunc buca giu la malsogna. - Las nuorsas vanzadas dalla zavrada vegnan publicadas ella gasetta.

La scuidonza e l'engurdientscha - dus schliats vischins

(Tarmess en) Per far si deivets dat ei a nus purs buca grond studi, vein era per ordinari en nies tenercasa pign quitau da sepertgirar da quels, pertgei che nossas femnas han da tuttas sorts basegns, inaga in bi scussal merino, l'autra gada in bi fazalet, lura pézs da seida sin ina schlappa e suren in mantel alla moda pendius vid franzlas, la bucca, sinaquei ch'ella schiri buc, sto ver in bien caffe, ed il nas bein pervesius cun ina presa tubac holender etc. etc. Era nus purs havein sco nossas femnas nossas cusseidas e nos gronds basegns senza basegns per era vuler far sco ils auters e cun quei crescha nies cudisch da quen, sche nus havein in, aber buca sillla posta dil dabien, sunder dil daschliet. Cheu dat ei lura a nus pli grond studi, cheu panzein nus ed entschavein a selamentar sur da disclelgs, sur da schliats onns e carischias, pertgei che nus temin s. Martin cun siu scalin, nus stuein lu patertgar bugen ni nuidis vid il co pagar, pertgei ch'ils cumpars deivets van buc ord stiva mo cun lamentaschuns, sunder vulan marenghins. Aschia stuein nus era far cun nossa signura spusa, la via nova. Nus havein cun ella teniu casa senza quitau ed ussa splunta ella en nossas costas cun 30 – 40'000 frs., co lein nus cuntentar ella?

Vus, mes cars vischins e purs, vegnesses, sche jeu savess a vus mussar ina **California** en **Tujetsch**, nua ch'ei fuss buca mo d'anflar sablun dad aur, mobein bials sitgets marenghins, mo quei, quei per donn sai jeu buca far, ni per vus ni per mei ed aschia tucca ei d'encurir ensemens las miulas d'aur sternidas ora per nies **Tujetsch** entuorn. Gie per grazia da Diu savein nus dir, che nus havessen aunc enqual graun d'aur, sche nus mo vegnessen perina d'encurir ensemens quels. Havessen nus il spért da nos buns vegls, sche anflassen nus era; pertgei che cura che quels havevan da basegns da

daners per basegns generals, sco per exemplu cura ch'ei han cumprau ora la dieschma dalla claustra, sche han els giu priu ord ils interess generals, e zuar senza alienar quels. Els han aschia pagau il deivet ed aunc schau artar nus ils beins generals. Lein pia era setener vid quella regla dils vegls, ed encuirir da pagar il deivet dalla via primarmein culs beins generals.

Fuss ei buca pusseivel, gie buca mo dueivel, mobein aunc gest, da metter sin tuts s.v. tiers che pasculeschan en nossa vischnaunca ina taxa a proporziun da qualitat da tiers. Cheutras pagassen tuts tuttina, reh e pauper il medem; il reh che ha tiers pagass e gudess pastiras ed alps, il pauper pagass pauc e schass guder sia purziun da gudiment, ch'el havess vid pastiras ed alps. Caussa fetg gesta, sch'ins considerescha che alps e pastiras ein beins communals. Vegness ei pia mess si inton per scadin cavagl, che pasculescha en nossa vischnaunca, per scadina vacca, genetscha, stiarls e vadials, sco era cauras, nuorsas e tierscasa, mintgamai suenter proporziun, sche dess quei in bi capital sigl atun da trer en. Era duess ei vegrif fixau in cert temps cu schar ora ils tiers d'armal la primavera, sco per exemplu ils 10 da matg; quel denton, che schass ora avon stuess era pagar in ton per tgau.

Lura sevessen nus era trer in bi avantatg ord nos feins a pastg, nua ch'il **Cuolm Bass** duess vegrif partius giu en sorts suenter fiugs e dau da guder 5 – 6 onns, pagond ina annuala taxa. Era quei fuss buca mo gest, mobein era in remedii encunter bia malveglia, scuidonzas e dispetas. Il **Cuolm Ault** duess denton vegrif gudius sco tochen ussa. Finalmein duessen nus mintga onn metter en aucziun 50 – 60 lenns bein madirai ora ad onn, per ils quals ei vegness senza dubi fatg bials pagaments. Ord quellas fontaunas secrei vies beinmanegiont convischin e pur da trer ora buca mo igl annual tscheins dil deivet dalla via, mobein era aunc in surpli entras il qual ins savess annualmein pagar giu in ton dil capital sez.

Alla fin stuein nus aunc far attents sin nies bien crap scalegl si **Calmut**. Quel ei datier dalla via nova e savess plaunsiu dar ina biala resursa alla vischnaunca. Considerai inaga l'enorma massa crappa che **Mustér** meina ora mintga onn ed il danerun ch'ei tilan en leu. Nus secartein che **Calmut** savessi plaunsiu dar ina pintga **California** per **Tujetsch** e gidar a finir a pagar giu il deivet dalla via nova.

Mettend pia quei en tutta carezia e buna veglia avon a vus, mes cars vischins, per schar reflectar, lessel aunc dar in cusegl duront che vus veis da sedecider da numnadamein sclauder ord vies miez dus fetg schliats vischins, ils quals ein la caschun da bia caneras, dispetas e malveglia e quels dus vischins fussen la *scuidonza* e la *engurdientscha*. Ein quels dus schliats vischins bandischai ord vies miez, sche vegrif ei a reger denter nus pasch, carezia e bien spert per il beinstar communabel! Prendei en pasch per quellaga, in'autraga enzatgei per nossas caffetieras.

In sempel pur.

Nova Gasetta Romontscha nr. 39, ils 26 da settember 1862

Remarca dalla redacziun pertucont ina contribuziun buca suttascretta

Nus essan quels dis vegni honorai cun ina brev d'in Tuatschin che ha buca astgau suttascriver siu num e che manegia ch'il vegl proverbi „donn e gomias van ensemen“ severicheschi cumpleinamein ord il nummer 37 dalla Nova Gasetta Romontscha. Mo co astga **Tujetsch** plidar sul donn caschunaus dalla via nova, sch'ins patratga vid ils gronds avantatgs che quella porta alla vallada. Sch'ins enconuschess buca la pussonza e tschoccadad dils pregiudecis, sche pudessen ins crer, ch'ei seigi nunpusseivel, ch'in sulet Tuatschin astgassi aunc selamentar, cura ch'ins di ad el: Nus fagein a vus ina oreifra via tras vossa biala mo isolada vallada, mettein vus d'ina vart en buna comunicaziun cun **Mustér**, respectiv cugl entir cantun e da l'autra vart cun vos buns vischins digl **Uri**, culs quals vus veis in onn ora in grond traffic, aunc dapli, nus lein sez mantener quella via e cheutras aunc dar fadigia a vossa glieud, vus stueis far nuot auter che dar neu gratis il necessari sulom. Ei quei buc in'offerta, che meritass da bitschar il maun enstagl da grir e smuldir sur quels che

han cussegliau a vus d'acceptar quei grondius schenghetg. Sch'ei ventscher ora la via nova e cura che vus veis empruau ella inaga, lein nus lu dumandar vus: Schei inaga sinceramein, leis turnar a schar ir en il stradun, sche nus turnein a vus ils cuosts per vossa expropriaziun? Ils da **Tujetsch** che han tuts 5 senns vegnan lu a dir: Mai e pli mai; il diember dils suords e tschocs vegn ad esser pigns. Per far ver la malraschuneivladad da tals pregiudecis lein nus aunc allegar ina anecdota. Nus vein dacuort entupau a **Medel** in marcadont tuatschin cun sia biestga da fiera, in dils capoadversaris dalla via nova. Vgnend vitier el, ei stau siu emprem salid, ch'el ha smuldiu sullas schliatas vias da **Medel**. Nus vein pudiu rir e detg: „En **Tujetsch** smuldis vus sulla buna via e cheu sullas schliatas vias.“ Mo nies bien um veva raschun da zachergiar sullas schliatas vias, pertgei cu la via nova, sull'**Alpsu** ei fatga, sche sa quei marcadont far dus cuolms en in di cun sia biestga, l'**Alpsu** ed il **Gottard**. Avunda per glieud raschuneivla; culs malraschuneivels e malcuntents ston ins haver pazienzia, tochen ch'els san inaga palpar lur avantatgs.

Nova Gasetta Romontscha nr. 39, ils 26 da settember 1862

Notizias sul commers da biestga

Ils marcadonts dalla **Cadi** han aunc cumprau si dabia biestga e pagau biebein, per vadials entuorn 4 marenghins in e per mutgs 6 – 7 marenghins. Questa jamna ein ils marcadonts da **Sursassiala** i cun lur biestga sul **Lucmagn**, en tut circa 7 – 800 tgaus, la flur da quella formavan ils mutgs da **Tujetsch**, che han aunc buca giu la malsogna. La fiera da **Mustér** ei per denton vegnida refretga sigl october, nua che las serradas pervia dalla malsogna tschessan speranza e vegnan cullas bunas novas da **Ligiaun** a dar pli gronda impurtonza e vivacitad alla fiera da **Mustér**, che veva quels onns da muntar pauc, essend ch'ei era cheu negins marcadonts da fiera pli.

Nova Gasetta Romontscha nr. 39, ils 26 da settember 1862

Barschament d'in clavau a Sedrun

El vitg **Sedrun** eis ei ussen sonda barschau giu in clavau; gia eran ils tetgs da duas casas pigliai fiug, mo ils umens da leu ed ils numerus luuvers dalla via, ch'ein spert dai neutier, han pudiu far resistenza al serasar dil fiug ed aschia prevegnir ad ina terribla sventira. Per sanadeivla admoniziun da geniturs remarchein nus, ch'il fiug seigi ruts ora entras affons, che fagevan tremagls cun zulprins.

Nova Gasetta Romontscha nr. 40, ils 9 d'october 1862

Puspei arver il pass

Questa jamna eis ei puspei vegniu fatg pass per far arver il **Cuolm d'Ursera** ed ins ha speranza che la serrada vegni a calar si aschigleiti sco las vischnauncas dalla **Cadi** han varghentau la curontina.

Nova Gasetta Romontscha nr. 41, ils 10 d'october 1862

Tiers jasters a Tujetsch

Suenter la zavrada fuva ei usit che nuorsas jastras vegnevan publicadas cun l'indicaziun dalla noda ellas ureglia Gasetta Romontscha.

1. In barbaisch ner (tschanc) cun corna che ha ell'ureglia dretga tagliau giu da sum, ina furcletta davon en, ed in snez davos en.

2. In tschut gagl, ureglia dretga onsum ina furcletta ed in snez davos en.

3. Ina tgigisch alva (nuorsa d'in onn che ha aunc buca fatg tschut), ureglia dretga in mugrin davon en ed ella senistra giu dasum e fess.

Ils proprietaris da quellas san en termin da 10 dis retrer ellas tier

Duri Wenzin, gerau

Nova Gasetta Romontscha nr. 41, ils 10 d'october 1862

La malsogna dils peis e dalla bucca

denter il s.h. muvel ha gia cugl uost giu sia fin ellas vischnauncas da **Medel**, **Tujetsch** e **Mustér**, essend che da quei temps naven han negins tiers pigliau la malsogna, quei ch'era aunc buca saun, era mo consequenzas dalla malsogna. Aschia han quellas vischnauncas finiu la curontina avon ils 20 da settember. ...
Nova Gasetta Romontscha nr. 43, ils 14 d'october 1862

(8) Nossa glieud han halt buca la premura e perseveronza da fadigar sco ils Taliens.

Ins veseva duront la lavur mai a fimond tubac ils luvrers taliens, bein aber ils romontschs. - Essend serrau tutta communicaziun han ils da Selva stuiu salvar si plirs dis ina bara en baselgia. – Il schaner 1863 cun bia malsauns. – Anflau il fevrer quater nuorsas en Curnera. – Fundau igl onn 1847 treis scolas cun in fondo da 3400 frs.

La via sull'Alpsu

ei schon uonn en sia construcziun s'avanzada buca mal. Vid las duas secziuns pridas a mauns en ina lunghezia da circa 13 000 m da **Mustér** tochen **S.Brida**, pon ins dir che varga la mesedad dalla lavur seigi fatga, cunzun sil territori da **Mustér**; entirs tocs via ein fini diltut. Tenor tuts aspects selai ei spitgar che sigl uost 1864 seigi la via ventschida sin nies territori, sco igl ei fixau dalla Confederaziun. In'autra damonda eisi denton, schebein **Uri**, che ha aunc ussa fatg nuot ed ha tier quei da baghegiar la via da **Flüela** a **Brunnen** e sulla **Furca**, seigi sin lu era sin siu territori alla fin culla via sull'**Alpsu**, duess quei buca esser il cass, sche vegn il cantun **Grischun** bein ad haver regress tiella Confederaziun, per far pagar ella in ton tscheins pils daners applicai vid la via, entochen che **Uri** ha finiu siu toc via. Tschelluisa vess nies cantun in schliet engraziament per sia gronda premura e stenta el catschar vinavon las lavurs per vegnir suenter allas ordinaziuns dallas autoritads federalas.

Las lavurs vid la via ein ussa caladas si ed ils luvrers sbrigai. Il maximum dil diember dils luvrers ei stau circa 420, en quei 60 Romontschs. Ins ha danovamein saviu seperschuader, che senza agid dils Taliens savessen nus mo cun nossa glieud buca baghegiar vias. Buca per nuot sesanflan en nies cantun ina aschi gronda quantitatad luvrers jasters, vid vias circa 1000, parders (sitgurs) 100, fumegls e fumitgasas 700, brischacotgla 380, luvrers da lenna 360, pasturs 350, melli mistergners, insumma en tut circa 7000 luvrers jasters.

Nossa glieud han halt buca la premura e perseveronza da fadigar sco ils Taliens; mo ils davos ein era buca aschi custeivals el viver e sevestgir. Sch'ins considerescha il sempel cuost da quels activs luvrers taliens, che magliavan la damaun in toc paun, da miezdi ina pulenta cun empau caschiel e la sera mo ina minestra, sche pon ins bein dir, ch'il magliar bia seigi in ton mo disa. –

Caracteristic eis ei era ch'ins veseva duront la lavur mai a fimond tubac ils luvrers taliens, bein aber ils romontschs. – Sch'ils umens romontschs han buca fatg stretg cun lur lavurs vid la via nova, sch'eis ei era buca da far curvien, che las femnas han nuota vuliu saver da quellas. Ferton ch'ins veseva vid la viafier roschada luvreras, han ins viu mo ina vid la via dall'**Alpsu**; mo quei era ina ton pli activa che luvrava stediamein ed en tutta aura per sustener ses vegls geniturs. – Malgrad il grond diember da luvrers ha ei dau neginas sventiras, priu ora in che ha fatg mal in egl cun sittar crappa.

Sche la primavera ei biala, sco ina part vulan comprender ord il bi atun, sche vegnan ils interprendiders gl'avrel puspei a schar entscheiver cullas lavurs per finir ellas il zercladur sil territori da **Mustér**. La principala lavur ei lu las 7 punts, il fundament

dallas qualas ei per part schon mess. Nus vein giu relatau, ch'il departement militar a **Berna** hagi ordinau ch'ei duei vegrir construiu cumahs da puorla tier quellas punts, per en cass da basegns siglentar ellas ell'aria ed impedir il pass agl inimitg. Mo silla inspecziun fatga quest october digl expert federal vegrnan ins a desister da quels cumahs da puorla, essend che per siglentar quellas punts pudess gl'inimitg aunc adina maneivlamein passar las respectivas auas. Ils avdonts da quellas punts pon aschia durmir ton pli ruasseivlamein. Plidond digl expert federal, remarchein nus aunc posteriuramein, ch'el hagi schau plascher zun pauc, che la cumissiun dil stan hagi saviu concluder dad el vitg da **Mustér** ir naven mo cun ina casa e far ina aschi macorta stretga storta. Denton savess quei tut vegrir midau ed embelliu, sche quei signur expert procurass per in credit supplementar, ils quals ein tschelluisa fetg en moda tier nossas autoritads federalas. Daventa quei buc, sche stat ei tiel conclus dalla cumissiun dil stan, che ha custau alla vischnaunca 956 frs.

Tuts ils jasters ch'ein uonn passai sull'**Alpsu** han declarau, che quei pass vegrni a vegrir frequentaus tut autruisa dils viandonts inaga che la via seigi finida. Mo ei vegr aunc a semussar auters avantatgs, cunzun per **Tujetsch**; en scadin cass san ins pretender, ch'ils funs, tras ils quals la via nova va, seigien schon ussa tenor las damondas dils proprietaris carschidas bia en valeta.

Artechel en nr. 45, ils 8 da november 1862

Da Tujetsch 150 pors sur Cuera ad Altdorf

Finalmein ha il cantun **Uri** tenor in telegram arrivaus a **Mustér** aviert il **Cuolm d'Ursera**, mo ils pors tuatschins vevan schon anflau ina via egl **Uri** senza passar il **Cuolm d'Ursera**. Schon avon 15 dis era ei las tunas ch'ei vegnessi aviert e sin quei han marcadonts uranès e tuatschins giu cumprau si en **Tujetsch** circa 150 pors. Quels ein lu avon entgins dis marschai pella **Surselva** giu, han priu a **Cuera** la viafier tochen **Lucerna** e vegrnan ussa ad haver passau il lag ed esser debarcái a **Flüela** e serendi ella capitala **Altdorf** per far giu pil nas alla regenza. L'avertura dall'**Alpsu** vegr denton ad alzar ils prezis dils tiers casa ella **Cadi**, sils quals ils Uranès spitgavan fetg vess.

Nova Gasetta Romontscha nr. 47, ils 21 da november 1862

Il „selvadis“

La stad s. Martin para da seprolunghir. Priu ora ils selvadis **Tujetsch** e **Medel** eis ei en **Surselva** tochen si encounter la regiun alpina bi schetg terrein ...

Nova Gasetta Romontscha nr. 49, ils 5 da december 1862

Pors en perschun

Posteriuramein remarchein nus aunc ch'ei seigi buca iu bein culla gronda roscha s.h. pors che seigi per far giu pil nas alla regenza d'**Uri**, che leva mai arver il **Cuolm d'Ursera**, ida dalla **Surselva** giu, priu a **Cuera** la viafier tochen **Lucerna** e da leu navigada vi egl **Uri**. Ad **Altdorf** – la veglia residenza da Gessler – ei l'entira roscha vegrnida messa en perschun per 8 dis; ils perschuniers ein sinquei vegrni vendi cun ina gronda sperdita; ils cumpraders han lu dau buns plaids als signurs d'**Altdorf** e quels han suenter 3 dis dau amnestia als s.h. tierscasa. – Cun in'autra roscha da quels tschins instradada egl **Uri** sul **Cuolm d'Ursera**, che ha suenter gronds strapazs piars 10 tgaus sil cuolm, eis ei era vegrniu fatg pign profit, ed aschia eis ei da capir ch'il traffic da pors rauissa empau ella **Cadi**. Mo ton pli tschercai ein ils vadials giuvens; pils mas-chels grad naschi vegr ei pagau 30 frs.

Nova Gasetta Romontscha nr. 50, ils 11 da december 1862

Vadials ventschan

... Era denter il s.h. muvel para ei da buca reger la dretga sanadad, ella **Cadi**

ventschan bia vadials giuvens, mo il vitg da **Camischolas** ha piars uonn circa 15 da quels.

Nova Gasetta Romontscha nr. 2, 10 da schaner 1863

Lavina a Selva

Era a **Selva** eis ei vegniu giu la lavina ed ha priu dus clavaus; en in, nua ch'ei era en animals, ha ella per ventira mo splanau surora il clavau e schanegiau il nuegl. Essend serrau giu tutta communicaziun han ils da **Selva** stuiu salvar si plirs dis ina bara en baselgia.

Nova Gasetta Romontscha nr. 3, 17 da schaner 1863

Quater baras e biars malsauns

En **Tujetsch** era ei gievgia 4 baras e plirs malmalsauns. *Numnadamein: Onna Maria Scolastica Monn, Surrein, 77 onns; Cresenzia Riedi, Selva, 39 onns; Barclamiu Geronimo, Selva, 1 onn; Onna Maria Peder, Selva, 1 onn.*

Nova Gasetta Romontscha nr. 5, 31 da schaner 1863

Remarcabladad

Sco remarcabladad ed emprova dalla veta dallas nuorsas, relatein nus ch'ei seigi miez fevrer vegniu anflau ell'alp **Curnera** a **Tujetsch** quater nuorsas. Malgrad la gronda nevada e las cuflas, ch'ellas han stuiu star ora quest unviern sesanflan ellas en bien stan, e muort la liunga launa semeglian ellas gest quater uors pigns, vegn ei scret a nus.

Nova Gasetta Romontscha nr. 9 ils 28 da fevrer 1863

Ils fondos da scola ella Surselva catolica Vischnaunca da Tujetsch cun 3 scolas

Igl onn 1847 ha la vischnaunca fundau tras arvers ellas alps e fein a pastg	3400 frs.
Premi cantunal pella sura fundaziun	680 frs.
Priu cun lubientscha episcopala ord la facultad dallas capluttas, capitals, che vegnan aunc administrai dils respectivs ugaus da quels	6596 frs.
Premi cantunal per 3 casas da scola, a Sedrun ,	
Rueras e Cavorgia	425 frs.
(Camischolas ha ussa era sia atgna casa da scola ed a Selva vegn uonn medemamein baghegiau ina.)	
La caplania da Sedrun paga annual alla scola 51 frs. che representa in capital da	1020 frs.
En bonis dalla scola ha il ludeivel obercheit resignau Sin ina annuala usitada gastaria tiel signur plevon, persuenter paga quel annuala alla scola 11. 90 frs. che representa in capital da	238 frs.
Igl onn 1863, schaner, purtava aschia l'entira facultad	12 279 frs.

Ultra da quei fondo general ha il vischninati da **Camischolas** e **Zarcuns** mess ina entschatta tier in fondo per lur atgna scola tras ina voluntaria collecta, che ha purtau en 393.63 frs.

Nova Gasetta Romontscha nr. 11, 12 da mars 1863

(9) In memorial pella Cadi ord l'uiara dils Franzos

Tras in buntadeivel maun ei a nus vegniu comunicau ord igl archiv da **Tujetsch**

sequenta scartira:

Cuorta memoria tgei nies ludeivel cumin dalla **Cadi** hagi pitiu entras la uaira ed entras las potenzas, ton Keisers, Russers e Franzos igl onn 1799, ton cun engular, barschar ed auters donns generals da tuttas sorts etc., sco era tut il furniu, il qual suonda primarmein specificadamein en numer e suenter fatg en pagament, tut en sia valor e buc alterau il prezi.

Furniu

Quantum	flurins e kr.
1'160 centners fein	2'320.04
258 vaccas	23'220.00
66 tgaus tiers manedels	396.00
139'323 quatiers	6956.05
15'000 pauns	3'000.00
660 crenas pischada	330.00
13'023 crenas caschiel	2'472.48
940 crenas carn	470.04
5'326 stèra truffels	5'681.00
142 stèra graun	568.00
vin e vinars	623.00
autras expensas ch'il cumin ha giu per speias, landsturm, Kriegsrath, express etc.	17'000.00
Porta flurins e krizzers	63'037.01

Suonda igl engulau

184 vaccas	16'560.00
2'297 tgaus tiers manedels	13'782.00
15'000 pauns	3'000.00
80'400 crenas pischada	40'050.00
20'000 crenas caschiel	1'333.20
28'000 crenas carn	14'000.00
12'000 stèra truffels	12'080.00
10'000 centners fein	25'000.00
12'068 stèra graun mobilias per barschau per donns generals	18'272.00 10'800.00 668,243.00 6'000.00
per muniziu als Franzos purtau sur cuolm 12 000 buordis	5'780.00
menau fuor 5000 vaultas	8'000.00
daner blut cumpigliau vin e vinars	5'000.00
dau contribuziun als Franzos	3'000.00
32 caval per	23'000.00
Summa totala	6'000.00

Tujetsch, ils 14 da fevrer 1800

Da mei Ulrich Battesta Monn, mp. p. gerau

Nova Gasetta Romontscha nr. 12, 19 da mars

Biala vegliadetgna

A **Tujetsch** ei miert tschella jamna in um da 91 onn. *Statalter Gion Andriu Berther,*

Camischolas, fegl da statalter Andreas Berther e Margarita Caschalk.
Nova Gasetta Romontscha nr. 13, 27 da mars 1863

Bia neiv

A **Medel** e **Tujetsch** ei aunc 6 quartas neiv els plauns, a **Mustér** 3 ed els cuolms 12 quartas, aschia ch'ei vegn uonn buca d'ir baul a cuolm, schegie ch'ei semuossa els bia loghens scartezia da fein.

Nova Gasetta Romontscha nr. 13, 27 da mars 1863

Brevs per l'America

Il suttascret ha giu empermess da clamar en plirs loghens avon che turnar ell'**America**, mo stuend el da gleiti semetter sin viadi, fa el cheutras da saver a tuts enconuschents, che han da surdar brevs ni commissiuns per l'**America** da schar vegnir tier quellas sin Pastgas a **Tujetsch** a signur gerau Gion Andriu Berther, a **Mustér** all'ustria dalla Cruna, a **Sumvitg** a signur bannerherr Cajacob, a **Glion** all'ustria digl Oberalp ed a **Cuera** a bundsveibel Berther. Prendend comiau dalla **Surselva** offerescha cun quella caschun a tuts enconuschents siu cordial salid.

Tujetsch, 26 da mars 1863

J. Gieriet

Nova Gasetta Romontscha nr. 13, 27 da mars 1863

Clamau ora tschun pera nozzas

La via nova para schon ussa da promover la communicaziun ed il commers denter la glieud a **Tujetsch**. Ils firaus Pastgas eis ei vegniu clamau ora 5 pera nozzas en inaga – enzatgei mai s'udiu en quella val, nau che latg e mèl flessegia en abundonza. En tut quellas sontgas allianzas ein vegnidas serradas giu cun bien giudezi, essend che tuttas 5 spusas dumbran intrasglaute 35 onns. Salit e liunga veta a quels ventireivels. *Ils 5 pérs: Gion Antoni Beer e Maria Turtè Monn, Camischolas; Giachen Antoni Berther e Naria Barbara Catrina Beer, Gonda; Giachen Adalgott Monn e Rosina Monn, Rueras; Gion Giachen Caduff e Maria Barbara Monn, Rueras; Nicolaus Thomas Deflorin e Maria Dominica Monn, Rueras; tuts sur 30 onns!*

Nova Gasetta Romontscha nr. 15, 11 d'avrel 1863

Tujetsch ha quellaga giu cletg

Finalmein ha il ludeivel Cussegl Pign relaschau sia sentenzia da castitg allas vischnauncas dalla **Cadi** che han quest atun tiella malsogna dalla bucca e dils peis buca observau sco s'auda gl'uorden sanitairic ... **Medel**, **Tujetsch** e **Schlans** ein mitschai senza castitg.

1863

Entschatta dallas lavurs

Las lavurs vid la via dall'**Alpsu** han puspei entschiet en **Tujetsch**; a **Mustér** vegn ei per il matg dau sia entschatta.

Nova Gasetta Romontscha nr. 17, 24 d'avrel 1863

Paun zart

fatg alla moda talianera san ins da tut temps cumprar tier Felix Huonder a **Segnas** (**Mustér**) e tier Vigieli Mon a **Sedrun**.

Nova Gasetta Romontscha nr. 19, 8 da matg, nr. 21, 22 da matg 1863

Tresta nova!

A **Tujetsch**, **Zarcuns** ei puspei rut ora la malsogna dalla bucca e dils peis. En consequenza da quei ei la vischnaunca da **Tujetsch** serrada giu.

Nova Gasetta Romontscha nr. 21, 22 da matg 1863

Zoppina

La zoppina en **Tujetsch** para da buca serasar pli lunsch, aunc ussa eis ella rutta ora mo en in nuegl a **Zarcuns**, ch'ei serraus giu da tutta communicaziun cun auters tiers. **Uri** ha serrauf ferm encounter il **Grischun** e quei ei ina mala pella proxima fiera da **Trun** e da **Tujetsch**, nua ch'ils Tudestgs vegnevan neu e cumpravan si ina massa cauras e da bia vaccas.

Nova Gasetta Romontscha nr. 22, 29 da matg 1863

Alp da cavals

Cheutras vegn ei fatg da saver ch'ei vegni priu si ella alp da cavals a **Tujetsch** 10 cavals jasters per in arvè da 20 frs. Igl ei da remarcar che en quella alp seigi ei era in grond e bi cavagl maschal per cavallas, ch'ins vul schar curclar; per quei e pli pustretsch vegn ei lu da pagar circa 5 frs. Ina cavalla cun pulein paga mo per in cavagl. Ils 8 da zercladur vegnan ils cavals pri si. Ulteriur sclariment dat

Giusep Antoni Mucli, gerau

Nova Gasetta Romontscha nr. 22, 29 da matg 1863

Zoppina sederasa

La zoppina en **Tujetsch** – ch'era gl'emprem rutta ora mo en in nuegl e sco ei vegn pretendiu cun dar als tiers flucs stai anavos onn dallas vaccas malsaunas, serasa nunspitgadamein pli fetg. Els cuolms ni mises ein plirs muvels infectai ed essend che varga la mesedad dils armauls en **Tujetsch** han onn buca giu la malsogna, sche desiderassen ils Tuatschiners che tuts quels survegnessen ella ton pli spert.

Nova Gasetta Romontscha nr. 24, 12 da zercladur 1863

Stradun

La davosa secziun dalla via sulla **Alpsu**, da **S. Brida** tochen si tiels cunfins uranes ei surdada da baghegiar a signur Plattner da **Cuera**, che ha construiu la via da **Trun** tochen **Mustér**. Finalmein han era ils Uranès dau ina entschatta culla via da lur maun. (8100 meters liunga)

Nova Gasetta Romontscha nr. 25, 19 da zercladur 1863

Fiera

La fiera da **Tujetsch** ch'ei muort la zoppina vegnida tenida uonn a **Mustér**, eis ei vegniu catschau bia cauras, mo paucs e schliatsarmauls. Ils prezis vegnevan teni ault e perquei eis ei vegniu marcadau pauc, schegie ch'ei era dabia glieud. Ils numerus cavals pri si uonn en **Surselva** dils Uarnès a tscheins, ein puspei vegni pagai ualti bein.

Nova Gasetta Romontscha nr. 25, 19 da zercladur 1863

(10) Il stupent mèl da ses aviuls ei tiell'exposiziun agricolana a Paris vegnius premiaus cun ina medaglia d'argien.

Ina vacca stauscha in buob ell'aua dil Rein. – En discussiun stat ina transversala viafierila atras Tujetsch. - Nus vein cumpignau bia trestas baras, mo aunc mai ina da schi gronda e generala tristezia e condolenza, da schi profunda impressiun sco questa digl aultreveriu signur plevon Joseph Antoni Durgiai. – La malsogna dalla zoppina mudregia danovamein il puresser.

En **Tujetsch** ei sonda vargada, ils 20 da zercladur, succedi ina sventira. In buobet da 9 onns, **Casper Giusep Antoni Muggli**, che mava cun duas vaccas sulla punt da **Rueras** vi, ha tras ina da quellas survegniu in stausch, ch'el ei daus giu ell'aua. Spert ein curri neutier glieud, mo per sut **Sedrun** giu eis ei reussiu da trer igl affon miert ord il **Rein**. Ei era in affon d'admirabels dunns, sia spiritusa sorella dad endisch onns funcziunescha sco telegrafista a **Mustér** - dus orfans dil defunct secretari guovernativ Mucli.

Nova Gasetta Romontscha nr. 26, 26 da zercladur

1863

... Per unir las respectivas tendenzas dalla **Svizra Centrala** cun quellas dalla **Svizra Orientala**, manegia era el (La Nicca) ch'ei seschassi menar la viafier naven dil **Lag da Lucerna** tochen ad **Amsteg**, da leu tras la **Val Maderana** cun in tunnel dad ina ura e mesa sut il **Crizli** ella **Val Mila** tochen tiel venerabel casti de **Putnengia** sper **Rueras**, nua che la viafier da **Cuera** suness cun ella per communablamein formar la viafier sul **Lucmagn**.

Nova Gasetta Romontscha nr. 27, 3 da fenadur

1863

Sillas reclamaziuns fatgas tiel Cussegli federal pervia dil scamond da frequentar la fiera tessinesa a **Quint**, ha quella autoritat rispondiu, ch'il **Tessin** hagi giu raschun da serrar il pass, sch'ei seigi ver, che la zoppina grasseschi en **Tujetsch** sco la regenza grischuna detti sezza tier.

Nova Gasetta Romontscha nr. 29, 17 da fenadur

1863

Annunzia da mort

En profunda dolur e tristeza notifichein nus cheutras al venerabel clerus sursilvan, a tuts parents ed amitgs, ch'ei hagi plaschiu agl Altissim da clamar ord questa veta speronza tier ina megliera nies car sur fegl e frar, igl

Aultreveriu signur Josef Anton Durgiai
plevon a **Tujetsch**

Provedius cun tuts ss. sacraments dils moribunds eis el spartius oz allas 3 dalla damaun suenter ina malsogna da mo 10 dis en ina vegliadetgna da 51 onn. Nus recumandein sia olma alla pia memoria da tut ses parents, amitgs ed enconuschents **Sedrun**, ils 30 da zercladur 1863

Lezi Anton Durgiai, bab

Era en num dallas feglias e dils schienders.

Nova Gasetta Romontscha nr. 31, 31 da fenadur

1863

La sepultura d'in plevon

Sedrun, 1. d'uost 1863.

Giud la aulta tuor cloman tut ils zenns tiella fossa, la baselgia porta malencurada, ed en santeri sesarva ina nova fossa, che para da clamar cun aulta vusch: "Patratga o carstgaun, che tiu tgierp ei formaus ord tiara e vegn puspei a semidar en quella!"

L'entira vischnaunca, ils datier e damaneivel, umens e femnas, giuvens e vegls ein en gronda passadetgna e tristeza serimnai en ed avon casa parochiala – ina numerusa famiglia spirituala, che plira giud la dolorusa sperdita da siu car bab e spiritual.

Cheu compara sia bara pertada da 4 spirituals e 4 geraus ed ornada si cun flurs e ghirlandas. Quei trest aspect rumpa il cor als parochians, dapertut flessegian larmas, biars lamentan e bragian. Sut il melanconic, mo edificont cant d'in numerus clerus,

vegn la bara pertada entuorn baselgia e tschentada sco unfrenda dalla mort avon gl'altar, leu nua ch'il pietus defunct veva sco secund mediatur denter Dieus ed ils fideivels purtau bia dis ed onns agl Altissim la pli aulta unfrenda ed a quel la pli plascheivla. Ei vegn intonau gl'uffeci da morts; las imposantas melodias dil Benedictus e Miserere muentan bia cors tier novas larmas.

En solemna tgeuadad cumpara lu in jester predicatur sillla scantschala orfanila. Igl ei buca pli il vegl pastur, che schava cheu resonar sia migeivla vusch per instruir, admonir ed edificar sias caras nuorsas; na igl ei igl aultreveriu decan dil venerabel Capetel Grond, che ha oz la tresta da surdar al stgir ravugl dalla tiara in dils pli stimai e premurai confrars. Cun eloquenza faviala sclarescha el si igl operar e l'imporzonza d'in bien plevon; el fa ver ora, ch'il defunct eri in amitg dils affons, pella giuventetgna in aunghel Rafael sin viadi cun Tobias, in tgamun pils maridai, in miedi pils malsauns e la consolazion dils moribunds. El consolescha la deprimida pleiv, animescha da tener il defunct en buna memoria cun era dacheudenvi suandar sias sontgas ductrinas e siu bien exempl, ed agurescha ad ella ladinamein in vengonz successur ella piazza dil defunct. En suffragi per quel vegn ei silsuenter celebrau il pli ault sacrifici – la sontga messa. L'impressiun da quella vegn aunc engrondida tras il commuentond cant dil maiestus Requeim e Dies ire dies illa.

Finalmein vegn la bara pertada ord baselgia tiella fossa sut il sun dalla orgla ed il cant coral, che vegnan gl'emprem accumpaignai mo bingleiti totalmein interruts dil plirar e bargir dall'entira pleiv. Nus vein cumpignau bia trestas baras, mo aunc mai ina da schi gronda e generala tristezia e condolenza, da schi profunda impressiun sco questa digl aultreveriu signur plevon Joseph Antoni Durgiai. Cheu han ins sillla megliera moda saviu seperschuader tgei spiritual ch'el seigi staus e tgei ch'in vengonz plevon hagi da muntar.

Il defunct ei naschius a **Mustér** il fevrer 1812 e tratgs si el ravugl d'ina pietusa famiglia ... Gl'onn 1846 vegn el numnaus plevon da **Tujetsch** sco successur digl erudit decan Hitz, ed anfla cheu ina nova e pli extensiva sfera d'operaziun. Muort sia edificonta pietad, sia exemplarica conduit, sia ludeivla premura per tuttas bunas caussas, muort siu real e sincer caracter, sia cordialitat e bien humor, era el generalmein stimaus e carezaus. Tut steva haver bugen el e perquei veva el negins inimitgs.

El era buca mo in premurau pastur dallas olmas, mobein era in amitg dil ver sclariment e progress. Perdetga da quei dat il considerabel fondo da scola e las treis casas da scola che ein vegnidus si sut siu presidi dil cussegl da scola. Setractond schebein ils vischins da **Tujetsch** veglien acceptar l'offerida via sull'**Alpsu**, ha el sin publica vischnaunca recumandau da prender si ella e mess avon ils avantatgs, che quella porschi. L'expropriaziun dils funs dattan presentamein empau da far alla vischnaunca, mo nus essan perschuadi, che en paucs onns vegnien leu tuts ad esser bein cuntas culla via nova. Il grondius rempar e la punt da **Sedrun** formeschan schon ussa ina ferma ustonza per la baselgia e santeri, vivon pereclitai dalla furia dil nausch **Drun**. El ha era sedau gronda breigia da liberar ils vischins da **Selva** orasut il prighel da lavina cun instradar lur translocaziun a **Novaselva** tras baghegiar si leu ina nova baselgia e casa da caplania. Pil pauperesser eis el principalmein sefatgs meriteivels cun gidar els tiella cultivaziun d'in toc pastira, vesend che la megliera almosna seigi da procurar ad els lavour e fadigia. Insumma tuttas bunas ideas che semanifestaven per ameglieraziun en fatgs communals, anflavan tier el susteniment entras plaid e cussegl. El era dasperas in grond amatur da biala lectura e senuspeva buca giud sias considerablas annualas expensas per quella. In da ses principals divertiments era l'apicultura, el capeva quella e veva bien cletg, aschia ch'el ha schau anavos 50 schaumas aviuls. Il stupent mèl da ses aviuls ei tiell'exposiziun agricolana a Paris vegnius premiaus cun ina medaglia d'argien.

Varga 17 onns ha il defunct operaui cun tut laud sco plevon a **Tujetsch** ed acquistau la stema ed affecziun da tut ses parochians. ...

Nova Gasetta Romontscha nr. 32, 7 d'uost

1863

Dacuort ha la vischnaunca da **Tujetsch** vendiu ora entgina lenna a ses vischins, che han pagau persuenter bials prezis, gie per in pèr lenns eis ei vegniu dau varga 40 frs. in. Cheu para ei ch'ins sappi stimar la lenna e trer ordlunder in grond profit pella vischnaunca, buca sco en bia auters loghens, nua ch'ei vegn ultra dallas sorts communalas aunc cuntuadamein dau ora lenna a privats per pauc ni mo per cagnas. Nus vein repetidamein fatg attents, che sch'ins vegli far spargnar lenna e cultivar ils declinonts uauls, sche seigi ei il meglier mettel da schar pagar biebein per tutta lenna che vegn dada ora a parti.

Nova Gasetta Romontscha nr. 32, 7 d'uost

1863

La malsogna animalica dalla bucca e dils peis ei ussa totalmein svanida en **Tujetsch**. **Medel** e **Mustér** han retratg lur custeivlas gardas. ... Essend ella **Cadi** abundonza da s.h. pors, sch'eis ei culla avertura dil pass vegniu catschau ina brava roscha da quels egl **Uri** nua ch'ei eran tschercai.

Nova Gasetta Romontscha nr. 33, 14 d'uost

1863

La vischnaunca da **Tujetsch** ha unitamein legiu ora per plevon igl aultreveriu signur canoni Darms, presentamein plevon a **Breil**.

Nova Gasetta Romontscha nr. 33, 14 d'uost

1863

Nunspitgadamein survegn il vitg **Sedrun** in grond renomé ellas afferas dalla viafier alpina. Nus vein schon menziunau che nies signur colonel La Nicca hagi encuretg d'unir ils interess dalla **Svizra Centrala** e **Svizra Orientala** tras ina viafier naven da **Lucerna** ad **Amsteg** e da leu tras il **Crizli** a **Sedrun** per s'unir a **Tujetsch** culla viafier dil **Lucmagn**. La gasetta da **S.Gagl** porta ussa in artechel titulaus "Ina vusch da reconciliaziun" tras il qual ella recamonda cauldamein la lingia **Lucerna-Sedrun**; quella sligi si il nuv gordonic el present viriveri dalla viafier alpina; per quella lingia duei tut scriver e plidar, mo quella sappi puspei unir las partidas dalla **Svizra**, aschia che nos cars babuns vegnessien aunc en fossa a selegrar lundergiu etc.

Nova Gasetta Romontscha nr. 34, 21 d'uost

(11) Sco ins auda ha ei dau in ferm cumbat, schebein la posta duei ir mo a Sedrun ni tochen Rueras, mo finalmein ha la capitala purtau la victoria.

La via nova ei pils Tuatschins u memia aulta ni memia bassa! – La secunda sezzion dalla via dils cunfins a S.Brida va era encounter la fin. – Descargada pervia dalla nevada dils 22 da settember. – Tujetsch refusa la pasculaziun cumina. – L'emprema processiun da s. Martin a Mustér sin via nova. – La val ha dad alimentar 4884 tiers. – Protesta tuatschina encounter la paga dils scolasts. -

La pli biala cuntrada

Naven da **Mustér** meina in reschniev stradun en la **Val Tujetsch**, la pli biala cuntrada, che jeu hai viu en **Surselva**. Glieud viva sco furmiclas, cun oreifras vuschs silmeins per far canera. Ils discuors, che jeu hai udiu, consistevan per la pli part ord lamentaziuns e lamentaschuns; ina observaziun che jeu hai fatg en l'entira **Surselva**.

Tujetsch selamenta presentamein encunter la via nova, cheu duei esser tscheu memia aulta, leu memia bassa. Quella malcontententscha vegn a svanir aschigleiti sco **Mustér** fa la projectada carrotschada per celebrar festivamein l'avertura dalla via nova.

Cun il Segner ein ils da **Tujetsch** era buca cuntents, principalmein perquei ch'el ha ad els avon cuort temps priu naven lur signur plevon. Sche tuts plevons dalla **Surselva** ein en lur parochians aschi carezai sco signur Giusep Antoni Durgiai per miert, para d'esser staus a **Tujetsch**, sch'ein els fetg ventireivels. Dapresent eis ei buca gronda abundanza da plevons catolics en la **Surselva**, ei maunca tals a **Tujetsch**, a **Trun**, a **Glion** ed a **Val**. Sche quellas pleivs vegnissen provedidas cun spir canonic, sche restass ei en la residenza episcopala grad aunc il necessari diember

Il Grischun nr 35 dils 28 d'uost 1863

Collaudaziun dalla via Mustér – cunfins Tujetsch

Quels dis ei l'emprema secziun dalla via sull'**Alpsu**, numnadamein dil vitg **Mustér** tochen sils cunfins da **Tujetsch** e **Mustér** vegnida collaudada.

La construcziun dalla secunda secziun, ch'ei pli liunga e sestenda tochen **S.Brida**, va ussa era encunter la fin, mo ton pli plaun va ei culla davosa secziun, nua ch'igl impressari ha fatg plaunsiu da vegnir neutier cun bia luvrers ed ei pli tard vegnius impediuss dalla schliata aura. Ils Uranès han catschau vinavon cun tutta forza, aschia ch'els fineschan uonn bunamein l'entira via sil cuolm e ch'il **Grischun** po in auter onn seduvrar da buca restar anavos ad els. – Cun quella caschun remarchein nus ch'igl inserat el Tagblatt hagi tschaffau si nies artechel sull' "estetica e matematica" dalla storta dalla via tral vitg **Mustér** tut autruisa, che quei che nus vein giu maniau. Quel cuntegn neginas malignas reproschas visavi ad emploiai ni autoritads, nus vein mo detg che quella storta prendi ora mal – il qual tut vegn a stuer dar tier. La davosa remarca el respectiv inserat dil Tagblatt sa pia buca vegnir applicada sin nus. Era nossa metafra da schar ir il cavagl e tener il cavester ei vegnida tschaffada si autruisa. Nus vein mo vuliu dir, che cura ch'ins hagi buca temiu da decretar da bia mellis, dueien ins era buca senuspir da decretar enzacons tschiens; nus vein plidau e secret en favur da quella via e secartein ch'ella seigi profiteivla per **Mustér** e cunzun per **Tujetsch**. Nus supplicassen nies signur collega dil Tagblatt da prender notizia da quellas duas remarcas.

Nova Gasetta Romontscha nr. 38, 18 da settember 1863

Fiera da Ligiaun

Schegie che la fiera da **Ligiaun** ei avon esch, sche fan nos marcadonts plaunsiu da cumprar si biestga. In pèr Uranès, che han schon la primavera giu cumprau si ina gronda roscha tiers, ein dacuort vegni sull'**Alpsu** e marcadau enzacons stiarls per bials prezis. Sch'ils marcadonts sedatan buc ora pli fetg, sche ston ins silmeins buca temer ina surcatschada e cheutras ina schliata fiera. Il magistrat da **Ligiaun** ha denton publicau ellas gassetas, ch'ei seigi semtgau leu tut tgei ch'ins sappi garegiar: oreifers pastgs, cumadeivlas stallas, bunas ustrias etc. e zuar tut per in fetg dueivel prezi. Sco ei vegn detg, lessan ils da **Ligiaun**, ch'ils marcadonts setenessen buca si aschi ditg a **Sebiastg Giubiasco** e sin via, mobein fagessen fiera a **Ligiaun** dils 4 – 15 d'october. Nos marcadonts han zuar gronda furtina da semetter sin viadi a **Ligiaun**, mo fan plaunsiu dad ir giu en quei marcau; la megliera fiera fan ei il bia a **Sebiastg**.

Nova Gasetta Romontscha nr. 38, 18 da settember 1863

Avon ils Glarunès

Ils marcadonts da **Tujetsch** e **Medel** che han ils davos dis aunc cumprau si empau stiarls, ein en tut aura passai il cuolm avon ch'ils **Glarunès** ...

Nova Gasetta Romontscha nr. 39, 25 da settember 1863

Nevada ils 22 da settember

Silla stupenta aura dalla jamna vargada eis ei suandau in ton pli macorta questa jamna. Mardis veva l'entira **Surselva** tratg en il vestgiu d'unviern, a **Glion** era ei tonta neiv sco a **Mustér** ed a **Tschamut** buca pli biara che a **Mustér**, mo ad **Ursera** negina neiv, persuenter ha ei cuflau leu mesjamna suentermiezdi. En consequenza da quella neiv han tuttas alps stuiu vegnir descargadas ils 22 d.q.

Nova Gasetta Romontscha nr. 39, 25 da settember 1863

Ils Tuatschins bavarès promovan la marcanzia

Ils Tuatschiners domiciliai en **Baviera** han puspei cumprau si circa 150 vaccas; e zuar il bia armauls da quella colur, stampa e vegliadetgna, che tilan pauc tiels auters marcadonts. Aschia ch'els ein in grond gudogn pella **Surselva**.

Nova Gasetta Romontscha nr. 43, 23 d'october 1863

Refusau la pasculaziun cumina

Ferton che la vischnaunca da **Tujetsch** ha tochen sin duas vuschs unanimamein refusau il pugn da recapitulaziun pervia da dismetter la pasculaziun cumina, ha **Sursaissa** tudestga acceptau quel, aber mo encunter ina ferma minoritad.

Nova Gasetta Romontscha nr. 45, 8 da november 1863

Engulau ni piars?

Damaneivel da **Ligiaun** anfla in marcadont da **Tujetsch** buca pli sia tschenta culs marenghins da marcanzia ed el tschapitschava buca mal per sia tschenta. Per cletg era in auter Tuatschin ius en secret beingleiti suenter el ed anflau leu ses daners.

Nova Gasetta Romontscha nr. 46, 14 da november 1863

Processiun a Mustér

Da s. Martin han ils da **Tujetsch** cun crusch e cafanun benediu en la nova via en optima fuorma. Cun quei ch'els han giu da visitar neginas capluttas o pella via, han els tier lur processiun duvraru in'uretta meins ch'antruras. Sco solit han tut quels, ch'ein stai ina ga ni l'autra ufficials da vischnaunca survegni il gentar en claustra per engrazionta memoria, pils buns survetschs ch'ils da **Tujetsch** han giu prestau all'abbazia en in cumbat cun ses renitents subdits dalla **Val d'Ursera**.

Nova Gasetta Romontscha nr. 46, 14 da november 1863

Protesta encunter la paga dils scolasts

Las vischnauncas da **Mustér**, **Sumvitg**, **Tujetsch** e **Medel**, e sco ins auda era pliras dil district **Glogn**, han concludiu da protestar encunter il conclus dil Cussegli Grond, che perscriva il salari pils scolasts. **Mustér** ha da quellas varts tarmess al Cussegli d'educaziun ina protesta.

Nova Gasetta Romontscha nr. 48, 27 da november 1863

Armauls e pors sull'Alpsu

Sull'**Alpsu** eis ei iu ils davos 15 dis 4 tropz ord la **Cadi**, ils dus lunsch ora ils pli bials eran da **Breil**. - Era ils pors entscheivan ussa a trer sull'**Alpsu**, mo donn ch'igl unviern ei finalmein da s. Leci tenor vegl proverbi semess en sessel e serrau giu ils cuolms.

Nova Gasetta Romontscha nr. 49, 5 da december 1863

Bials prezis

Il marcau da s. Andriu a **Glion** ei stau bia glieud, mo buca ton bia tiers. Il caponegozi ei staus quel dils stiarls; Taliens e marcadonts da **Tujetsch** e **Medel** han cumprau si biars e zuar per pli bials prezis che quei ch'ei vegniu vendiu a **Ligiaun**. ...
Nova Gasetta Romontscha nr. 50, 12 da december 1863

Posta tochen Sedrun

Calonda mars va la posta sursilvana buca pli mo tochen **Mustér**, mobein direct a **Sedrun**, ed in auter onn sull'**Alpsu**. Sco ins auda ha ei dau in ferm cumbat, schebein la posta duei ir mo a **Sedrun** ni tochen **Rueras**, mo finalmein ha la capitala purtau la victoria.

Nova Gasetta Romontscha nr. 6, 5 da fevrer 1864

Statistica dils tiers en Tujetsch

armauls	1131
vaccas / genetschas	477
stiarlas / mugias	240
stiarls	188
cavals	25
cauras	1413
nuorsas	1103
pors	307
Total	4884

Nova Gasetta Romontscha nr.11, 11 da mars 1864

In ferm favugn

Il favugn ha quels dis scadenau ora la neiv taluisa, ch'igl ei ussa en **Surselva** terrein tochen **Mustér** e ch'ins savess, sch'ei fuss buca da temer pli neiv e ferdaglia, schon ussa sillias spundas da **Selva** e **Tschamut** entscheiver cullas lavurs pella via sull'**Alpsu**.

Nova Gasetta Romontscha nr.11, 11 da mars 1864

Vaccas per la Baviera

Il negozi da biestga ei ualti vivs en **Surselva**. Questa jamna ei in Tudestg, che ha varga 100 vaccas ad **Ebersberg** en **Baviera**, staus tochen **Tujetsch** per grondas e vaccas giuvnas che han aunc da far vadi, en tut ha el cumprau si 30 per bials prezis.
Nova Gasetta Romontscha nr.17, 22 d'avrel 1864

(12) Dus postigliuns, in conductur dall'emprema classa, cun ina representaziun dil biro postal e dil telegraf arrivan per l'emprema gada en Tujetsch.

La vischnaunca pren si cavals. - Vendiu ina mugia tumpriva sin d'atun per 277 francs. – La zoppina duei buca impedir il transport da carn frestga. - Il pauper telegraf seigi la cuolpa, ch'il tun detti ussa era giu ellas vals. -

Ei vegn luvrau cun tutta forza

Vid la via nova sull'**Alpsu** vegn ei presentamein luvrau cun tutta forza; sil territori grischun ein circa 400 luvrers ed ei vegn aunc adina novas roschas umens ord l'**Italia**. – La posta sursilvana ei uonn vegnida honorada cun ina nova, gronda biala crotscha, mo sche quella entaupa denter **Tavanasa** e **Zignau** ina menadira da cavals a pèr, sche resca ella da buca puder speras ora. Igl ei in conclus dil Cussegl Grond, che quellas

tendas vias da communicaziun, fatgas all'entschatta pli graschlas, dueien vegnir slargadas, schi gleiti sco il basegns semuossa.

Nova Gasetta Romontscha nr.21, 20 da matg 1864

Alp da cavals

La vischnaunca da **Tujetsch** pren si ad jarva 9 cavals à 17 francs in; in cavagl cun pulein paga aber cun quel 20 frs. Ultra da quei vegn ei aunc da bonificar il pastur. Per quei, sco per ulteriur sclariment, san ins s'adressar tier signur gerau Sep Antoni Mucli a **Sedrun**.

Nova Gasetta Romontscha nr.23, 3 da zercladur 1864

Vaccas e mugias han pagau buns prezis

Sillas fieras sursilvanas dil zercladur, tenidas a **Trun**, **Glion**, **Ursera** e **Tujetsch** ei generalmein buca stau biara e biala biestga, tuttina han las vaccas e mugias pagau andants prezis; sco raritad pella **Cadi** relatein nus, ch'ei seigi la fiera da **Tujetsch** vegniu vendiu ina mugia tumpriva sin d'atun per 277 francs e miez. Las cauras han pagau per miezvia, mo il mender ei iu ad **Ursera** cullas nuorsas dalla **Cadi**, ton pli che plirs marcadonts vevan cumprau si quellas caramein. Il meglier esit han ils cavals giu, che vegnan schai via la stad per tscheins egl **Uri**; igl ei vegniu pagau 8 – 13 marenghins per cavagl; mo ord la frequenza da viandonts, che semuossa schon ussa ad **Ursera**, pon ins concluder, ch'ils ustiers fetschien aunc cun quels lur bien gudogn.

Nova Gasetta Romontscha nr.25, 18 da zercladur 1864

Per l'emprema gada la crotscha atras Tujetsch

Ils 27 da quest ei la crotscha gronda postala da 4 cavals, ornada cun matgs, ida per l'emprema gada a **Tujetsch** cun dus postigliuns, in conductur dall'emprema classa e cun ina representaziun dil biro postal, dil telegraf e dils hotels a **Mustér**. Remarcabel che la crotscha, respectiv ils cavals, levan buca passar l'enconuschenta storta, che meina ord il vitg **Mustér**, mo aunc pli remarcabel che quels herolds che han fatg da saver als Tuatschiners la vegnida d'in niev temps, ein damaneivel dalla classica ruina **de Putnengia** casualmein sentupai cun in tipus dil temps vegl – in vegl diplomat, che ha enamiez nies tschentaner, 1850, cun sias caultschas cuortas, priu cumiau dalla sala dil Cussegl Grond e viva ussa retratgamein en siu eremitasch. Quella sentupada dil temp niev e vegl vess dau caschun tier bein enqual seriusa reflexiun, mo ei era ina legra cumpignia, che ha els hotels da **Tujetsch** schau viver il temps niev ed il vegl e reconciliau las duas rivalas **Sedrun** e **Rueras**.

Nova Gasetta Romontscha nr.27, 1 da fenadur 1864

Buca iu bein

La fiera leventineña da s. Pieder 29 *da zercladur* a **Quint**, che vegn era frequentada da **Medel** e **Tujetsch**, ei buc ida bein e zuar principalmein pellas tunas ch'ei seigi tras nuorsas pigurèras e vaccas talianas rut ora la malsogna ella **Val Blegno** ed ella **Leventina**. Ils aspects pil negozi da biestga ell' munglassen semidar sin d'atun, tschelluisa pudessen las fieras buc ir ton bein.

Nova Gasetta Romontscha nr.27, 1 da fenadur 1864

Il pass vegn serraus

La zoppina ei ussa era rutta ora denter la biestga d'**Ursera** sill'**Alpsu**, aschia che quei pass ei serraus per tiers che vulan vegnir digl **Uri**. Speronza ch'el vegni d'atun puspei aviarts, tschelluisa pudessen sin d'atun bia Sursilvans ir ad **Ursera** e mazzar lur engarschauns, ch'els han tenor il solit tarmess questa stad leu ell'alp. Sut tals aspects vegnan las patrunas da quels s.h. tiers ad esser fetg engrazieivlas alla

regenza, ch'ella ha ussa decretau, che la serrada pervia dalla zoppina duei buc impedir il transport da carn frestga. Speronza ch'ellas veggan a mussar lur renconuschientscha cun far a nos treis caus cantunals in present da treis famus schambuns sursilvans, ch'ein buca mo beinvesi a **Cuera**, mobein perfin ell'**Italia**. Nova Gasetta Romontscha nr.29, 15 da fenadur 1864

Il viadi a pei vegn tier nossa declinada generaziun pli e pli ord moda.

Schegie che la stagion pils viandonts ella **Svizra** alpina ha schon daditg entschiet, sch'ein aunc ussa zun paucs jasters passai atras la **Surselva**. La posta arriva aunc adina il bia vita a **Mustér** e perfin ils conducturs, che han uonn entschiet a far lur tur tochen **Sedrun** enstagl mo a **Glion**, per dar cheutras empau pli gronda splendur alla ruta sursilvana, ein tutteninaga stulli. Ei para, ch'ils jasters veglien refierer da mirar giu la maiestusa **Surselva** entochen in auter onn, che l'**Alpsu** ei aviarta per crotschas. Il viadi a pei, che fuss schi avantagius pil spert e pil tgierp, vegn tier nossa declinada generaziun pli e pli ord moda. Dad in temps, nua ch'ins veseva aunc neginas crinolinas, vegnevan bia damas frestgamein sull'**Alpsu**, armadas cun in fest alpin, mo ussa ei quei ina gronda raritad.

Nova Gasetta Romontscha nr.30, 22 da fenadur 1864

Roscha da 45 camutschs

Uonn pon ils catschadurs da camutschs spitgar ina biala catscha. Ella alp **Nalps** (**Tujetsch**) han ins viu ina roscha da 45 camutschs ed era dad auters mauns audan ins da bialas cumpignias; mo donn ch'ils Tessines pon dar a dies a quellas selvaschinas in meins avon che nos catschadurs.

Nova Gasetta Romontscha nr.33, 12 d'uost 1864

Gievgia, ils 11 d'uost 1864 neveva ei a Tujetsch tochen giu els vitgs

La schitgira digl uost ha catschau vinavon ils érs, mo anavos ein ils risdivs ch'eran serefatgs tras ils temporals dil fenadur. Remarcabla ei stada la midada dalla temperatura denter ils 9 e 10 d'uost. La steppadad da mardis vargau veva alzau il termometer a **Mustér** sin 23 grads, l'auter di era ei aber in suffel, che la glieud schelavan e gievgia damaun neveva ei a **Tujetsch** e **Medel** ella bassa. Per entgins dis san aschia ils avdonts da **Surrein** esser senza tema pervia dil tun. Nus stuein mo mal, che bein enqualin vul aunc adina fierer sil pauper telegraf la cuolpa, ch'il tun detti ussa era giu ellas vals, enstagl mo sils cuolms e sch'in da quels ha detschartamein declarau, che pli da vegl seigi era stau fatg si in da quels telegrafs en **Surselva**, mo ins hagi muort il tun puspei stuiu dismetter el, sche stuein nus declarar, ch'el mondi empau en fanzegna.

Nova Gasetta Romontscha nr.33, 12 d'uost 1864

In cass dublamein tragic

Denter ils luvrers lombards sill'**Alpsu** ei quels dis succedi in cass dublamein trest. Suenter haver buiu bravamein ensemble dumengia vargada a **Rueras**, ha in cert Mainetti, in um rabiau e temius da ses camerats, maltractau la notg sin gassa siu cusrin *Biaggio Cantalupi* taluisa, che quel ha piars la schientscha ed ei l'auter di morts. Tenor la secziun fatga veva el survegniu fridas mortalas el tgau. Il tribunal dalla **Cadi** ha concludiu da surdar il delinquent alla dertgira cantunala e schau transportar el a **Cuera**. A mesavia ha el vuliu fugir dalla giustia humana, mo ha persuenter spert stuiu cumparer avon il suprem tribunal, la divina giustia. Arrivaus a **Glion** la sera dils 16 d.q. han ils schendarms serrau en el en ina combra si ault el Hotel Lucmagn e priu naven ad el la vestgadira, sinaquei ch'el sappi buca fugir. Mo il delinquent ha buca senuspiu da fugir sco sanscullottes, allas 11 dalla notg selai el ord finiastra, duvrond ils batlinis per tretscha, mo in nuv da quels disnua, el dat giu,

scarpa il fildirom dil telegraf e rumpa en il tgau vid in baun crap spella casa. In vischin ha viu quei, fa canera, ils schendarms dattan neutier, cadeinan el miez morts, mo sias plagas eran mortalas, aschia ch'el ei spartius la damaun. Il mazzau ed il sesturniu han in tschuppel petschens affons; la dunna da Mainetti ha aunc dacuort giu scret ad in enconuschent, ch'ei duessien pell'amur dar bein adatg sin siu um, sinaquei che quel fetschi en sia gretta neginas disgrazias.

Nova Gasetta Romontscha nr.34, 19 d'uost 1864

Piars la veta cun siglientar crappa

Denter ils luvrers sill'**Alpsu** ei ils 19 d.q. daventau ina nova sventira; in Tirole's *Casper Alexandri* ha piars la veta cun siglientar crappa. Nunvulend il "schutz" ir suenter haver mess fiug silla puorla, va el vi sul crap en cun in schuaun envidau, mo enaquelle peglia la puorla spert fiug e siglienta um e crap en in'altezia d'ina casa. Il disgraziau era schizun plagaus, ch'el ei morts schi gleiti sco el ei staus purtaus en casa a **Tschamut**. Perfin siu conti en sac era ius tut en tocs. Nova Gasetta Romontscha nr.35, 26 d'uost 1864

Examinaziun dalla lingia viafierila sul Lucmagn

La cumissiun taliana pella viafier ei ils 26 d'uost arrivada a **Mustér** suenter haver fatg quei di in'excursiun ella **Val Sumvitg**, per mirar empau il terren dalla lingia sulla **Greina**. Ils 27 eis ella serendida sil **Lucmagn** tochen **S.Gion** ed ils 28 a **Tujetsch** per considerar con bein ch'ins sappi sviluppar da leu en la lingia dil **Lucmagn**. ... Nova Gasetta Romontscha nr.36, 2 da settember 1864

Victoria

Mustér, ils 7 da settember, allas 3 suentermiezdi. Victoria! Ual quest mument arriva cheu l'emprema crotscha dad **Ursera**. Era en via sull'**Alpsu** ein oz ils signurs inschigniers Cuonz e Depuozi per l'empremagia cun crotscha.
Nova Gasetta Romontscha nr. 36, 2 da settember 1864

(13) Da fieras e la via

Ils davos quater meins digl onn 1864 rapporta la Gasetta Romontscha ord vesta dalla Val Tujetsch mo davart las fieras e la via nova atras la val. Las fieras fuvan decisivas per l'economia della val e la via ha aunc da secumprovar pils Tuatschins.

Ils marcadonts stattan agrad eri

Ferton ch'ils marcadonts da biestga mavan auters onns da quei temps sin tuts mauns a cumprond si tiers, stattan els uonn aunc ussa grad eri. Las schliatas tunas ord l'**Italia**, la zoppina el **Tessin**, la seida fallida, il pauc pavel ell'autla **Italia** dattan pign anim da comprar si stiarlamenta. Nus stuein denton remarcar, ch'il pavel seigi mo fallius ellas muntognas e buc ella bassa sco Taliens han segirau a nus; la reha raccolta da graun ella **Italia** furnescha daners ed empau tiers drova l'**Italia** en scadin cass. Esser precauts ei endreg, mo buca memia temeletgs. Capito, "voi Croaron, che cacciate via la roba col baston?" (sco ils Taliens dian dils marcadonts romontschs). Ils puleins paran denton da pagar bein. A **Tujetsch** eis ei vegniu Tudestgs, che han cumprau si ina roscha puleins da questa primavera per 8 e 9 mareenghins in. Sco ins legia ellas gasettas, ein ils cavals era stai fetg tschercai sillas fieras berneñas. Per cavals giuvens d'in onn e miez seigi ei vegniu pagau 400 – 600 frs. il tgau.
Nova Gasetta Romontscha nr.38, 16 da settember 1864

Il Cussegli Grond lubescha in fiera en Tujetsch

Sco schon enconuschent ha il Cussegli Grond da quest onn, sin giavisch dalla

vischnaunca da **Tujetsch**, concediu a quella ina fiera sin ils 12 d'october, ch'ei a nies manegiar fetg nizeivel, principalmein pella **Cadi**, aber ina remarca fuss forsa adequata da metter el public ariguard quella fiera, per leutras sentir ils meinis dad auters bein manegionts burgheis. ... Ord las sura allegadas raschuns fagessen nus bugen la sequenta remarca sur dalla fiera da **Tujetsch** digl october. Fuss ei buca meglier per il general traffic da biestga da metter quella fiera sin ils 27 ni 28 d'october, aschia amiez temps denter quella da **Trun** e quella da s.Martin a **Mustér**. Ils tiers che fussen cumprai sin las fieras avon fussen mess giu damaun dils marcadonts e lura savessen ei aunc cumprar e dismetter ina gada avon quella da s.Martin. Quei ei nossa idea, nus havein vuliu metter quei el public ed havein speronza che persunas che capeschien quei pli bein, vegnien a schar udir lur meinis sur da quei impurtont fatg.

In pur ella **Cadi**

Nova Gasetta Romontscha nr.39, 23 da settember 1864

Nova crotscha cun tschun cavals

En tutta aura ha la posta fatg dumengia vargada siu tur ad **Ursera** culla nova crotscha per quella rutta e cun 5 cavals, ella ei arrivada leu las 10 dallas sera e la damaun denter las 7 e las 8 eis ella en tutta neiv puspei vegnida a **Mustér**. En 4 uras selai ei tgunschamein far la crotschada da **Mustér** ad **Ursera**, aschia che la posta sa en in di ir cumadeivlamein da **Cuera** ad **Ursera**.

Nova Gasetta Romontscha nr.39, 23 da settember 1864

Collaudaziun dil tschancun via denter Mustér e Sontga Brida

Ils 12 e 13 d.q. ha la collaudaziun federala dalla via sull'**Alpsu** naven da **Mustér** tochen **S.Brida** giu liug tras signur inspectur federal Cuonz ed il signur cusseglier guvernativ Wassali e capoinschignier Salis. El medem temps ha il cantun era collaudau la davosa secziun, la tenda naven da **S. Brida** tochen sils cunfins cantunals spel lag, la quala signur Plattner ha giu surpriu da baghegiar. Mo donn ch'igl ei ariguard la construcziun-su (Oberbau) buca vegniu observau la medema conformitad denter il **Grischun** ed **Uri**, cheutras vegn la pareta dalla via sigl intschess **Grischun** pregiudicada. Il **Grischun** ha baghegiu fetg solid, mo en consideraziun dils gronds cuosts ha el buca vuliu far ella pli luxuriusamein, che quei che la Confederaziun veva perscret. **Uri** encuntercomi ha viu en, ch'el seigi vegnius bein a part culla partizun dil subsidi federal per l'**Alpsu** e sin siu territori era la construcziun ultra da quei buca schi custeivla, cun quei ch'ei era da far neginas punts etc., perquei ha il guvern uranès schau a siu inschignier Diethelm cumpleina libertad e quel ha lu vuliu far semussar ils Uranès renconuscheivels visavi la Confederaziun, cun construir la via pli lada e luxuriusa, che quei che quella veva perscret. **Uri** ha dils 350 000 frs. destinai dalla Ligia pell'**Alpsu** survegniu 150 000 e cun metter vitier mo aunc 30 000 cuviera el tut sias expensas, priu ora l'expropriaziun. Aschia vess il **Grischun** buca riscau bia d'era surprender la construcziun sigl intschess uranès sut las offertas fatgas a siu temps. La muntogna dall'**Alpsu** ha tras la via nova survegniu ina tut pli emperneivla vesta, ella ha piars empau da siu caracter selvadi e la nov'aveina da traffic denter la giganta pezza dil **Badus** e **Crispalt** vegn en paucs onns a purtar ad ella gronda vivacitad cunzun inaga che la via sulla **Furca** ei finida. Schegie scaffidas e battegiada sco straduns militars, lein tuttina sperar che quellas novas vias laschien buca schi spert encorscher lur caracter guerril, mobein survechan per promover il traffic, la beinstonza, la concordia ed uniun denter avdonts dalla **Svizra Centralalpina**.

Nova Gasetta Romontscha nr.42, 14 d'october 1864

Ina genetscha tuatschina ha pagau 17 marenghins

Nos marcadonts, returnai dalla fiera da **Ligiaun**, dattan aunc mendras novas da quella ch'ils Glarunes e zuar per raschun, ch'ils sez vevan bia vaccas, las qualas han pagau bein. Sco raritad remarchein nus, ch'ina genetscha tuatschina hagi pagau 17 marenghins, probabel la pli cara vacca ch'ils Tuatschins han vendiu enzacu. Ils stiarls e mutgs encuntercomi han tratg mal, 12 pulits stiarls ein vegni sgavignai per 6 marenghins il per! In auter marcadont ha dau via 5 mutgs ed in stierl per 23 marenghins, in tierz ha schau ir dus mutgs per 9 marenghins! Aschia eis ei buca da sesmarveglier, che nos marcadonts vulan pagar pauc pils stiarls restai cheu anavos, e che bia purs tscherkan da vender vaccas ed envernar ils stiarls. A **Ligiaun** eis ei aunc restau anavos da quei da melli tgaus, ch'ein vargai ni restan sin l'autra fiera, en tut possi ei esser stau 4 – 5000 arnauls. Ils cavals han buca pagau sco ei vegneva detg, perquei eis ei vegniu turnentau puleins. Il pastg era caraschia e tras quei las expensas pli grondas che ordinari. Cun tut ir mal vess ei aunc saviu ir mender, sch'ei vess muncau la bialaura. Conclusivamein aunc ina remarcia. Sch'igl ei ver, quei ch'in marcadont ha a nus segirau, numnadamein ch'ils mutgs da **Medel** hagien uonn valiu silmeins miez marenghin dapli ch'ils da **Tujetsch** e zuar per raschun, ch'ils emprems hagien giu sust las ruhas dil settember, ferton che quels da **Tujetsch** hagien stuiu star ordavier, sche duess quella circumstanza esser ina buna stimulaziun per ranschar suschnas ellas alps.

Nova Gasetta Romontscha nr.42, 14 d'october 1864

La fiera da Tujetsch ha muentau pauc

La nova fiera da **Tujetsch** ha giu da muenter pauc, ei era empau biestga mo bunamein negins marcadonts cun quei ch'ils Urane's e biars da **Tujetsch** eran schon sin viadi ad **Altorf**. Duei la fiera da **Camischolas** prosperar, sche sto ella vegnir fixada sin gliendissidis avon la fiera d'**Altorf**, che croda silla gievgia avon s.Gagl. Ins ei spanegiaus co ei vegn ad ir silla frequentada fiera ad **Altorf**, nua ch'igl ei vegniu catschau grond muagl, cunzun ord il **Tessin**. Ins tema che quella surcatschada pudessi efectuar ina sbassada dils bials prezis dallas vaccas.

Nova Gasetta Romontscha nr.42, 14 d'october 1864

La direcziun postala ha scret ora en libra concurrenza,

tgi che vegli menar dil zerladur 1865 naven la posta sursilvana sillas staziuns **Cuera-Rehanau, Rehanau-Flem, Flem-Glion, Glion-Trun, Trun-Muster** e pils treis meins da stad fenadur, uost e settember la posta dall'**Alpsu** sillas satziuns **Muster-Tschamut** e **Tschamut-Ursena**. Las cundiziuns san ils aspirants mirar suenter sils biros postals a **Cuera, Glion** e **Muster** e ston dar en sils 15 da december. Tgei uras che la posta dall'**Alpsu** vegn a partir a **Cuera** ed **Ursena**, nua ch'ella vegn a prender il gentar – sil qual ils ustiers dalla **Surselva** ein spanegiai – quei ei aunc nuota fixau, bein aber, che la posta sursilvana duei quels meins, ch'ella va buca sull'**Alpsu**, ir naven da **Cuera** per las 7 enstagl sco sut il present uorden schon las 6 dalla damaun.

Nova Gasetta Romontscha nr.48, 25 da november 1864

En 12 uras e 30 minutus da Cuera ad Andermatt

Per cumpletar e per part era rectificar nossia davosa notizia ariguard la futura posta sull'**Alpsu**, savein nus ussa notificar, che quella parti da **Cuera** allas 7 dalla damaun, arrivi a **Glion** allas 11 e 5, laschi leu 25 minutus temps da gentar, mondi las 11 e 32 a **Trun**, arrivi leu l'ina e 30, a **Muster** las 15, a **Tschamut** las 17 e 25 ed ad **Ursena** las 19 e 30. Allas 5 dalla damaun banduna ella **Ursena**, vegn a **Tschamut** las 7 e 30, a **Muster** la 9 e 10, a **Trun** las 10 e 20 ed a **Glion** las 12 e 10, leu stat ella 25 minutus e vegn a **Cuera** las 16 e 35.

Nova Gasetta Romontscha nr.49, 2 da december 1864

Seiv viva suenter la via

La vischnaunca da **Tujetsch** ei intenziunada da schar plantar en seiv viva suenter la via nova, leu nua ch'ina classena ei necessaria per schurmetg dil funs. Tgi che ha tschaffen da surprender quella laver, duei tochen ils 20 da decembre, onn current, dar en alla suittascretta, con ch'el pretendi pella tschuncheisma da quella seiv, la quala el sto garantir. Ulterior sclariment dat la suprastanza da **Tujetsch**

Nova Gasetta Romontscha nr.49, 2 da decembre 1864

Ils Uranès a Glion

... Alla via nova sull'**Alpsu** han ins d'engraziar, ch'era entgins Uraneès ein vegni a **Glion** e cumprau si enzatgei vaccas. ...

Nova Gasetta Romontscha nr.51, 17 da decembre 1864

In stierl brin

cun ina corda enta culiez, ell'ureglia dretga davon en in vinchelmess, ina ruosna ed in snez davos en ei il davos marcau da **Glion** suentermiezdi ius a piarder. Tgi che sa dar novas da quel ei grondamein supplicaus da schar saver Gion Antoni Curschellas a **Tujetsch (Bugnei)**.

Nova Gasetta Romontscha nr.51, 17 da decembre 1864

(14) Novitads d'avon 155 onns

Vaccas da pauca vaglia - Ils aviuls han gia schamnau e stuschau il matg - Il matg sul Pass Alpsu - Buns marcadonts bavarès - Ina vacca tuatschina per 13 marenghins - Diesch dis neiv il matg - Ina Tuatschina a Minca - Consolaziun entra la Confederaziun

Mintgadi las nuvialas digl entir mund

Il menar la posta denter **Mustér** e **Rueras** cun ina schesa ni schletra da dus plazs mintgadi, priu ora ils treis meins da stad che la posta va sull'**Alpsu**, ei scret ora en libra concurrenza. Las condiziuns san ins leger suenter el document deponius el biro postal a **Mustér**, nua ch'ins sa era retrer ils formulars per dar en da menar quella posta, il qual sto daventar entochen ils 4 da fevrer. Gl'accord entscheiva cun calonda mars. Essend che **Tschamut** vegn ussa honoraus cun in depot da posta, sche san ils vischins aspirar sin quella piazza. Per tener leu la posta ed ir treis dis ad jamna a **Rueras** pils effects da posta – quei temps che la posta va buca sull'**Alpsu** – survegnan ei 100 frs. ad onn. Tochen ils 4 da fevrer ston era quels aspirants s'adressar tiel signur postdirector a **Cuera**. Curascha pia vus speculants giudapeis al **Culmatsch** e **Badus**. Vus aber, avdonts dalla venerabla **Putnengia**, che essas stai aschi disgraziai ariguard la via nova e la piazza fiera, seconsolei e fagei fiasta, a vus ei finalmein daventau salit! Vus survegnis ussa mintgadi las nuvialas digl entir mund e veis era oreifra caschun da mintgadi ir en crotscha ni en schletra.

Nova Gasetta Romontscha nr.4, 27 da schaner 1965

Surdada dalla posta sursilvana

Silla libra concurrenza scretta ora per menar la posta sursilvana e la stad quella dall'**Alpsu** eis ei stau plirs che han dau en e suenter ch'igl ei als aspirants danovamein stau vegniu insinuau dad ir pli bass cun lur pretensiuns, ei la menadira tenor usit vegnida surschada a quels, che han fatg il bienmarcau: da **Cuera** a **Glion** a signur Kündig da **Turitg**, che ha avon entgins onns era giu surpriu da menar la posta engiadinesa, da **Glion** tochen **Tschamut** als signurs frars Berther a **Mustér** e sull'**Alpsu** als signurs Meier ad **Ursera** (pli tard surdau a signur dr. Christen d'**Ursera**).

Nova Gasetta Romontscha nr.5, 2 da fevrer 1965

A Selva

el liug classic dallas lavinas, nua che pliras cruschs fan endamen las disgrazias succedidas e la cadicitad dalla veta humana – ei sonda vargada in ferm e curaschus giuen, Florin Venzin, vegnius ella lavina, *4 da fevrer 1865*. Malgrad la ruha aura ha el vuliu esser ius alla catscha si pellas spundas vi da tschei maun dil **Rein**.

Nunvegnend el la sera a casa, han sia glieud entschiet a temer e fatg sedar ora per el. Cheu vegn ei lu raquintau, ch'ins hagi entuorn las 4 udiu a vegnend in squatsch lavina vi da tschei maun, duront che la nebla eri en. Spert van lu leu encunter umens cun petgs e palas, vesan la lavina, anflan gl'emprem la buis e lu era il disgraziau, in bratsch sut la neiv en. El era morts ed ord tut quei, ch'ins ha fatg stem dad el, pon ins comprender, che la lavina seigi rutta ora sur ses peis sin ina teissa spunda. Dieus hagi fatg grazia cun sia olma!

Nova Gasetta Romontscha nr.6, 10 da fevrer 1965

In s.h. bov entir

da bi peil e beinfatgs ei venals a **Tujetsch**. Tier tgi san ins endriescher ella stamparia dalla Nova Gasetta Romontscha.

Nova Gasetta Romontscha nr.6, 10 da fevrer 1965

Ina Tuatschina a Minca

... Ina Tuatschina ch'ei vegnida tarmessa sco pintga buoba tiels Schuobs ed ei leu plaunsiu sedomiciliada a **Minca**, ha nus leu plirasga remarcau: "Ella sappi nunpusseivel capir, co geniturs possien tarmetter lur pigns affons en ina tiara jastrà, senza mirar pli lunsch co ei vegnien cavegliai giu damaun; ella hagi zuar giu la ventira da vegnir tier bien patrun, mo ella seigi biaga stada mal, vesend co auters affons seigien vegni tarschinai." ...

Nova Gasetta Romontscha nr.7, 17 da fevrer 1965

Diesch dis neiv il matg

Tochen oz, ils 10 da matg, ha ei en quest meins aunc finadin di neviu pauc ni bia, ed aschia eis ei buca da sesmarveglier, sche las gassetas raquentan da grondas nevadas e cuflaus da tscheu e leu. **Tujetsch** ha da 15 dis enneu era giu neiv, cuflas e lavinas en abundonza; mo per ventira eis ei succediu neginas disgrazias. Ils Tuatschins sesanflan denton temps da grondas neivs en ina fatala situaziun cun lur via nova, essend che negin vul cheu seschar neu da tener aviert ella. Las vischnauncas da **Mustér** e **Tujetsch** han pervia dil manteniment surpriu neginas otras obligaziuns che da menar la galera, mo era il cantun vul saver pauc da better ora la neiv ed ha leusuenter dau sias instrucziuns al viè cantunal a **Tujetsch**. La posta federala ei obligada da far mintgadi siu tur denter **Rueras** e **Mustér**, mo co duei ella passar tras cuflaus da 12 peis altezia, sco igl ei stau quels dis ella **Val Bugnei?** **Tujetsch** less buca seprijudicar cun porscher memia bia agid; **Mustér** tratga, sch'ils Tuatschins vulan buca vegnir ora, sche san ei star leuen, ed il cantun para da prender si lev pils habitants da quella tiara dall'empermischun, nau che mèl e latg flessegian en abundonza. Il respectiv protocol dil Cussegl Grond di zuar, che pervia dad arver la via denter **Mustér** e **Tujetsch** temps d'unviern, duei vegnir sentelgiu pli tard, mo sin tgei congress che quella questiun duei vegnir decidida, san ins aunc nuot. Essend ch'ei retracta cheu per ina via militara, sche savessen ins ad interim liberar la recluta da **Tujetsch** e **Mustér** dil survetsch sil **Rossboden** sut la cundiziun, ch'ella tegni aviert temps d'unviern quella via e retili persuenter la schulda dalla Confederaziun.

Nova Gasetta Romontscha nr.10, 10 da mars 1965

Consolaziun entras la Confederaziun

Silla communicada fatalitatad pervia da better ora la via silla via dall'**Alpsu** denter **Mustér e Tujetsch**, consolescha ussa il Bund quellas duas vischnauncas cun segirar, che la medema questiun vegni era a nescher silla via dalla **Furca**, inaga che quella seigi finida.

Nova Gasetta Romontscha nr.11, 17 da mars 1965

Ina vacca tuatschina per 13 marenghins

Ferton che la fiera da **Trun** dils 20 d.q. ha giu pauca e cara biestga (per ina vacca tuatschina eis ei vegniu pagau 13 marenghins) eis ei stau sil marcau da **Glion** dils 24 in grond biestgam ed ei vegniu vendiu per prezis buc aults. ... Stiarls era ei muntanera e bienmarcau, per 80 – 85 frs. in, eis ei vegniu cumprau si biars bials e grass stiarls; ils da **Tujetsch** e **Medel** vessen perquei bugen fatg si pli gronda roscha, mo ei maunca ad els il pavel. ...

Nova Gasetta Romontscha nr.12, 24 da mars 1965

Buns marcadonts bavarès

Suenter las fieras da **Trun** e **Glion** ei in Bavarès staus tochen **Medel** e **Tujetsch** e cumprau si dabia vaccas per andants prezis. Ferton ch'ils auters marcadonts van il bia mo suenter vaccas giuvnas e bialas, laian ils Bavarès stgisar vaccas veglias e macortas, sche mo ellas ein pleinas vadi e bunas da latg e da peil alv. Aschia pon ins comprender, che quels marcadonts ein adina fetg beinvegni ella **Surselva**, cunzun uonn ella presenta scartezia da fein. Quellas vaccas van en ina gronda campagna ad **Ebersberg**, nua ch'ei sesanfla circa 200 vaccas – las biaras da razza grischuna – e 12 Sursilvans che miran tier quellas. Quels han lu pli bi far, che nos paupers perveseders, fein e risdiv, sec e verd, malz e frina, rebas e rabas, maunglan ei buca spargnar, els catschan si taluisa las pompeluseras, che nos purs enconuschessen nuota pli lur vaccas, ch'els han vendiu, mo ei dattan era latg persuenter – tochen 16 mesiras a di. Tgei legreivla midada per bia da quellas vaccas veglias, ch'ein quels dis instradadas ad **Ebersberg**; ord nuegls da tgerlentaders vegnan ellas ella tiara dalla cucagna. Possi far bein! Ch'ils Bavarés tschercan principalmein vaccas che han aunc da far vadi, deriva da cheu, ch'ils vadials giuvens pagan leugiu schi bein; per bialas vadialas alvas da 15 dis pagan ils purs bugen 50 frs. ed aunc dapli. Il latg cumpra in Tuatschin giu, e venda lu ora il pieun e caschiel.

Nova Gasetta Romontscha nr.13, 31 da mars 1965

Via profiteivla

... Ils Uranès ein i sulla **Alpsu** cun dabia tiers e muossan cheutras, che quella nova via seigi buca mo profiteivla pella **Cadi**, sonder pil negozi da biestga dall'entira **Surselva**. ...

Nova Gasetta Romontscha nr.19, 12 da matg 1965

Il matg sul Pass Alpsu

Ils 25 da matg ei ina famiglia engiadinesa ida uonn cull'emprema crotscha sull'**Alpsu**, schegie ch'igl ei stau vegniu bess ora negina neiv. Plira signaria passada tras **Ursera**, mo meins curaschusa che l'indicada engiadinesa, vess fatg la medema ruta, sch'ei vessen buca giu tema dalla neiv.

Nova Gasetta Romontscha nr.22, 2 da zercladur 1965

Ils aviuls han gia schamnau e stuschau il matg

Il matg ei stulius, mo ha schau anavos stupenta pareta els aults, duront che sias plievgias han ella **Bassa** buc pudiu restabilir diltut quei ch'ils funs han giu pitiu dalla schitgira avrela. Schegie ch'igl ei stau il matg ualти frestg, sch'ei la calira tonaton muntada il davos temps sin 24 grads Reaumur a **Mustér**. Remarcabel, gie darar

s'udiu eis ei ch'ils aviuls han a **Selva**, en ina altezia da 1538 meters, schamnau e stuschau schon il matg.

Nova Gasetta Romontscha nr.22, 2 da zercladur 1965

Vaccas da pauca vaglia

La fiera da **Sedrun** ei uonn buca stada frequentada sco auters onns. Las vaccas cumparidas eran da pauca vaglia ed han perquei era pagau leusuenter. Tiella cumpra da stiarls han ils Tudestgs fatg concurrenza als Romontschs e perquei han quels pagau biebein. Tgauram han ils Uranès cumprau si dabia per andants prezis, il mender han las nuorsas pagau. – Cun quella caschun notificein nus al ludeivel publicum, ch'il pacific vischinadi da **Camischolas** hagi cediu sia fiera digl october al vitg **Rueras** – ton per respectiva correcziun dallas fieras dadas en el Calender Romontsch.

Nova Gasetta Romontscha nr.24, 15 da zercladur 1965

(15) A Sedrun ei il Run vegnius in per ga schi ferms, che las casas stremblavan

Plievgia lavaga ed ina tempiasta destruescha. – Buna fiera a Ligiaun. – Ina lavina retegn otg dis il Rein a S. Brida. – Tschamut survegn hotel e duana.

Premis per las scolas

Premis fixs per casas da scola ni alzament dil fondo ei vegniu partiu ora 5240 frs. ... denterauter a **Selva** 400, **Camischolas** 350 ...

Nova Gasetta Romontscha nr. 27, 7 da fenadur 1865

En 13 uras e 20 minutias da Cuera ad Andermatt

La posta dall'**Alpsu** ha entschiet siu cuors da stad sonda vargada, mo aunc ussa era ella il bia ualti vita. Per correcziun dil plan da tur communicaus da nus quest unviern, relatein nus, ch'ella parti dad **Ursera** tenor midada fatga pli tard per las 7 dalla damaun, arrivi a **Tschamut** las 9 e 35, a **Mustér** las 11 e 15, a **Trun** las 12 e 35 e setegni si leu pil gentar tochen l'ina e 40 min ... a **Cuera** vegn ella las 19 e 30. Naven da **Cuera** va ella las 6 e 15 dalla damaun ... vegn a **Mustér** allas 15 e 15, a **Tschamut** las 17 e 35 ed ad **Ursera** las 19 e 35.

Nova Gasetta Romontscha nr.27, 7 da fenadur 1865

Lavagau il fein

Sch'il proverbi: "Sco ils dis tgaun van anen, aschia van els ano", duess sevirificar, sche cuoza quell'aura plievusa aunc ditg. Tschella jamna ha ella lavagau bia fein; en **Tujetsch** era ei da quels, che vevan tochen 50 ponns strèsa *fein sil prau*. Schi desiderada sco la plievgia era vivon, ual aschi beinvegnida fuss ussa la bialaura per tut ils fretgs.

Nova Gasetta Romontscha nr.31, 4 d'uost 1865

Tempiasta

In temporal dalla notg dils 29 sils 30 dad uost ei stau in dils pli horribels, ch'ins seregora a **Mustér**. Il cuntuau camegiar e tunar, il suffel e la dracca ella snueivla stgiradetgna nocturna fageva veramein sgarschur. En plirs logs ha ei dau tempiasta, a **Tschamut** vesevan ins la damaun entirs mantuns ed a **Danis** e **Tavanasa** duei haver manizzau si bia feglia pumera e rabetscha truffels. ...

Nova Gasetta Romontscha nr.35, 1. da settember 1865

La fiera da Rueras

Ei vegn cheutras fatg da saver ad in ludeivel publicum, che la fiera da **Rueras** vegni tenida ils 9 d'october, quei ei gliendisdis proxim enstagl per ils 13 d.q.

Tujetsch, ils 3 d'october 1865

La suprastonza

Nova Gasetta Romontscha nr.40, 6 d'october 1865

Salter cantunal Berther

Nies cantun ha quels dis piars in fideivel survient, il salter cantunal (Bundsweibel)

Anton Berther da **Tujetsch**, che ha da 1834 enneu surviu ella casa dalla regenza.

Purtond ina depescha el biro telegrafic survegn el la daguota, dat per tiara via e negins remedis han saviu far revègnir el, - en in per dis er'el ina bara. El rauassi en pasch!

Nova Gasetta Romontscha nr.44, 3 da november

Unviern

A **Tujetsch** ha ei ier dau 3 quartas neiv ed a **Mustér** circa miez bratsch.

Nova Gasetta Romontscha nr.44, 3 da november 1965

1865

In exempl d'ina biala raccolta

Il selvadi da **Tujetsch** ei adina staus renomaus per siu bi glin e schegie che quel ei uonn ellal biares valladas buca gartegiaus, sche ha in pur tuatschin tuttina fatg dad ina curtauna streha semgl 18 curtaunas tgembladas. Sin in sulet glin ha el anflau 105 borlas, ditgel tschien e tschun, glins da 60 e 70 borlas fuv'ei plirs. Il medem econom ha era fatg bials truffels essend che plirs da quels pesavan 1 glivra *fun* in.

Nova Gasetta Romontscha nr.46, 17 da november

Annunzia

La vischnaunca da **Tujetsch** ei intenziunada da schar via da guder l'aschinumnada alp da **Tschamut** per 1 onn ni per 6 onns entschavend 1866.

Per quella fin fa ella enconuschent a tuts amaturs da quella alp, che quella vegni a **Sedrun**, ils 15 da mars 1866, dada via da guder a quel che porscha il pli grond tscheins. Quella alp porta 140 – 160 armauls gronds cun in grond diember da nuorsas vitier. Ei meretta da vegnir menziunau, ch'il stradun ad **Ursera** va sper l'alp ora, aschia ch'igl ei zun cumadeivel d'ir e vegnir.

Ulteriori sclariment san ins da tut temps promptamein obtener tras la suprastonza da **Tujetsch**

Sedrun, ils 20 da december 1865

Nova Gasetta Romontscha nr. 51, 22 da december 1865

Annunzia e recumandaziun

Il suittascret ligiacudischs fa cheutras da saver, ch'el seigi setabilius a **Mustér** ella stizun spella stamparia en casa dils signurs Frars Monn e serecamonda cheutras ad in ludeivel publicum per tuttas lavurs da siu mistregn, ch'el vegn a far spert, solid e per in raschuneivel prezi.

En sia stizun ha el era da vender differents cudischs d'oraziuns, d'uffeci, da ductrina e calenders.

Emanuel Deragisch

Nova Gasetta Romontscha nr. 59, 29 da december 1965

Saltè cantunal

Sco salte cantunal ei signur Anton Berther da **Tujetsch**, fegl dil vegl „Bundesweibel“ Berther, legius ora; igl ei stau varga 20 aspirants per quella piazza.

Nova Gasetta Romontscha, ils 12 da schaner 1866

Ina buna fiera

Ei para che la fiera da **Ligiaun** da quest atun vargau seigi buca curdada ora aschi mal sco ins manegiava, essend ch'ils principals marcadonts da **Tujetsch** e **Medel** han secartiu da far leger tscheiver communabel e zuar alla moda veglia, cun hoppers senza polcas e schottischs.

Nova Gasetta Romontscha nr. 6, 9 da fevrer 1866

Lavina

Malgrad la nevada dils 2 e 3 d'avrel ei ussa puspei terrenau aschi lunsch sco vivon; dad ina nevada luada ora aschi spert seregordan ins buca grad, perquei eis ei era tscheu e leu rut ora bovas. Era en **Tujetsch** ei iu sillla spunda meridiunala grondas lavinas la notg dils 2 sils 3 d'avrel, che han empleniu en la **Val da s. Brida** tscheu a **Selva** sin ina stementusa moda ed otg dis reteniu il **Rein**. Fuss ei stau ina lavina da freid enstagl da cauld, sche fuss ei stau finiu cul vitg da **Selva** . . .

Nova Gasetta Romontscha nr. 15, 13 d'avrel 1866

Hotel a Tschamut

Tschamut, quei ei tschema dil mund, entscheiva a secivilisar. Tiella staziun da posta vegn ei leu baghegiau si in hotel e quei vitget duei ussa aunc daventar la residenza d'in schendarm per trer en il dazi da consum sin bubrondas spirituosas che vegnan retratgas dil **Grischun sur Ursera**. Mo donn che quei niev emploiau cuosta al cantun dabia e vegn a trer en zun pauc.

Nova Gasetta Romontscha nr. 22, 31 da matg 1866

Duana a Tschamut

Il Fegl ufficial dils 6 *da fenadur* fa da saver, ch'en consequenza dalla nova via sull'**Alpsu**, seigi ussa ranschau en ina duana a **Tschamut** per trer en il dazi cantunal da consum sigl import da raubas spirituosas e surdau l'incassaziun da quel a statalter Gion Paul Riedi da leu.

Tempiasta

Ils 19 da fenadur, il medem di ch'igl ei dau tempiasta e dau giu il tun egl **Uaul Cavorgia**, ein tenor il Tagblatt era ils habitonts da **Flem** tras in temporal stai en gronda tema . . .

Nova Gasetta Romontscha nr. 30, 27 da fenadur 1866

Las casas stremblavan

Sco onn, aschia ha era uonn, la fin d'uost purtau gronda dracca, sulettamein ei quella vegnida ina notg avon. Las grondas auas dalla notg dils 28 sils 29 *d'uost* han tscheu e leu fatg considerabels donns. Da **Mustér** ha il **Rein** menau naven 3 – 400 tschuncheismas pledra dalla fabrica da glas a **Domat**. A **Sedrun** ei il **Drun** vegnius in per ga schi ferms, che las casas stremblavan. Nuotatonmeins ha leu la gronda e biala punt pitiu negin donn, bein aber las ustonzas sper la punt da **Camischolas**.

Nova Gasetta Romontscha nr. 35, 31 d'uost 1866

Caschiel grass da Tujetsch e Cristallina

san ins retrer da J. J. Condrau a **Mustér**. Essend che la temperatura da questa stad ei stada favoreivla pellas cascharias, sche vegn ei garantiu pella buna qualitad.

Gasetta Romontscha nr. 36, 7 da settember 1866

Fein a pastg

Schei ha uonn dau pauc fein grass, sche enquera pliras vischnauncas che han bialas alps e pastiras da trer ton pli bia pavel ord ils cuolms. Aschia ha **Tujetsch** vendiu

uonn fein a pastg per 2000 frs. Mo giu dad in toc pastira ei en sorts ina vid l'autra vegniu segau 80 tschuncheismas fein!

Gasetta Romontscha nr. 37, 14 da settember 1866

Avertura dils pass

Sin repetida instanza dil ludeivel Cussegli Pign e Cussegli Federal ha il cantun **Tessin** aviert ils 30 d'october il pass aber denton mo quel dalla **Greina**, dil **Lucmagn** e dall'**Alpsu**, aschia che mo la **Surselva** ha cun el liber traffic, ferton ch'il **Bernardin**, respectiv la **Val Mesauc** ei aunc serrada. ... **Uri** vegn ussa era immediat ad arver l'**Alpsu**. Sco nus havein udiu ord buna fontauna, eran ins ad **Altorf** semtgai dad arver encunter la **Surselva**, schi gleiti sco **Tessin** dessi l'iniziativa.

Gasetta Romontscha nr. 44, 1 da november 1866

(16) Tschiendendisch figliols ni figliolas

Ins vess denton giavischau ch'ei fuss buca vegniu paterlau tut en fin romontsch, sunder era empau dialect tuatschin, silmeins en quella interessanta scena, nua che las femnas sescagnavan e sepitgavan.

Tochen ad Aarau e Zofingen

... Sull'**Alpsu** ei vegniu catschau ina gronda massa vaccas a **Lucerna**, nua ch'ei era secret ora sin tuts mauns ina nova e gronda fiera sils 22 d.q. Schon avon eran marcadonts da **Tujetsch** stai cun da nossas vaccas tochen **Aarau e Zofingen**, nua ch'ellas han tratg biebein, per motiv ch'ei vegn cheuora tschercau vaccas da buca gronds prezis. ...

Gasetta Romontscha nr. 47, 23 da november 1866

Cumpra da vaccas

Marcadonts bavare's ein questa jamna stai pella **Surselva** si tochen **Tschamut** e cumprau si ina biala roscha vaccas per prezis mesauns. ...

Gasetta Romontscha nr. 48, 30 da november 1866

Vendiu 240 vaccas!

El commers da vaccas ei aunc adina gronda vivacitad en **Surselva**. In marcadont bavare's ha la jamna vargada cumprau si 50 vaccas ella **Cadi**. Schegie che quellas vessen giu pign esit sin auters mauns, devan ellas tuttina 160 frs. intragliauter. Mo la vischnaunca da **Tujetsch** duei haver vendiu ora quest atun circa 240 vaccas e tonaton eis ei aunc dapertut venal vaccas. La davosa fiera da **Ligiaun** ei ida mal, aschia era la fiera d'**Altorf** dils 29 da november. In marcadont da **Medel**, che ha frequentau quella, ha stuiu schar sill'**Alpsu** duas vaccas ella lavina, duas ha el pudiu liberar, mo stuiu schar ventscher elllas la notg sil cuolm. El sez e siu cumpogn da viadi ein dalla lavina vegni fieri vi el lag, mo ein mitschai culla tema e cun schar anavos ella neiv caput e capetscha.

Gasetta Romontscha nr. 49, 7 da december 1866

Pintga concurrenza

Sil davos marcau a **Glion** ei vegniu marcadau pir che mai. ... Ils marcadonts talians pagavan per stiarls ners e maghers sis marenghins e miez, aschia ch'ils da **Tujetsch** e **Medel**, ch'ein aschi gronds amaturs da quei rom, han fatg ad els pintga concurrenza.

Gasetta Romontscha nr. 50, 14 da december 1866

Morts ella vegliadetgna dad 87 onns

Ils 16 da december ei igl aultreveriu signur canoni Jacob Franz Gieriet, beneficiat a

Nossadunna sper **Trun**, il senior digl entir clerus grischun, spartius da quest mund ella aulta vegliadetgna dad 87 onns. El ei naschius a **Tujetsch**, ils 4 da schaner 1780, vegnius benedius ora ils 14 da december 1806 ed ei aschia staus 60 onns spiritual. Gl'emprem ha el surviu 4 onns sco caplon a **Medel**, ei lura vegnius 1811 sco plevon a **Trun**, nua ch'el ha pastorau tochen 1858. Quei onn ha el dau si quella pleiv, nua ch'ei existeva pli neginas letgs buc enzinadas en dad el, ed ei sereratggs el tgeu pelegrinatsch si **Nossadunna**. Schon 1828 eis el vegnius numnaus canoni e vicari episcopal. Pli tard ha el era funcziunau sco inspectur da scola e dau ora in adattau cudisch d'oraziuns per promover la cultivaziun religiosa dils affons. El ha acquistau l'affecziun e carezia da tut ses parochians e la stema da tut ses enconuschents. El rruaussi en pasch!

Gasetta Romontscha nr. 51, 21 da december 1866

Tschienedendisch figliols ni figliolas

Essend ch'igl ei ussa il temps, nua che padrins e madretschas ston muort ils biemauns passar la mustra cun lur figliols e figliolas e ch'in ni l'auter pudess forsa gleiti entscheiver a senuspir sur siu grond diember da cumpars e cumars, schelein nus consolar els cun allegar, ch'il defunct signur canoni Gieriet vevi 111 figliols ni figliolas.

Gasetta Romontscha nr. 01, 4 da schaner 1867

Secunda posta sull'Alpsu

A motiv che sill'a stad vegn era ranschau en in cuors postal dil **Valleis** si sulla **Furca**, sche ha il departement postal el senn da sin lu menar en in secund cuors sull'**Alpsu**, aschia, ch'ei passass la stad mintgadi tralla **Surselva** duas postas giuviars e duas siviars.

Gasetta Romontscha nr. 02, 11 da schaner

Mo nevadas

Quest unviern para ei da dar neginas bischas, sunder mo nevadas. Silla nevada dil december, ch'era schon stulida per gronda part, ha ei ils emprems dis da questa jamna puspei dau ina sgarscheivla neiv, aschia ch'ins ha mesirau a **Mustér** el plaun ina altezia neiv da varga 5 peis. Naven dalla renomada nevada dil matg 1858 vulan ins buca seregurdar pli d'ina tala neiv. Igl ei bien ch'il proverbi di: "Ina gronda nevada, ina numerusa casada ei gleiti scarsada." Denton ein ins en tema, ch'ei possi tscheu e leu haver dau disgrazias tras lavinas.

Gasetta Romontscha nr. 03, 18 da schaner 1867

Lavina

A **Selva** ha la lavina priu dus mulins e treis clavaus cun dabia pavel.
Nova Gasetta Romontscha nr. 4, 25 da schaner 1867

Buns prezis per funs

Ferton ch'ins auda per l'entira **Svizra** entuorn, ch'ils prezis dils funs seigien ussa memia autls per obtener ina buna rendita, ei quels dis vegniu vendiu en **Tujetsch** ina acl'a da varga 5000 tschuncheismas per 2.55 frs. la tschuncheisma! – buns funs mo aunc buca dils megliers, ch'ins anfla leu. Avon circa 50 onns han plirs cumprau si en quella medema vischnaunca massa praus grass per 2 – 3 bazs la tschuncheisma. Tgei midada!

Gasetta Romontscha nr. 5, 1 da fevrer 1867

Teater dils giuvens

En preschientscha d'in numerus publicum han ils frestgs giuvens da **Tujetsch** dau ils

25 da fevrer ina legra ed instructiva producziun teatrala a **Sedrun**. „Il fabricant dall'aura“ *translatau da pader Baseli Berther*, ei in tema fetg pratic ed interessant pil pievel. Il versau translatur ha dasperas buca schau muncar da cungir la translaziun cun saladas remarcas per tuts stans e saluteivlas presas per umens e femnas. Ord las vehementas debattas dils umens e dallas femnas ha ei sufficientamein semussau, ch'il vegnir perina tgei aura schar far, seigi ual aschi difficil sco il fabricar l'aura. Ils acturs han per la gronda part giugau lur rolla en uorden, aschia che sez finas actressas leu presentas, han dau ad els unanim laud. Ins vess denton giavischau ch'ei fuss buca vegniu perorau tut en fin romontsch, sunder era empau dialect tuatschin, silmeins en quella interessanta scena, nua che las femnas sescagnavan e sepitgavan. Ina honorifica menziun mereta era il bi cant producious dils medems giuvens.

Gasetta Romontscha nr. 9, 1 da mars 1867

Avunda fein

Il favugh dil fevrer ha ussa il mars stuiu ceder all'aurasut. Il freid retegn la vegnida dalla primavera ed ell'entira **Partsura** para la generala scartezia da fein da vegnir pli prigulusa che mai. Ina excepziun fa uonn la vischnaunca da **Tujetsch**, quella ha savens stuiu tarmetter entirs muvels giuviers, mo uonn ha ella fein per dabia muvels jasters – ina remarcabladad dalla quala ils pli vegls san buca seregurdar. Siu cletg ei stau, ch'ella ha gl'onn vargau vendiu fein a pastg per 2000 frs., aschia ch'ils purs han mo ord las pastiras tratg ina fenada da 10'000 frs. valeta.

Gasetta Romontscha nr. 10, 8 da mars 1867

In bratsch neiv

Ferton ch'ils da **Medel** vevan da miez avrel in bi schierm sin bia èrs, eran ils plauns da **Tujetsch** intragliauter aunc cuvretgs cun in bratsch neiv.

Gasetta Romontscha nr. 16, 19 d'avrel 1867

Scolast el cantun Glaruna

Gl'avrel ei miert a **Galgenen**, cantun **Sviz**, il giuven scolast *Giachen Martin Muggli (1842-1867)* da **Tujetsch**, maridau *Catharina Rochs, ed in fegl*, nua ch'el veva dau treis onns scola cun bien success. Sco la gasetta da **Glaruna** scriva, era el leu generalmein stimaus e carezaus sco bien e fideivel instrukter e bab da famiglia.

Gasetta Romontscha nr. 18, 3 da matg 1867

Emigraziun

Silla caravana tuatschinèra da 18 personas ch'ein il davos da mars s'embarcadas pell'**America**, ha ils 28 d'avrel ina tut pli gronda caravana d'emigrants bandunau **Cuera**.

Gasetta Romontscha nr. 18, 3 da matg 1867

Elecziuns dils derschaders

Sco derschaders ord 14 proponi vegniu legiu ora: il president „cass“ Lucas Cavegn da **Tujetsch**, dr. Berther e president J. Condrau da **Mustér**, gerau Martin Pali da **Medel**, gerau Franz Decurtins da **Trun**. Sco suppleants: gerau G. M. Capaul da **Breil**, capitani Fr. Vincens e gerau Al. A. Huonder da **Mustér**, gerau Beeli da **Medel**, capitani *Sep Antoni Mucli* e gerau Gion Andriu Berther da **Tujetsch**.

Gasetta Romontscha nr. 20, 16 da matg 1867

Telegrafia

... Era sull'**Alpsu** duei ei vegnir construiu ina lingia telegrafica cun biros a **Sedrun** e **Tschamut**. Per ils renomai marcadonts da biestga en **Tujetsch** e per quels che meinan la posta sull'**Alpsu** ei quell'interpresa d'impurtonza, ed ins spetga perquei

susteniment pecuniar da quels. Per scadin biro vegn ei pagau per 10 onns 1000 frs. ad onn.

Gasetta Romontscha nr. 20, 16 da matg 1867

Taxa alpina

Tgi che va la stad culla posta da **Mustér** ad **Ursera**, da **Cuera** en **Engiadina** paga la taxa alpina dad 1 fr. per ura.

Gasetta Romontscha nr. 22, 30 da matg 1867

(17) Nova ustria a Tschamut - Bufs che purtavan naven entirs frusts – El ei fruntaus sin in bastiment da pirats e vegnius sblundergiaus totalmein - Il davos matg schon anflau farbuns madirs a .. - Sch'il zercladur smarschenta la tastga dils pasturs ...

Annunzia

En l'alp **Tschamut** vegn ei priu si circa 20 – 30 armauls: vaccas, stiarls ni vadials. Tgi che ha tschaffen da metter en quella alp, sto s'adressar tier gerau Paul Schmet a **Camischolas**.

Gasetta Romontscha nr. 23, 8 da zercladur 1867

Publicaziun

Nossa vischnaunca ei intenziunada da schar via per in ni plirs onns il crap scalegl da **Calmuota Calmut**, sut raschuneivlas cundiziuns; aspirants ein supplicai da s'adressar tochen dumengia proxima, ils 30 da zercladur da miezdi, tier la suprastanza da **Tujetsch**.

Sedrun, ils 26 da zercladur 1867

Gasetta Romontscha nr. 26, 29 da zercladur 1867

Annunzia

Il suittascret fa cheutras enconuschenet ad in ludeivel publicum, ch'el hagi baghiau si **Tschamut** ina nova ustria „Zu den Rheinquellen“ e recamondi quella a tut quels, che passan leu atras empermettend in bien e dueivel tractament.

Lucas Cavegn a **Sedrun**

Gasetta Romontscha nr. 26, 29 da zercladur 1867

Aunc bia neiv en via

La posta dall'**Alpsu** va mintga sera tochen **Tschamut**, mo sil cuolm ei aunc bia neiv en via e negin che fiera ora ella. Ils ustiers sursilvans e d'**Ursera** savessen suandar gl'exempel da lur collegas spel **Stelvio**, che han schau far quella lavur sin lur quen e cheutras survegniu schon baul gronda frequenza dad jasters.

Gasetta Romontscha nr. 27, 5 da fenadur 1867

Finalmein ei la neiv en via

sill'**Alpsu** spelada ora e la posta ha ils 8 da fenadur entschiet siu tur d'**Ursera** a **Cuera**. Ei ha duvraru liungas tractativas e la smanatscha da nos deputai a **Berna** da vegnir culla questiun avon la radunanza federala per perschuader il guvern uranès da far quei stradun alpin carregiabels. Spender in miez milliun per ina via e gnanc saver duvrar ella da mesa stad fuss stau enzatgei remarcabel. ...

Gasetta Romontscha nr. 28, 11 da fenadur 1867

Annunzia e recumandaziun

Il suittascret fa cheutras da saver ad in ludeivel publicum ch'el hagi midau giu siu depot da vischala a **Mustér** e translocau quel en casa nova da signur gerau Sep Antoni Maissen, nua ch'ins sa da tut temps cumprar da quella vischala per in dueivel

prezi. Engraziond pella confidanza mussada tochen uss serecamonda per numerusas empustaziuns

Deragisch, hafnermeister a **Tujetsch**

Gasetta Romontscha nr. 30, 26 da fenadur 1867

Buſſe che purtavan naven entirs frusts

Suenter ch'il sulegl ha gliendisdis (23 da settember) vargau rut atras il gries nebel e tut selegrava puspei dalla bialaura, ha ei schon la notg sissu viult cassacca, ed il mardis ha ei dau tals buſſe d'aria ch'el ha purtau naven dad entirs frusts la stubla ed il glin stemnau entuorn il vitg **Sedrun**. Sch'ils da **Mustér** possedessen vegnas sin lur plauncas, fussen ei vegnidas lavagadas la notg dils 24 sils 25 da settember tras ina bischetta ch'ei seschluitada tochen giu sur il vitg da **Segnas**.

Gasetta Romontscha nr. 39, 27 da settember 1867

Disfortuna

In pauper giuven da **Tujetsch**, Anselm Muggli (1827-1901), ei avon plirs onns emigraus ell'**America** per encuir sia fortuna. Suenter esser staus ditg e liung a **St. Paul** e fadiau giu ils daners pil viadi, eis el ius cun in auter camerat en **California**, e para leu duront entgins onns d'haver fatg bunas fatschentas. Siu camerat ei avon dus onns arrivaus ventireivlamein a casa; el che ha buca saviu vender sia possessiun suenter giavisch, ei perquei restaus anavos. Il settember vargau eis el s'embarcaus per vegnir a casa, ei aber sil viadi per mar ord **California** cumpatg fruntaus sin in bastiment da pirats e vegnius sblundergiaus totalmein; aschia ch'el ei ussa in pauper um, ed ha a **New York** stuiu serender el spital dils paupers. Tenor las smanatschas, las qualas tuts matros e passagiers dalla nav fagevan si per el, sco tons liuns e tighers, cun vuler mazzar, pender, fierer ell'aua el ect., eis ei aunc ina miracla, ch'el ei mo mitschaus culla veta. – Quella sventira ei ton pli da deplorar, essend che duas soras dil sventirau *Onna Maria* (1938-1920) ed *Onna Maria Ursula Muggli* (1841-1913) – spitgavan el cun gronda legria, e tuts treis fargliuns fussen forsa per adina stai ord tuttas miserias. Aber il carstgaun propona e Dieus dispona.

Gasetta Romontscha nr. 3, 17 da schaner 1868

Teater cuntenteivel

Las producziuns teatralas, da cant e musica tenidas quest meins a **Laax**, **Glion**, **Ladir**, **Rabius**, **Mustér** e **Sedrun** ein sco ins auda ualti dapertut curdadas ora per cuntentientscha digl auditori. Gasetta Romontscha nr. 9, 28 da fevrer 1868

Pli segir d'haver in „wechsel“

Nus havein tscheidi fatg menziun d'in cert Anselm Mucli (1827-1901) da **Tujetsch**, ch'ei sin siu viadi marin da **California** a **New York** vegnius sblundergiaus e maltractaus. Havend el secret als ses, ch'ei seigi denter auter vegniu priu ad el in «wechsel» da 3200 frs. sin ina casa mercantila dalla **Svizra**, ei nossa regenza s'informada a **Basel** e **Genevra**, ed el davos liug ha ina casa rispundi, ch'ella hagi da **S.Francisco** survegniu gl'avis, ch'ella duei sin in wechsel mess ora sin Anselm Mucli pagar al presentader da quel 3200 frs. La casa a **Genevra** ha aschia aunc a dretg temps saviu vegnir visada da buca pagar ora, entochen ch'ei arrivi buca in niev wechsel. Mucli survegn ses 3200 frs. anavos, ed ins vesa ord quei exempl, ch'igl ei sin in liung viadi pli segir d'haver in wechsel che daners.

Gasetta Romontscha nr. 12, 19 da mars 1868

Navontaquater onns

... ina femna a **Tujetsch** *Maria Cristina Sievi a Selva, naschida 25-03-1775* ed in um a **Tavau** ein vegni 94 onns. ...

Nova Gasetta Romontscha nr. 15, 10 d'avrel 1868

Bien e real vinars d'ansauna

circa 40 mesiras san ins retrer tier Lezi Antoni Balzart a **Cavorgia (Tujetsch)** per 4 frs. la mesira. Cumpraders, che vulan prender tut ni mo in ton ston far da saver enteifer 15 dis.

Gasetta Romontscha nr. 17, 10 d'avrel 1868

Fotos en illustradas tudestgas

Dacuort duei cumparer ina descripziun dalla **Surselva** en ina dallas empremas gassetas illustradas germanas, concepida da signur professer Theobald, cun fotografias da **Glion, Trun, Mustér e Sedrun**, pridas si da signur pictur Darms. Per giavinar neutier pli bia viandonts ella **Surselva**, ch'ei per biars aunc ina terra incognita, manegian plirs, ch'ins fetschi bia memia pintga canera cun publicaziuns e reclamas, perquei tucca ei da midar proverbi e dir: „Gronda bahaultscha e bia en caultscha“.

Gasetta Romontscha nr. 18, 1. da matg 1868

L'alp da Tschamut

pren si la stad biestga schetga ord vischnaunca (per munconza da tiers en vischnaunca) e zuar per in fetg raschuneivel prezi. Ins sa da quellas varts s'adressar tier il cautegia, gerau Sep Antoni Mucli a **Sedrun**.

Gasetta Romontscha nr. 18, 1. da matg / nr.19, 8 da matg 1868

Sch'il zercladur smarschenta la tastga dils pasturs ...

Silla schitgira dil matg ha il zercladur schon purtau entgins buns e zun desiderai radis. Sch'il zercladur smarschenta la tastga giu dil dies als pasturs, sche pudess ei tenor in vegl proverbi aunc dar in bien onn per las cuntradas aultas. Sco remarcabladad relatein nus ch'ins hagi il davos matg schon anflau farbuns madirs a **Medel** e ch'il medem di seigi en quest onn era passau gl'emprem carr sur gl'**Oberalp**.

Gasetta Romontscha nr. 23, 5 da zercladur 1868

Pauca biestga armentiva

Silla fiera da **Tujetsch** era catschau pauca biestga armentiva; il pli encurriu eran stiarls e vadials, quels pagavan biebein. Era vaccas vessen ils Uranès tschercau, mo da vaglia eran paucas ed ils prezis teniu fetg ault. Ton mender steva ei cun las cauras, in temps avon pagavan quellas 24 – 30 frs. ina e sillla fiera vegnevan las meglarias vendidas per 20 frs., las mendras da 15 frs. ensi; vanzau eis ei ina gronda quantidad. En tut eis ei vegniu vendiu pauc. Certs marcadonts sisum la **Surselva** vevan tras lur concurrenza catschau ensi ils prezis, principalmein dallas nuorsas, mo ils Uranès vevan buca tschaffen da magliar ora la buglia schi ensalada. Sch'ins cumpra rauba, sto ins era mirar ch'ei seigi pusseivel da puspei survegnir ton sco ins dat. Capito?!

Romontscha nr. 23, 5 da zercladur 1868

Idillica excursiun

Gliendisdis vargau han ils signurs professers e students dalla scola claustral a **Mustér** sut favoreivla aura fatg ina idillica spassegiada atras la biala e pitoresca val da **Tujetsch**. A **Tschamut** ella nova ustria „Zur Rheinquelle“ ei vegniu surviu ad els per solver in bien caffè cun il renomau aromatic mèl tuatschin. A **Sedrun** el Hotel Cruna ha in gustus gentar cun in bien glas **Vulcliner** legrau ils cors giuvenils e dau faviala alla lieunga. Cuntinuadamein ei il beinpreparau gentar aunc vegnius cungius emperneivlamein cun bialas melodias canzuns pertadas avon nunschenadamein e cun precisiu en tschun lungatgs. Honur als beinmeriteivels sgnurs professers, che sedattan tonta breigia da mischedar il dultsch cun il nizeivel e preparar a lur scolars

schi bialas recreaziuns. Ei para senza dubi, che la scola claustralha hagi entras las novas forzas, acquisitadas da monsignur avat igl atun vargau, fatg in ludeivel progress e mo da sesmarvegliar eis ei, ch'cls geniturs en nossas vischnauncas romontschas dalla **Cadi** tarmettan buca pli numerusamein lur fecls ella scola da **Mustér**, nua ch'els savessen cun pintgas annualas expensas duront dus tochen quater onns emprender particularmein il lungatg tudestg aschi bein sco en outras scolas ord nies cantun.

Gasetta Romontscha nr. 28, 10 da fenadur 1868

(18) Denton dependa tut dalla primavera

La diversitat da novitads per la secunda mesada digl onn 1868 e l'entschatta 1869 ei bunamein cumparegliabla cun oz, denton buca el diember. Aschia brischa in mises, ils Engiadines fan renfatschas pertucont il secuntener viers la via en Surselva, camutschs all'ingonda che pasculeschan il stavel a Nalps, la virola rumpa ora, Ligiaun carmala ils marcadonts cun ina premia, ina secziun locala dalla Societad da Pius nescha ella val e denter aunc bia auter caschuna l'aua gronda da 1868 bravs donns ella val.

Barschament

La jamna vargada ei da mesanotg barschau giu en in mises da **Tujetsch** ina tegia e dus clavaus, ch'eran naturalmein buca segirai.

Gasetta Romontscha nr. 28, 10 da fenadur 1868

Mo plaun vus d'Engiadina

... Il Fegl d'Engiadina renfatscha milsanavon, che la **Surselva** seigi pli baul semussada inimitga dallas vias, la via dall'**Alpsu** hagi 1860 giu bia adversaris a **Mustér** e **Tujetsch**, ed era en **Lumnezia** hagi ei duvrau cumissaris per perschuader quella buna glieud d'acceptar ina via cantunala. Cheu encunter remarchein nus, ch'ei vessi dau a **Mustér** negina opposiziun 1860, sch'ei fuss retractau da baghegier l'impurtonta via dil **Lucmagn** enstagl la via militara sur gl'**Oberalp**.

Gasetta Romontscha nr. 36, 4 da settember 1868

Ina roscha da varga 70 camutschs

La stupenta bialaura favorisescha la catscha sin camutschs, ed ins pudess aschia spitgar sin ina favoreivla raccolta dils numerus catschadurs, ton pli che quella selvaschina ei semuplicada ualts bein ils davos onns. Il pigrer da **Nalps** ella **Val Tujetsch** ha viu gl'uost pliras ga ina roscha da varga 70 camutschs che vegnevan en siu stavel e litgavan las plattas, nua ch'el deva sal a sias nuorsas. Els eran leu aschi endisai, ch'els fagevan pauc stem dils pasturs, cura che quels vegnevan d'entuorn, setergevan ei empau, mo turnavan lura puspei anavos. ...

Gasetta Romontscha nr. 37, 11 da settember 1868

Virola

En **Tujetsch** ei rut ora la virola entras in mattatsch turnaus tscheidi da **Regensburg**. El ei mitschaus, mo ha infectau ina femna da 50 onns *Maria Barbara Rothmund*, ch'ei morta. Entginas casas che han giu communicaziun cun quellas duas persunas, ein ufficialmein serradas giu per far curontina.

Gasetta Romontscha nr. 38, 18 da settember 1868

Esser ordavon per saver vender meglier

Nunditgond la repetida e fundada lamentaschun, ch'ins duessi buc ir aschi baul alla fiera da **Ligiaun**, ein ils marcadonts da **Tujetsch** e **Medel** schon semess ils 20 da

settember sin viadi. Tut che vul esser ordavon per saver vender meglier, buc aber per survegnir ils 200 frs. premi ch'il magistrat fa **Ligiaun** ha destinau per l'emprema roscha da 100 tgaus che arrivi a **Ligiaun** e cumpari schon ils 30 da settember sin plazza fiera. Igl ei quei ina speculaziun dils Lusanès da giavinar pli baul la biestga naven da **Sebiastg**, nua ch'ils marcadonts fan per ordinari las meglieras fatschentas e setergrinan leu perquei bien e ditg. La catscha da biestga per quella fiera para da buca esser gronda, cunzun da vart glarunèsa; sch'ei fa uss aunc bialaura, sche pon ils marcadonts selegrar, schegie ch'els han stuiu pagar bials prezis per lur tiers.

Gasetta Romontscha nr. 39, 25 da settember 1868

Societad da Pius

Correspondenza dil **Badus**. Per far da saver che la Societad da Pius ella **Cadi** mieri tuttavia buca dalla pleronza, notifichein nus, ch'ei seigi ella ludeivla vischnaunca da **Tujetsch** seconstituiu ina secziun locala, la quala ha il 27 da settember teniu sia emprema radunanza a **Sedrun**. Presents ein stai 22 commembers, ils quals ein cun entusiassem sedeclarai pella fundaziun dad ina secziun locala. Auters ein stai impedi da cumparer, ein aber medemamein entrai ella secziun, aschia che quella dumbra schon ussa varga 30 commembers. En ina viva e caulda allocuziun ha il president, signur caplon Casanova, declarau ils statuts generals e particulars dall'Uniun da Pius e fatg attents ton sillas interpresas generalas da quella societad svizra, sco era sin ils quater roms dad operaziun en special, proponi e dilucidai ella radunanza districtuala a **Sumvitg**. Il signur farrer dil liug ha en siu votum encuretg da far l'Uniun da Pius populara, cun bandischar ils spuentegls e pregiudezis, ch'il cumin pievel pudess haver encunter quella societad e quei intent para d'esser reussius ad el, essend ch'ils presents mo deploravan, che la buna tendenza da quell'uniun seigi buca enconuschenta, aunc biars vegnessien schiglioc a prender viva part da quella. Denton vegn ins cul temps a procurar la caschun, nua quei ludeivel iffer sa semanifestar nunschenadamein. – Alla fin dalla sessiun ei vegniu legiu ora il respectiv directori local, e concludiu da tarmetter ina numerusa deputaziun sill'a radunanza da **Sursassiala a Mustér**.

Gasetta Romontscha nr. 40, 2 d'october 1868

Fiera

Fiera a **Muster**. ... Ils stiarls vessen pagau bein, mo ei era negins e sinquei ein ils marcadonts da **Tujetsch** e **Medel** serendi giuviars. ...

Gasetta Romontscha nr. 40, 2 d'october 1868

Levan buca morder en

Ferton che las gassetas engiadinesas rapportan che sin las fieras el **Tirol** ed ella **Valtrina** creschien ils prezis dalla biestga pli e pli, stuein nus relatar il cuntrari dallas fieras en **Surselva**. La fiera da **Trun**, dils 10 d'october, ha ei buca muncau marcadonts, mo priu ora tiella cumpra da stiarls, levan quels buca morder en, ins po dir ch'il prezi dallas vaccas eri naven dalla fiera da **Mustér** sbassaus per in marenghin. La fiera da **Rueras a Tujetsch**, nua ch'igl ei cumpariu dabia biestga ed ualtsi biala, ein ils prezis puspei scurdai per in marenghin. Sin quella moda han in per marcadonts bavarès saviu comprar si buca car ina roscha vaccas ella **Cadi**.

Gasetta Romontscha nr. 42, 16 d'october 1868

Inspecziun dil Grischun.

Suenter haver conferiu cul guvern e visitau ils terribels donns da **Haldenstein** ein els ils 27 serendi a **Mustér**, han da leu anora visitau **Tujetsch** e **Medel** e van ussa anoragi. L'observada cunscienciusadat e moderaziun da vart dallas suprastonzas en dar en e stimar il donn, levgiescha considerablamein la missiun da quels signurs.

Gasetta Romontscha nr. 44, 30 d'october 1868

Aua gronda

Ils donns dall'aua ella **Cadi** ha la cumissiun federala stimau sco suonda: **Medel** 17'000 frs, **Tujetsch** 9000 frs., **Mustér** 21'000, **Sumvitg** cun **Surrein** 115'000 frs., **Trun** e **Zignau** 50'000 frs., **Breil** 6000 frs., total 218'000 frs.
Gasetta Romontscha nr. 45, 6 da november 1868

Biars purs ein turnai a casa cun lur purschals

Sil marcau da **Glion** dils 16 da november ei stau grond biestgam cun roschada marcadonts ed ei era vegniu marcadau dabia. Ils prezis dallas vaccas eran pli aults che da s. Martin a **Mustér**; in marcadont tudestg, che veva fatg si ina roscha vaccas, ha declarau, ch'ellas stettien ad el circa 11 marenghins ina. Il traffic da stiarls era buca schi vivs sco autras ga, mo ei muncava era lur capomarcadonts da **Tujetsch** e **Medel**. La piazza da fiera da pors era fullanada, mo quels tiers vevan quellaga pign esit e biars purs ein turnai a casa cun lur purschals.

Gasetta Romontscha nr. 47, 21 da november 1868

Introducziun da scolas per la giuventetgna

... Las novas scolas per la giuventetgna buc obligada pli da frequentar la scola elementara, per las qualas il davos cussegli grond ha decretau in subsidi cantunal, han ils vischinidis da **Rueras**, **Sedrun**, **Segnas**, **Mustér-S.Gions** e **Surrein** entschiet a menar en.

Gasetta Romontscha nr. 48, 28 da november 1868

Libra concurrenza

Il menar il carr dalla posta sursilvana sillas staziuns da **Glion** a **Trun**, da **Trun** a **Mustér** e da **Mustér** a **Tschamut** ei screts ora en libra concurrenza.

Gasetta Romontscha nr. 1, 1. da schaner 1869

Anflau

enzatgei daners sin via gronda denter **Mustér** e **Tujetsch**. Pli datier san ins s'informar ella stamparia a **Mustér**.

Gasetta Romontscha nr. 1, 1. da schaner 1869

Tut dependa dalla primavera

Il fein ei en consequenza dalla stupenta aura, nua ch'ils tiers manedels seviventan cun pauc ni negin Pavel, buca cars, denton dependa tut dalla primavera che fa. Tut ch'ei spanegiaus sin quella, cunzun era quels marcadonts, che han tier lur vaccas schon ussa cumprau e pagau varga 20 stiarls sco igl ei il cass en **Tujetsch**.

Gasetta Romontscha nr. 8, 19 da fevrier 1869

Sullas femnas e sul traffic

La fin dil carneval passau ei vegniu dau en **Surselva** pliras producziuns da cant e declamatoricas. La societat da cant dil **Badus** ha Gliendissidis Tscheiver divertiu ils Tuatschins cun sias bialas canzuns e siu leger declamatori cungius cun bein enqual remarca sullas femnas ed il traffic d'ozildi. ...

Gasetta Romontscha nr. 8, 19 da fevrier 1869

Posta

Il menar la posta da **Glion** a **Tschamut** ei puspei surdau als signurs frars Berther a **Trun** e **Mustér**.

Gasetta Romontscha nr. 10, 5 da mars 1869

(19) Tscheiver dils Romontschs emigrai

Nies stimau American dil **Péz Badus** ha puspei schau vegnir tier a nus ina humoristica correpondenza, nua ch'el scriva denter auter: «Jeu sai buca far cunmeins ch'entras in per lingias schar saver nos cars cumpatriots el **Grischun**, ch'ils emigrants romontschs emblidien buca via las isonzas romontschas ed hagien perquei era celebrau il tscheiver da purs e da signurs, mo culla differenza che quel ei vegnius celebraus en in di. Nunhavend en disposziun il fravi da **Medel**, han ins stuiu sesurvir d'ina musica americana, che fageva alzar las combas, schegie ch'enqualina ein ussa empau da veglias. In brav puschein ha ei buca muncau e cun enqualin eis ei iu cheu sco cun il fumegl dalla claustra da **Mustér**, ch'era ius a mises e magliau memia digl emprem, ch'el ha buca pudiu schigiar diltut. Ils Romontschs eran tier quella biala stiva representai bein da **Tujetsch** tochen **Cazas**.

Appartenet tier ils Romontschs tscheu, va ei bein ed ei ha legrau els da puder beneventar in niev emigrau sursilvan, sgr. scarvon Wieland da **Sumvitg** cun sia biala e numerusa famiglia. Speronza che l'**America** plagi ad els! Culla dretga curascha e bunaveglia sa ei tscheu nuota fallir. Il da viver ei dapresent empau da cars, mo en in per meins semida quei grad entuorn, nua che tut fadigia 7 – 15 frs. a di. – Culla religiun vegn ei era mintga di meglier e meglier. Nus cheu el pign marcau da **Stillwater** havein duas baselgias catolicas, ina irlandesa ed ina tudestga, ed omisduas ein mintga dumengia pli che pleinas. Nus Romontschs mein el survetsch divin tudestg, mo desiderassen zun fetg in Romontsch. Jeu sai da dir che la schlattaina romontscha va cheu zun bein vinavon, aschia ch'ins vesa, ch'ils vents americans ein tuttavia buca schliats per ils Romontschs, gie in spiritual romontsch vess tscheu gleiti ina biala caplania.

Nus havein in stupent unviern, grad neiv avunda per ina buna via da schletta e buca freid, mesjamna dalla tschendra mavan stellas sco da mesa stad. – Cun grond plascher retschevein nus la Gasetta Romontscha, sulet che nus deplorein ch'ella ei buca pli gronda. Nus recumendassen grondamein a mintgin egl jester e dumiesti da prender quella, lura speronza ch'ella vegness gleiti a s'engrondir ed aunc purtar pli bia novitads da nossa veglia patria. Bein enqual caussa tertgavel menziunar, mo essend cureisma e temps d'urar e giginar vi schar tochen in'autraga. Denton salidein nus l'entira **Surselva**».

Gasetta Romontscha nr. 11, 12 da mars 1869

Cufla da Pastgas

Il proverbi: „Nadal sin gassa e Pastgas sin pegna“ (ni sco tschel scheva „en pegna“) ei uonn severificaus; ella **Val Tujetsch** vul negin sereguardar d'ina semeglionta cufla sco quella dalla fiesta da Pastgas (28 da mars). Suenter la stupenta aura dils treis meins d'unviern, december, schaner e fevrer, ha igl entir mars ora neviu e fatg ruh ed ussa da calonda avrel havein nus a **Mustér** aunc tschun quartas neiv els plauns.

Gasetta Romontscha nr. 14, 2 d'avrel 1869

Tujetsch senza concurrenza

Tier la premiazion dils taurs a **Trun** ein compari 13 bials stiarls. Ils da **Breil** che han quest atun giu cumprau treis distingui taurs a **Sviz** per circa 50 marenghins, han era uonn giu la plema. Gl'emprem premi da 70 frs. ha il taur da Cavegn a **Breil** tratg a raschun ch'el possedeva tenor declaronza dil president dall'expertisa tuttas qualitads prescrettas per il premi; il secund premi 60 frs. ei vegnius renconuschius ad in stierl da landrehter Alois Latour, il tierz 60 frs. al taur dalla claustra a **Mustér**, il quart 55 frs. ad in stierl da Gion Petschen a **Schlans**, il quint e sisavel als taurs d'assistent Caduff a **Breil** e da capitani Placi Rensch a **Zignau**, 50 frs. per in. **Medel** e **Tujetsch**, nua ch'ins metta pli bia peisa sin biestga mascla, che sin bialas vaccas, han tenor solit fatg negina concurrenza tier quella premiazion.

Gasetta Romontscha nr. 16, 16 d'avrel 1869

Metter tiara

Tujetsch ha per tema d'ina tarda primavera giu bess tiara per ses funs entuorn, nua ch'ins leva arar, e quella lavur ei uonn stada corunada d'in stupent effect. Ils funs ch'eran cuvretgs cun ina nevada da 7 quartas, cura ch'ins ha bess tiara, ein en 10 dis stai terreins, aschia ch'ins ha schon entschiet ad arar leu. La tema da gronda scartezia da fein ei stulida, denton havein nus per miez avrel, ed a raschun ch'ins duei buca ludar il di avon la sera,lein nus era buca glorificar memia il discretau avrel, entochen ch'el ei buca finius.

Gasetta Romontscha nr. 16, 16 d'avrel 1869

Plontaziun

Quels dis ha la vischnaunca da **Tujetsch** plantau en in niev uaul sillla biala spunda dado **Selva**, nua ch'ella veva gia onn semnau in bi toc uaul. Sut atgna direcziun dil signur inspectur forestal Coaz, ha ella mess ora 5000 larischs, 2000 schiembers, 2000 pegns da duas sorts lenn. Quei ei la medema vischnaunca che ha dau 3400 francs per ranschar tier classenas petgasrap enstagl petgas da lenn, e che ha quels dis puspei vendiu enzatgei plontas veglias per tochen 30 francs l'ina. **Tujetsch** sa preziar e schaniar ses uauls, schegie ch'ina gasetta svizra ha cun caschun dalla davosa malaura columniau quella vischnaunca cun vuler pretender, ch'ella hagi sfraccau giu uauls sin moda devastonta. Cun raschun ei signur inspectur forestal publicamein seschaus si encunter quella totalmein faulsa reproscha, ed ha declarau, ch'ei detti buca ina vischnaunca, che schanegi pli fetg ils uauls e spargni schi fetg lenna sco **Tujetsch**, quella mereti da vegrir ludada e buca blasmada.

Gasetta Romontscha nr. 18, 30 d'avrel 1869

Scola da mintgadi

Sco ins auda ei ranschau en uonn 27 scolas d'unviern per tals ch'ein buca pli obligai d'ir a scola. Da quellas ein 5 che vegnevan dadas mintgadi e che han obtenu 100 frs. ina, ferton che quellas da duasga ad jamna han survegniu 30 – 35 frs. La **Cadi** ha a proporziun giu las pli biaras, ina da mintgadi a **Sedrun** e lu aunc 7 autras. Ils subsidis per quels scolasts, che tegnan scola da repetiziun firaus e dumengias ni in auter di da quei temps, ch'ei buca scola, flessegian per in auter onn primavera.

Speranza che quei futur subsidi promovi quei institut, schi necessari per buca schar emblidar via memia ils affons, cunzun per quels dallas classas inferiuras.

Gasetta Romontscha nr. 20, 13 da matg 1869

Survesta dils cuosts

La via sur l'**Alpsu**, da **Mustér** tochen tier ils cunfins uranès ha custau 362'360 frs. Subsidi dalla Confederaziun per l'**Alpsu** 200'000 francs. La via en **Surselva** da Rehanau a **Mustér** ha custau 617'503 francs.

Gasetta Romontscha nr. 21, 21 da matg 1869

Dil Badus american

Ord l'**America** havein nus retschiert da **Stillwater**, el stadi **Minnesota**, ina correspondenza anonima, che setegn si sugl artechel dil schinumnau „American dil Péz Badus“ cumparius en nr. 11 da nossa gasetta. Correspondenzas, nua ch'ils inserents astgan buca dar en lur num alla redacziun, prendein per principi buca si en nies fegl e stuein aschia era enviar anavos quella correspondenza americana. Nus savein denton segirar al tschelau correspondent, ch'igl American dil **Péz Badus**, hagi tuttavia buca manegiau schi mal cun sia humoristica descripziun dil tscheiver e biala stiva dils Romontschs, e cunzun buca vuliu renfatschar, ch'els seigien cheu buca secunteni „galantamein“.

Gasetta Romontscha nr. 23, 4 da zercladur 1869

Fiera

La fiera d'**Ursera** vegn uonn tenida ils 9 e 10 d.q., pia il di suenter quella da **Sedrun**.
Gasetta Romontscha nr. 23, 4 da zercladur 1869

Las cauras vevan mo tets e buca iver

La fiera da **Tujetsch** dils 8 da zercladur ei stada frequentada da bia glieud ed era da bia tiers, e zuar da tuttas sorts, ils Uranès han cumprau la pli part dils tiers ch'eran sin fiera e zuar per enorms prezis, las vaccas per 220 – 340 frs. Ils schinumnai tachis vevan grond esit, marcadonts da **Tujetsch** e **Medel**, che vevan cumprau vaccas il di avon sin il marcau da **Glion**, han saviu vender tuttas e zuar cun in bi bien gudogn e la tschontscha generala era, che sin quellas vaccas ch'ei vendien l'auter di sin la fiera d'**Ursera** gudognan ei aunc in bienton, schegie ch'ellas ein cumpradas carischia, essend sin la fiera da **Tujetsch**, era ein negins marcadonts auter che dad **Uri**. Era vadials tumprivs eis ei vendiu da biars, las cauras havevan uonn generalmein mo tets e buca iver, mo pagavan denton aunc biebein. La sera eis ei aunc dau ina buna plievgia da bunaura e lavau giu las purginas stadas ils dis vargai, ed ha fatg bein, quei tut ei aura pils purs.

Gasetta Romontscha nr. 24, 12 da zercladur 1869

A Cuera ein schualmas ventschidas dil freid

Ils 21 da zercladur ei stau in di dublamein liungs, pigl emprem eis ei il di pli liung tenor la regla dalla natira, e secundo eis el staus in snueivel liung muort l'aura ch'el ha purtau. Perdetga da quella verdad ein bia perveseders, che stuevan star sper lur muvels en nuegl senza haver da dar enzatgei vivonda a quels paupers animals e tedlar sin il burlir da quels tierets, aschia ch'ils tiers stuevan secuntentar cun esser silmeins schurmegiai dalla neiv giu pil dies. Per cletg eran paucas alps cargadas e quels che havevan cargau han stuiu vegnir a casa. Ils biars da quels tiers han stuiu secuntentar cun survegnir in nuegl cauld e sco ei sedi leger gasettas. Per cletg ei la neiv buca stada gronda, aschia ch'il mardis han ins saviu schar magliar la biestga. Il mender ein las nuorsas matei stadas, las qualas eran generalmein cargadas ed eran en ina neiv dad in bratsch ault. Denton para ei, che ariguard tussegadas purginas, mondi ei forsa ora biebein. Lein haver speronza ch'ei vegni ton pli spert a semidar e far ina aura pli fritgeivla da cheu naven, aschiglioc savein nus strusch cargar las alps. La pli pauca neiv eis ei stau a **Mustér** e **Tujetsch**, a **Mustér** era ei terrein che a **Sumvitg** era aunc tut alv. Sco ei para, era la neiv vegnida digl aschi malemporneivel **Crap Ner**, sco ei sedi e buca dil maun dil **Lucmagn** ni favugn. A **Cuera** ha ei neviu quater uras senza puder tschenttar sin via. Il donn vid las vegnas, il fein e garnezi ei gronds. Ei era leu ils 21 da zercladur, il pli liung di, schi freid sco ils 21 da december 1868, il pli cuort di, numnadamein 5 grads. La notg dils 21 e 22 ein a **Cuera** pliras schualmas ventschidas dil freid.

Gasetta Romontscha nr. 26, 26 da zercladur 1869

(20) Las prestaziuns dils taurs da Tujetsch tier la premiaziun ein insumma buca cuntenteivlas

Ils emprems hospes fan ina cura d'aria frestga. – Ils aviuls tuatschins ein aschi activs sco en auters cantuns svizzers. – A Bugnei vegn novissimamein ligiau cudaschs. – Ils Tuatschins americans s'annunzian bugen ella pressa romontscha. – Tujetsch ha refusau la lescha da rempars cun 61 vusch. – Sul Pass Alpus vegn vin vulclin senza pagar dazi. – La zoppina ei en in mises en Tujetsch.

Grischun

Il til dils jasters entscheiva ad esser ualti fermes en pliras valladas grischunas, oravontut en **Engiadina** ... Ella **Surselva** encuntercomi ei la frequenza da jasters aunc lunsch anavos en cumparegliazion cullas allegadas cuntradas e quels che passan atras setegnan si pauc, silpli ch'els fan da **Glion** anora ina excursiun sil **Mundaun** ni naven da **Mustér** sil **Muraun** per guder leu ina maiestusa vesta el mund alpin. Sulettamein **Sedrun** ha il cletg d'in diember gasts che fan leu ina cura d'aria frestga. Gasetta Romontscha nr. 30, 23 da fenadur 1869

Disgrazia

In pastur da **Tujetsch** ha sur il lag da **Tuma** sper il **Badus** anflau l'ossa d'in carstgaun, carteivel d'in mistergner che ha avon entgins onns falliu la via sur l'**Alpsu**.

Gasetta Romontscha nr. 33, 13 d'uost 1869

Raccolta da mèl

Sco ei tuna sin tuts mauns para ei che nus haveien en general in bien onn da fretg ed oravontut in oreifer onn per raccolta da mèl. Gassetas tudestgas han el davos riguard cartiu da rapportar in pèr remarcabels exempels. Cun caschun d'ina radunanza d'apiculturs seigi egl **Appenzell** vegniu presentau ina schaumna, che pesavi datier da 100 glivras: in apicultur dil **Toggenburg** hagi giu ina schaumna da 84 glivras ed obtenuu da 14 schaumnas 230 glivras mèl. Ei legra nus da saver rapportar dalla cuntrada dil **Badus** aunc pli splendids resultats. In pur da **Tujetsch** veva ina schaumna, che pesava 132 glivras, ed ha da sias duas schaumnas tratg ora 70 glivras mèl. In auter che possedeva 7 schaumnas, ha medemamein fatg questa stad la biala raccolta da 140 glivras flur da mèl. Ins vesa aschia che las flurs dil **Badus** han uonn era giu en mèl e ch'ils aviuls tuatschins stattan en activitat buc anavos als aviuls d'auters cantuns, els rendan bien quen a tgi che tractescha els en uorden. Ins vesa ch'ei maunca buca mèl e latg, sche mo nos marcadonts da fiera vegnan ussa aunc cun bravas buorsas marenghins.

Gasetta Romontscha nr. 39, 24 da settember 1869

Annunzia e recumandaziun

Il suittascret che ha empriu il mistregn da ligiar en cudischs tier il defunct Stehli a **Glion** ed ei silsuenter sepraticaus en quel cun viagiar per la **Svizra** entuorn, fa da saver ch'el seigi turnaus a casa e sedetti era giu leu cun ligiar cudischs. El serecamonda cheutras per lavur ad in ludeivel publicum empermettend da survir cun promta e solida lavur e per in dueivel prezi.

Emanuel Deragisch

Ligiacudischs a **Bugnei (Tujetsch)**

Gasetta Romontscha nr. 42, 15 d'october 1869

Petiziun da Tujetsch

Avon che serrar la sessiun ei aunc vegniu mess avon ina petiziun dalla vischnaunca da **Tujetsch**, nua ch'ei vegn detg: ella hagi unitamein acceptau la nova constituziun, buca senuspiu giud ils artechels che perscrivien allas vischnauncas in bien uorden, ina ludeivla indemnisiaziun per la gudida dils beins communals, e cristianeivel secuntener visavi ils domiciliai, mo a raschun che la constituziun seigi vegnida fiersa, duegi ins scriver ora ils dretgs dil pievel a partir sco elsstattan egl emprem capetel dalla refusada constituziun. Cheutras vegnien las cumpetenzenas dil pievel e dil Cussegli Grond determinadas scosauda ed ils cintinuai cumbats el Cussegli Grond sur tgei che seigi da scriver ora e tgei buc, calien si. Sin proposiziun da Gadmer ei il Cussegli Grond buc entraus en quella petiziun, ferton che A. Condrau veva proponiu da surdar quella petiziun al Cussegli Pign e cumissiun cantunala per schar rapportar

el proxim Cussegli Grond. Sche nus selegrein che la damonda dalla banca ei veginida scretta ora sil pievel, sche stuein nus da l'autra vart grondamein deplorar che quella impurtonta petiziun da **Tujetsch** ha anflau schi pign susteniment.

Gasetta Romontscha nr. 50, 11 da december 1869

Sal

La menadira dil sal da **Mustér** e **Tujetsch** ei el davos Fegl Ufficial scretta ora en libra concurrenza.

Gasetta Romontscha nr. 50, 11 da december 1869

Correspondenza americana

Cun plascher legin nus las novitads, che la Gasetta Romontscha porta a nus ord nossa veglia patria grischuna. Cheuencunter vi jeu era communicar enzatgei ord nossa nova patria americana. Ils Romontschs ein tscheu, ton sco jeu sai, tuts ualти taffers e dil rest va ei era cun ils biars ualти bein, enqual excepziun dat ei segiramein era. Nus havein tscheu in schliet onn pervia dils daners, ch'ein fetg scarts, gie ei vulan 15 – 25 per tschien tscheins, ferton ch'ins deva avon 5 – 8 procent. La vivonda ei buca cara ed ils biars survegnan quella senza daner blut. Ei dat schon era da quels, che han pauc criedi e per igl unviern empau da trit, il bia da quella glieud, che maglian oz si tut e fan buca cass da damaun. Nus havein tscheu fetg freid ed in pèr zolls neiv; las auas ein tuttas scheladas si 4 zolls gries, aschia ch'ins sa dapertut ir sur las auas ora cun cavals e cargas. Buna via da schletta per il tscheiver maunca ei aschia buc, savessen nus sin ina schlittada veginir ensem en nos Sursilvans el Grischun, fuss ei per nus fetg emperneivel e materia da conversaziun muncass ei cheu betg per umens e femnas.

Mo nunsavend quei daventiar vi jeu raquintar dad in auter viadi, che vegin ussa fatgs bia ell'**America**, il viadi en **California** silla viafier pacifica. Vivon duvrara ins per ir cun il vapur da posta naven da New York a S. Francisco 25 dis, ussa fan ins quei tur da 4000 miglias en 8 dis per 50 talers tut sin viafier. Dacuort ha nies cumpatriot Tias Decurtins, vivon ustier a **Trun**, fatg quei viadi cun aunc in auter Romontsch. Sco els han quels dis scret a **Minnesota** ein els arrivai saunamein an **California** ed han en quella allontanada tiara anflau dabia Romontschs. Ton per quels che vessen tschaffen d'ir ella tiara d'aur, mo ils biars Romontschs en **Minnesota** han buca grond tschaffen cheutier.

Co stat ei cul stradun sur il **Lucmagn?** Luvrei brav e dei buca suenter! Co stat ei cun nos vegls trochists da **Sursassiala?** Viva il bagat aunc ni ei mo il narr pli en veta? Tscheu veva il bagat era priu in'entschatta, mo el ei gleiti stulius e schau anavos mo il narr e quel ha pauc da far cullas troccas, sonder plitost cun ils daners.

Agurond in legreivel niev onn a tuts Romontschs salida sia veglia cara patria **Stillwater**, ils 6 da december 1869

In nativ dil **Péz Badus**

Gasetta Romontscha nr. 1, 6 da schaner 1870

Gronda rihezia

A **Regensburg** en **Baviera** ei ils 6 da schaner vegniu satrau in stimau um, nua ch'ins ha viu 42 Romontschs el til da sepultura. Ei era la bara da Joseph Deplazes *Deplaz* da **Tujetsch**, ch'ei en sia giuventetgna setratgs ella **Baviera** ed ha leu cun siu negozi da latg acquistau gronda rihezia. Mo el fuva era rehs en bunas ovras encunter ses numerus cumpatriots grischuns, che vegnevan schi savens tier el per encuir survetsch. La cumparsa da varga 40 Romontschs, che han vuliu render la davosa honur a lur benefactur, dat perdetga da sia beneficienzia. El rauassi en pasch!

Gasetta Romontscha nr. 3, 21 da schaner 1870

Grischun

La lescha da rempars ei acceptada dil pievel. ... La **Cadi** ha votau sco suonda: **Medel** 75 pro, 8 contra; **Tujetsch** 61 per refusar e 7 per acceptar (Quella vischnaunca hagi vuliu suandar gl'exempel dil Cussegl Grond, che hagi dacuort era quasi unitamein enviau anavos la petiziun da **Tujetsch** per far scriver ora danovamein ils dretgs dil pievel.), **Mustér** 101 per la lescha e 61 encunter, **Sumvitg** 109 pro e 12 contra, **Trun** encuntercomi ha refusau cun ina vusch, a **Breil** ein 30 stai per acceptar e 60 per enviar anavos.

Gasetta Romontscha nr. 6, 11 da fevrier 1870

Negina cumentientscha

El davos Fegl Ufficial vegn ei communicau extracts ord ils rapports dils experts per la premiaziun dils bos. ... ella **Foppa** e **Lumnezia** seigi il progress ella tratga da biestga medemamein veseivels, ferton ch'ins sappi buca secumentar cullas prestaziuns da **Tujetsch** e **Medel**.

Gasetta Romontscha nr. 6, 11 da fevrier 1870

Vin vulclin

El cussegl grond d'**Uri** ei vegniu signalisau ch'ei vegni sull'**Alpsu** menau en roschada buots vin vulclin senza pagar il dazi da consum e sin quei ei vegniu concludiu da schar intercurir quei pli datier. Il daziè grischun a **Tschamut** vess buna peda d'era trer en il dazi per **Uri**, ton pli che las respectivas entradas d'omisdus cantuns tonschan buc da cuvierer siu salari.

Gasetta Romontscha nr. 9, 4 da mars 1870

Premiaziun

Tier l'inspecziun dils taurs dalla **Cadi** a **Trun** ein cumpari 19 da quels armauls. ... Nus considerein per in progress che tuttas siat vischnauncas eran uonn representadas, era **Tujetsch** e **Medel**, che vevan onns ora priu negina part pli da quella premiaziun. ... L'honur che **Medel** ha giu uonn per l'emprema ga, lein nus sperar che **Tujetsch** hagi in auter onn, da ver a returnond dall'inspecziun da **Trun** in da ses taurs corunaus cun flurs e tschupials.

Gasetta Romontscha nr. 17, 29 d'avrel 1870

Banca

La banca cantunala ei fetg probabel acceptada dalla maioritad dil pievel **Grischun**. Dumengia vargada ha **Tujetsch** acceptau quella unitamein cun 114 vuschs. ...

Gasetta Romontscha nr. 21, 28 da matg 1870

Puspei inaga la zoppina

En **Surselva** fa la zoppina progress. Tras nuorsas jastras eis ella arrivada tochen sil **Lucmagn** e tras ina vacca cumprada sil davos marcau **Glion** eis ella rutta ora en in mises da **Tujetsch**. Sinquei ha **Uri** serrau encunter il **Grischun**, aschia che las proximas fieras da **Trun** e **Tujetsch** piteschan cheutras grond donn.

Gasetta Romontscha nr. 21, 28 da matg 1870

(21) A Tujetsch/Sedrun in extraordinari fenomen

Las viasfier dil **Lucmagn** e **Gottard** duessen s'unir ella Val **Tujetsch**. - Las sorts da fein a pastg han furniu alla cassa da vischnaunca varga 2000 frs. - Gleiti anflau la mort.- Vendiu bia vaccas per bials prezis. - **Tujetsch** ha 132 casas ed ei barschau giu en 70 onns 17 casas. - Subsidi per la biblioteca locala.

Devastaziuns dil Rein

L'expertisa federala per repartizion dils subsidis per ustonzas, consistenta ord sis personals, ei ils 30 da matg vegnida sull'**Alpsu** tochen **Mustér**. Ils 31 eis ella partida per **Glion** inspectond las devastaziuns dil **Rein** e dils runs.

Gasetta Romontscha nr. 22, 3 da zercladur 1870

Ina buorsa cun entgins daners

ei vegnida piarsa denter **Mustér** e **Tujetsch**. Gl'anflader vegn supplicaus da render quella al pot da **Tujetsch**.

Gasetta Romontscha nr. 22, 3 da zercladur 1870

Brevs che drovan ditg

Dapi che la posta sursilvana va sull'**Alpsu** drovan las brevs dalla **Cadi**, che van a **Rueun**, **Uors**, **Andiast**, **Pigniu**, **Siat**, **Ruschein**, **Ladir** e **Sevgein** 24 – 72 uras dapli per arrivar el liug da lur destinaziun, e quellas da **Lumnezia** e **Sursaissa** 24 uras. Tgisasche la Confederaziun pudess buca star ora da dar als respectivs curriers, che fan lur tur mo treis gadas ad jamna, entgins frans dapli pagaglia e far spitgar els a **Glion** entochen che la posta dall'**Alpsu** arriva?

Gasetta Romontscha nr. 27, 8 da fenadur 1870

Tujetsch el center della viafier federala

Signur colonel La Nicca ha dau ora ina broschura sur la questiuon dalla viafier alpina, nua ch'el dilucidescha siu enconuschen project cun bia tabellas e cartas. Tenor quei duessen las viasfier dil **Lucmagn** e **Gottard** s'unir ella **Val Tujetsch**. Enstagl da construir il colossal tunnel gottardistic, menass ins la viafier dad **Amsteg** naven ella **Val Maderana**, tras il cuolm **Rizli** a **Tujetsch** e da leu ensemblamein culla viafier da **Cuera** sur il **Lucmagn**. Al **Grischun**, che vesa ch'igl ei da far nuot cul **Spligia**, fuss quei plan favoreivels ed ei pudess schabegiar ch'era ils Gottardists, curdond sin ferms incaps tiella construcziun da lur tunnel, schassen plascher quella idea fusionistica.

Gasetta Romontscha nr. 28, 15 da fenadur 1870

Correspondenza dil Badus

Silla generala calamitad e lamentaschun d'ina magra raccolta da fein en quellas cuntradas, nua ch'ins ha buca saviu luvrar cull'aua da schuar, savein nus relatar ord il bi selvadi da **Tujetsch** aunc in ualti favoreivel resultat. Segir ch'il fein grass e magher ha era tier nus pitiu zun fetg en consequenza dalla gronda schitgira, schegie buca en quei grad, sco ellas cuntradas enviers giu il **Rein**. Tonaton po ins calcular, ch'ei hagi calau pli ch'ina tiarza visavi ad ina mediocre raccolta. Igl ei stau uonn ina da quellas snueivel raras excepziuns per nossa vallada, ch'il sulegl ei staus stagn caulds, schiglioc buca tgunsch che lez fetschi donn a nus, anzi pil gartetg dil garnezi, sco igl ei uonn il cass, munglassen nus schar barschar empau fein. Pil cal dil fein ha **Tujetsch** ina remedura, ina resursa en ses bials cuolms, pil cal dil garnezi aber sto ins prender il refugi tiels magasins ed arcuns – buca dall'**Egipta** – sunder dils hermès e negoziants.

Enconuschen eis ei en nies **Grischun**, tgei enormas massas fein **Tujetsch** recava mintga onn ord ses cuolms, ord ses beins communals, persesez encunter tutta dueivla indemnisiatiun visavi la cassa da vischnaunca. Sil cal general e penuria da fein da casa egl onn present, ha nossa ludeivla suprastonza concediu e stigiau ora els cuolms in'enorma quantitatad sorts per il schinumnafein a pastg. En publica radunanza ha gl'ingant da quellas sorts furniu alla cassa da vischnaunca varga 2000 frs., senza quintar las tschuncheismas fein, ch'ils paupers han saviu segar gratis. Ils particulars han uonn retratg ord las pastiras ina tala massa fein, che biars pretendan da haver en clavau schi bia mesira fein, sco in onn da buna raccolta. Remarcabel fuss ei, da vegnir sissu il diember da blahs u ponns fein, che **Tujetsch** ha uonn runau ord

ses cuolms, e valetar quels tenor carischia, sco il fein sto uonn probabel vegnir. Quei quen vegness a figurar in resultat, il qual giustificass cumpleinamein la sbursada da 2000 frs. en cassa da vischernaunca, tonpli che quels mellis pagan era deivets communals. Intervegnin nus quella rendita, sche vegnin nus medemamein a communicar ella als lecturs dalla Gasetta Romontscha. – Duess il negozi da tiers quest atun aunc trer mo empau, sche ha **Tujetsch** giu raschun, da celebrar uonn la fiesta federala d'engraziament cun in particular entusiassem.
Sur in auter rom d'industria dils Tuatschins vegnin nus cul temps a far nies rapport.
Gasetta Romontscha nr. 38, 22 da settember 1870

Neiv e cufla il davos october

Ella cufla dils davos dis d'october havess in Cavegn da **Breil** gleiti anflau la mort sill'**Alpsu**. Venderdis vargau ha el bandunau **Ursera** per alias duas suentermiezdi. Veggend sisum il lag, er'e stgir ed el veseva buca pli ils parricars sco fastitgs dalla via. Per buca rescarr dad ira surengiu ella stgiraglia, seresolva el da restar grad eri. El batta in toc buna via e va cheu a spass en tutta aura dallas sis dalla sera entochen las sis dalla damaun. Lura anfla el il stradun e va in toc vinavon. Nunpudend rumper via po el susentar umens da **Tschamut**, che vegnevan encunter ad el. Ella Rheinquelle a **Tschamut** pren el sin sia aventura in bien solver e dorma lu 24 uras e sededesta viscals e da bunaveglia.

Gasetta Romontscha nr. 44, 4 da november 1870

Vaccas per bials prezis

La fiera da s.Martin a **Mustér** ei ida meglier che quei ch'ins spitgava. Ina truppa marcadonts tudestgs e romontschs han fatg concurrenza e plirs ein i in grond toc encunter als tiers, che vegnevan menai sin fiera, giuviars entochen **Sumvitg** e siviars encunter **Tujetsch** e **Medel**. Sin quella moda ei vegniu vendiu bia vaccas per ualtri bials prezis, gie elllas han pagau cheu circa 3 marenghins dapli che silla lavagada fiera da **Trun** digl october. ... Ils capomarcadonts da **Tujetsch** e **Medel** han semtgau in per bravas roschas stiarls per la tiarza fiera da **Ligiaun**.

Gasetta Romontscha nr. 46, 18 da november 1870

1870-1880

Baghegiau il sontget da **Dieni** entras Duri Battesta Berther da **Dieni**; las duas statuas da s. Giusep e da s. Vendelin ein vegnidas tschentadas en da Vigeli Giusep Berther da **Dieni**. – El sontget sesanflan duas cruschs, ina da fier culla inscripziun Giusep Maria Peder, 53 onns, il matg 1843 vegnius per la veta entras in squatsch lavina enasi sut il **Draus**. Ina crusch lenn si per la preit culs bustabs J. F. C. R. = Giachen Fidel Cavegn da **Rueras**, ch'ei vegnius per la veta da cavar cristallas enasi **Val Giuv** odem la stad 1872.

Notizia da pader Baseli Berther

Correspondenza dil Badus

Denter las 10 – 11 dalla notg dils 12 sils 13 da fevrer ei vegniu observau a **Tujetsch** – **Sedrun** in extraordinari fenomen. Dil maun encunter mesanotg, sco nus numnein: **Strem**, **Caschlè** e **Mila**, s'estendeva vid il firmament, schiglioc tut sereins e stellius, ina maiestusa tarlischur semeglionta ad in schinumnau „nordlicht“. Igl observatur, secartend ch'ei seigi zanua el vischinont cantun **Uri** in grond barschament, cloma neutier auters aspectaturs ils quals eran dalla medema opiniu. Mo nunsavend nus novas, ch'ils proxims dis passai seigi stau barschament egl **Uri**, sch'eis ei evident, che quella glisch vegn dil nord, era sch'ella duess derivar mo dacheu, perquei che **Berlin** ha buca daditg sittau victoria sulla curdada da **Paris**. Ils perderts astrologs tscheu a **Sedrun** ein aber aunc en dispeta, schebein quei nimbus derivi da **Berlin** enneu, ni

sch'el fuvi schiglioc schon el contuorn da **Cuolm de Vi** e da **Caschlè**. Pertgei tenor ina veglia detga fussen las strias serimnadas ualts stedi entuorn la platta dil barlot sil **Cuolm Caschlè**, essend cheu in oreifer bi prospect e favoreivel liug da saltar.

Surschein pia alla madira ponderaziun da scadin lectur, da lignar sche quella glisch sura allegada seigi naturala ni sch'eis fuisse mo stau las scuas da fiug dallas strias, che tenevan da quellas uras lur tscheiver.

Gasetta Romontscha nr. 7, 17 da fevrier 1871

Assicuranza da fiug

Naven da 1800 – 1870 vein nus il sequent resultat:

Tujetsch cun 132 casas ei barschau en 70 onns 17 casas. ... Il pli grond barschament ein staus: 1822, ils 11 da fenadur, ei igl entir vitg da **Camischolas a Tujetsch** barschaus giu cun 14 casas.

Gasetta Romontscha nr. 11, 17 da mars 1871

In asen fa biars asens!

La jamna vargada ein ils prezis e la tscherca dils stiarls carschi zun fetg tut anetgamein. In marcadont uranès ei vegnius ella **Val Tujetsch** ed ha entschiet a cumprar si stiarls per bials prezis, el medem temps ei lura arrivau brevs dalla **Italia**, ch'ins spetgi leu sin d'atun tscherca da tiers. Quei ha dau fiug, marcadonts dad **Uri**, da **Tujetsch e Medel** ein spert dai dalla **Surselva** giu ed han cumprau si sfraccada stiarls e pagau tochen 8 marenghins il tgau, ferton ch'igl ei sillla fiera da **Ligiaun** dil davos october vegniu vendiu per 7 marenghins il pèr. Tgei miadada! In marcadont ha denton remarcau: In asen fa biars asens!

Gasetta Romontscha nr. 14, 7 d'avrel 1871

La fiera da Sedrun

che curdass uonn sillla fiasta da Sontgilcrest vegn tenida il di avon q.e. mesjamna, ils 7 da zercladur.

Gasetta Romontscha nr. 20, 18 da matg 1871

Uniun da Pius dalla Cadi

Ord la cassa dall'uniun vegn ei tenor conclus dau uonn in subsidi per il cant ecclesiastic a **Surrein** ed in per la biblioteca locala da **Tujetsch**.

Gasetta Romontscha nr. 21, 26 da matg 1871

Sterschau

sin via orda **Medel** tochen **Tujetsch** sis nuorsas bergamasca. Tgi che anfla quels tiers ei supplicaus da metter a mauns quels a gerau Lucas Cavegn a **Sedrun** encunter ina bonificaziun da 3 frs. il tgau.

Gasetta Romontscha nr. 24, 16 da zercladur 1871

(22) Tujetsch culla plema dil progress

In Englès sparier vegn la finala anflaus. – Smanatschas dils vagabunds. – Bunas nova per la fiera da Ligiaun. – Cun siatonta cavals. - **Tujetsch cun bi glin e daried sem.** – Ina vacca per vegn marenghins. Il novembre flurs sill'Alpsu.

Professer Giachen Giusep Hitz

Ils 10 d'uost 1871 ei miert el **S. Gagl** in spiritual grischun, bein enconuscent ad ina troppa discipels ord tuttas valladas catolicas da nies cantun, igl ei signur professer Jacob Josef Hitz da **Tujetsch**, nevs digl enconuscent erudit decan Hitz p. m. El era naschius ils 6 da matg 1806. Sco bia auters da nos spirituals catolics da sia generaziun

ha el fatg il gimnasi a **S. Pieder** ed ils studis liceals a **Solothurn**, la quala scola gudeva da quei temps tier ils catolics meglier criedi ch'ozildi. La teologia ha el studiau el seminari a **Cuera** ed ei vegnius benedius ora 1834. Gl'onn suenter eis el vegnius numnaus instructer dalla scola cantunala catolica, che flureva da quei temps ella abbazia a **Mustér**. El e siu amitg e collega Martin Durgiai eran denter ils professers da quei institut, quels che levan nuota saver da translocar la scola a **Cuera**, prevedend che quella translocaziun seigi igl emprem pass tier l'uniun dallas scolas cantunalas. Da 1842 – 1846 ha el professorau a **Cuera** ed ei in onn vegnius honoraus culla piazza da rectur. Igl onn 1846 ha el obtenu ed acceptau in clom ella scola cantunala **S. Gagl**; da leu eis el 1857 setratgs egl institut a **Sviz**. Suenter in professorat da 18 onns, nua ch'el sedestingueva tras diligenza, premura e bien dun da communicaziun, eis el serertratgs silla caplania a **Kaltbrunn**, cantun **S. Gagl**, nua ch'el era stimaus e carezaus da tut ses parochians. Nunspitgadamein survegn el ina greva malsogna e miera schon il tierz di. El ruasssi en pasch!

Gasetta Romontscha nr. 33, 18 d'uost 1871

In'aventura per in Engles

Dacuort vegnan dus Engles giu dal **Badus** el Hotel Rheinquelle a **Tschamut** e spetgan leu sin lur tierz cumpogn, che fuva restaus empau anavos sul **Lag da Tuma** si. Ei vegn notg ed igl Engles selai aunc buca ver. Ses camerats plein tema, ch'el hagi falliu la via, ni ch'ei seigi schabiau zatgei, tarmettan umens cun latiarnas e proviant sil **Cuolm** per encuirir el. L'entira notg traverseschan quels plirs cuolms e **Vals**, greschan e schulan, mo anflan negin fastigt dil sepiars. Allas treis arrivan els anavos a **Tschamut** e declaran, che sch'el sesanfli aunc sil cuolm, seigi el buca pli en veta, tschelluisa havessien ei cun dar sinzur stuiu anflar el. En mesa desperaziun van allura ils dus Engles culs dus umens sin nova tscherca, ferton ch'ei vegneva a **Sedrun** patertgau vid il cavar fossa per il disgraziau. La nova expedizion ei buca stada s'avanzada ton lunsch, ch'ella entaupa igl Engles cartius morts. Quel di, ch'el vevi falliu la via e nunsavend nua semenar el stgir, seigi el sefiers sin ina meidia fein a pastg e durmiu stagn e bein tochen per la damaun vi. En triumf meinan ei el el hotel, nua ch'el ha dustau siu appetit engles cun in brav solver "alla savetscha" e pagau generusamein ils umens, che vevan encuretg el. Ina tala aventura vala bia marenghins els ecls d'in Engles.

Gasetta Romontscha nr. 35, 1. da settember 1871

Cun vestgadira paradisaica

Ils 29 d.q. ei arrivau ina banda da 22 zagrenders sur l'**Alpsu** entochen **Tschamut**, en quei plirs affons en vestgadira paradisica. Mo ina roscha naziunalgardists tuatschins sut commando dil schendarm Hosang, ha la damaun dils 30 turnentau quels gasts danunder ch'els eran vegni. Natural ch'ei ha buca muncau protestas, reclamaziuns e smanatschas da vart dils vagabunds.

Gasetta Romontscha nr. 35, 1. da settember 1871

Bialas roschas da stiarls

Sut favoreivla aura ein ils marcadonts da **Tujetsch** e **Medel** ils 22 d.q. semess sin via cun lur bialas roschas per frequentar la fiera da **Ligiaun**. Schon da bia onns enneu han quels buca giu schi numerusas roschas. Essend ch'els han cumprau quels tiers, cunzun la primavera, bienmarcau e che las novas dall'**Italia** ein bunas, pon ins sperar ch'els fetschien uonn ina buna campagna.

Gasetta Romontscha nr. 38, 22 da settember 1871

Siatonta cavals

Ils 19 d.q. ei sin ina excursiun militara sut direcziun da colonel Hofstetter arrivai a **Mustér** sur l'**Alpsu** 60 officiers ed aspirants ord la scola centrala a **Thun** cun 70

cavals. Ils 20 serendan els a **Glion**, ils 21 a **Cuera**, nua che la cumpignia pren sia fin.
Gasetta Romontscha nr. 42, 20 d'october 1871

Correspondenza dil Badus

Essend ussa, entras scuder ora il garnezi, la laver annuala dil pur finida, resalvond il pagar ils deivets, sche sa igl agricolant far il meglier la bilanza da sia raccolta. Jeu senuspeschel da vuler dumbrar e quintar ora si per la detta a nos purs la rendita d'uonn, quei quen san els sez excellent; jeu riscass mo da far errurs, las qualas els vegnessen buca ad approbar. Dad ina caussa fetschel jeu cheu menziun sin miu agen risico. Igl ei enconuschent daditg, ch'ei dat a **Tujetsch** bi glin e daried sem. Ina vieua cun numerusa famiglia ha questa primavera semnau mesa curtauna semglin e fatg da quei sem gl'atun 16 curtaunas, che ha pia dau 8 curtaunas per minal e vegness 32 curtaunas, ni 8 stèra per curtauna, - ina raccolta aunc mai s'udida! Quella caussa ei aber factum. Speronza ch'ina tala benedicziun vegni buca a schar schigiar en il briec dad ieli da quella vieua, grad sco il profet Elias ha annunziau alla vieua da **Sarepta**, ch'igl ieli vegni buca muncar el vischi, entochen ch'ei detti plievgia.

Gasetta Romontscha nr. 44, 3 da november 1871

Il november flurs sill'Alpsu

La stupenta aura gida era empau tier il viv commers da biestga. Buca mo ella **Bassa** era a **Trun** vesan ins in pirer che flurescha. Sill'**Alpsu** han ins il november anflau flurs ed umens che han dacuort passau quei pass e che audan tuttavia buca denter ils ferms e robusts, han dil cauld stuiu trer ora geppa e viu a pasculond leu roschada armauls sco da mesa stad. Quei era in di, nua che la nebla alla **Bassa** rendeva leu ualts freid.

Gasetta Romontscha nr. 45, 10 da november 1871

Prezi da tiers

A **Tujetsch** ei quels dis vegniu vendiu ina vacca per 20 marenghins – in schi ault prezi ei leu aunc mai vegniu pagau per ina vacca.

Gasetta Romontscha nr. 1; 5 da schaner 1872

Cuors postal

Sco ins auda dat ei ina midada cul cuors postal sur l'**Alpsu** pil temps da stad, aschia che la posta dad **Ursena** e quella da **Cuera** arrivan per la sera a **Mustér** e restan leu sur notg per l'autra damaun beinmarvegl partir per **Cuera** ed **Ursena**.

Gasetta Romontscha nr. 3; 19 da schaner 1872

Correspondenza dil Badus

La jamna vargada, ils 11 d.q., era scret ora la conferenza parziala dils scolasts per **Sursassiala a Tujetsch/Rueras**, la quala ei vegnida frequentada fetg fallombramein. Il signur inspectur, il qual saveva muort sufficients motivs buca cumparer sez, ha per quei di giu surdau il presidi ad in versau e permurau persunal. Ton pli schliata impressiun ha ei fatg sils presents scolasts ed auters amitgs dalla scola, ch'il signur referent cun auters da ses collegas ord la medema vischnaunca, han quei di vuliu tarlischar entras lur absenza, malgrad ch'ils absents sezs vevan proponiu **Rueras** per liug da conferenza. Nuotatonmeins ha la conferenza giu liug ed ei stada interessanta muort la viva discussiun, sco era muort il collegial tscheiveret suren, il qual ils separatists han buca saviu turbelar. Quella sempla caussa ha zuar negina muntada europeica; aber en in temps, nua ch'ei vegn fatg uiara da tuttas autoritads encunter la scola dil pievel ed era schon fatg la proposiziun da metter tuts garmadis scolasts cantunals sut la bitgetta controlla ed inspecziun dall'omnipotenta ligia, lessan nus per beinmanegiar e beinvuler a tuts educaturs dils affons e schar il quet, l'ambiziun, la schalusia en cucagna, nua ch'ei setracta da luvrar cun forzas unidas

communablamein per ina aschi impurtonta e sontga caussa. E viva pia l'uniun e contralisaziun dils scolasts sursassials!

Gasetta Romontscha nr. 3; 19 da schaner 1872

Tramess en

Sch'il scolast criticau ella correspondenza dil **Badus**, el nr. 3 dalla Gasetta Romontscha, il qual dueva esser referent tier la conferenza da scolasts a **Rueras**, ei buca cumparius tier quella, sch'ei quei daventau ni per vuler esser separatist, ni per quet, ni per ambiziun, ni per schalusia, mobein per autras raschuns. El auda denter quels scolasts che han entochen ussa frequentau tuttas conferenzas.

Sch'il correspondent digl ault **Badus** temeva ch'ils absents, numnai separatists, havessien giu turbelau il collegial tscheiver dils presents, sche stuein nus per ussa gratular ad els ed a nus, che nus essan stai absents.

Era nus schein culla correspondenza dil **Badus**: Ei vivi il spert d'uniun denter ils scolasts, - e mettein vitier: E pireschi il spert da malfundada critica che metta disuniu!

Gasetta Romontscha nr. 4; 26 da schaner 1872

La plema dil progress

La cumissiun da taglia el districst **Reianteriur** ha anflau sequent resultat cun prender si leu la rauba ed industria (*rendita*) suttaposta alla taglia, schend tenor ordinaziun la facultad communal sco quei ch'ella fuva dada en vivon.

	Facultad	Carschament	Rendita	Taglia totala
Tujetsch	1 032 200	136 450	9900	1877
Medel	554 000	42 100	1900	1012
Mustér	1 937 100	111 500	40 900	3799
Sumvitg	1 328 100	71 800	6900	2441
Trun	1 141 200	44 000	21 200	2233
Schlans	160 400	-	600	299
Breil	854 400	103 200	6500	1793
	7 152 500	504 550	87 900	13 456

La plema dil progress economic ella **Cadi** auda aschia a **Tujetsch**, nua che latg e mèl flessegian en abuldonza.

Gasetta Romontscha nr. 5; 2 da fevrer 1872

(23) Ils cavacristallas a Tujetsch han uonn fatg buna fadigia

Fiug en Tgès'Alva – Ventgotg emigrants tuatschins – Buna fiera - Fuorns che han dau ora cristallas per varga melli francs - Vegniu engulau in schambun ord la vanaun - Dad ina schi ferma purgina el settember seregorda negin – Camiadas cun imposanta clarezia

Fiug a Sedrun

Tenor ina nossa correspondenza dil **Badus** ei era il vitg da **Sedrun**, ils 26 da fevrer, staus en grond prighel da vegnir intschendraus per ina gronda part. Duront in ferm suffel ha suentermiezdi via ella aschinumnada „Casa alva“, in baghetg da quater cussadents, il fiug entschiet a fugar cun vehemenza ord ils quater uni tgamins. Alla curaschusadad d'entgins umens, che han stuppuai ils tgamins ordado e cun dar in lavatgau sutsi culla sprezza ei reussiu d'allontanar il prighel, che duess esser in niev spieghel per procurar in bien cundrez da fiug.

Gasetta Romontscha nr. 9; 1. da mars 1872

Emigraziun

Questa jamna han puspei circa 120 emigrants bandunau nies cantun per serender ella tiara dalla cucagna americana. Per nies cantun ei quella sperdita da forzas da lavour e da facultad da donn, e che plirs dils emigrants anflan buca la gronda fortuna, ch'els spetgan da tschei maun dalla mar, ei era ualts probabel. El legra nus, cura che vivon emigrai Grischuns vegnan puspei ord l'**America** sin viseta tier nus, mo ei displai grondamein, ch'els dattan caschun tier novas emigraziuns. El davos transport era ei 50 dalla **Cadi** ed en quei 28 da **Tujetsch** cun in um da 70 onns, che han intrasglauter purtau naven quasi 1000 francs perin. En 20 onns ha quella vischnaunca, schegie ch'ei flessegia leu latg e mèl en abundonza, furniu 160 emigrants.

Gasetta Romontscha nr. 15; 12 d'avrel 1872

Act d'engraziament

Nus suittascrets passagiers da Brown e comp. a **Basel** e **Havre**, tuts ensemens 117, secartein ch'ei seigi nossa obligaziun d'exprimer a signur J. Paul Balzer, agent a **Cuera**, che ha accordau e cumpignau nus entochen tier la mar, nies profund engraziament per il bien quita ch'el ha giu per nus en scadin riguard, per siu ludeivel tractament e sias sacrificias duront igl entir viadi, cullas qualas el ha encuretg da levgiar a nus quel. Perquei recumandein nus grondamein signur Balzer a scadin che vegg suenter nus ell'**America**.

Havre, ils 12 d'avrel 1872

Jacob Antoni Beer cun famiglia
Vigilius Josef Beer
Gion Venzin
Josef Antoni Muggli
Gion Fidel Muggli
Jacob Martin Beer
Gion Antoni Hendry
Gasetta Romontscha nr. 17; 28 d'avrel 1872

In bien nurser

per circa 1300 nuorsas vegg per la proxima stad, encunter buna pagaglia, encuretgs dalla vischnaunca da **Tujetsch**. Ulteriur sclariment dat la suprastanza.

Gasetta Romontscha nr. 17; 28 d'avrel 1872

Emprema crotscha

Ils 24 d.q. ei l'emprema crotscha veggida sull'**Alpsu**, sils 25 veva il viè grischtun empustau umens per arver scosauda la via da nies maun. A raschun ch'il cantun ei s'obligaus da pagar la mesedad da quels cuosts, vegg ins a saver s'accordar da procurar per igl avegnir ina pli presta avertura culla speranza ch'ils Uranès porschien maun tier quei progress.

Gasetta Romontscha nr. 26; 28 da zercladur 1872

Fiera

Il negozi da stiarls e mutgs per la fiera da **Ligiaun** ei ualts vivs ella **Cadi**. Ils biars marcadonts da **Tujetsch** e **Medel** han schon ussa fatg buna fiera, essend ch'els han vendiu lur roschas - en tut circa 450 armauls, quasi tut mutgs, ad in ferm marcadont dad **Ursera**, s'entelli cun far in bien gudogn.

Gasetta Romontscha nr. 34; 23 d'uost 1872

Cristallas

Ils cavacristallas a **Tujetsch**, **Mustér** e **Medel** han uonn fatg buna fadigia. Els ein stai ventireivels egl anflar ed han era saviu vender bia ed ualts car. Igl ei veginu discuvretgs fuorns che han dau ora cristallas per varga melli francs in, in sulet toc vess

ins saviu vender per 250 francs. Ad **Ursera**, nua ch'ei dat bials cabinets da mineralias, per part oriundas dalla **Cadi**, ei vegniu purschiu 800 francs per in cristagl, mo il vendider vul buca dar quel per meins che 1000 francs.

Gasetta Romontscha nr. 35; 30 d'uost 1872

Vagabunds

En **Tujetsch** e contuorn han vagabunds selubiu plirs enguladetschs. Ina dumengia duront ch'ils da **Selva** fuvan a messa, ei leu vegniu engulau in schambun ord la vanaun e tier quei aunc fatg ina viseta alla combra da carn. A **Camischolas** veva in milissier semtgau siu resti necessaris ella presenta campagna, turnond el ord baselgia, vevan ei priu ad el las caultschas dall'uniforma ed entginas bunas camischas

Gasetta Romontscha nr. 36; 6 da settember 1872

Cristallas

Il cavar cristallas ella pezza ei sco la catscha da camutschs ina pissiun, omisdus han lur emperneivladads, mo era lur prighels. Igl emprem enconuschider e negoziant da cristallas, Giachen Fidel Cavegn da **Rueras**, che steva en relaziun mercantila cun mineralogs da differentas tiaras, ha ils 12 d.q. stuiu schar la veta cun encuir crappa. Semtgaus cun siu camerat per turnar a casa, va el aunc vi si per in grep per mirar ina raschera. Strusch ha el entschiet a marclar, rump' ei ora sidault crappa, che vegnan giu sin el, smaccan en las costas ed il tgau e fieran el carteivel schon morts giu denter il glatscher e la greppa, nua ch'el ei l'autra damaun prius siado e purtaus a casa. Siu fegl, ch'era staus tier la concentraziun dalla truppa a **S. Gagl** ed era sco ses camerats leds da puder turnar tier ses cars da casa, ha tras telegraf retschiert quella trestissima nova tier siu retuorn dil **Rossboden**.

Gasetta Romontscha nr. 38; 20 da settember 1872

Ferma purgina

Silla magnifica aura dallas duas empremas jamnas settember ei suandau ina ruha, che ha purtau dumengia vargada ina ferma scheltira. Il termometer da Reaumur, che mussava enzacons dis avon aunc 19 grads calira, era quella damaun sbassaus sin null. Sils cuolms era il tratsch schelaus sco in fier e tschep e leu vesevan ins gronds glatschs vid ils buntaduirs. Ils grauns egl ault, ch'eran aunc buca madirs, han pitiu fetg. Dad ina schi ferma purgina el settember seregorda negin, denton ei quella tuttina buca stada schi nuscheivla sco quella ch'ei, tenor igl urbari da **Tujetsch**, stada in settember el 17avel tschentaner ed ha giu ruinau leu tut ils èrs, aschia che 80 persunas, babs da famiglia cun dunna ed affons han stuiu emigrar ell'**Ungaria** per buca murir dalla fom.

Gasetta Romontscha nr. 39; 27 da settember 1872

Suffels, dracca e neiv

L'aura ei snueivel variabla. Sin bials dis da stad sogn Martin, ha ei dau tribels suffels, dracca e neiv. Tutteninaga ha ei lura la sera dils 2 da december entschiet a camegiar e tunar e cuntuau ditg sco da mesa stad. Silla neiv, ch'era a **Tujetsch** e **Medel** in bratsch aulta, rendevan las camiadas imposanta clarezia. Dad enzatgei semegliont san biars buca seregurdar.

Gasetta Romontscha nr. 49; 6 da december 1872

Zoppina

A **Tujetsch** ei la zoppina rutta ora cun quei ch'igl ei vegniu turnentau in taur dalla davosa fiera dad **Altorf**.

Gasetta Romontscha nr. 50; 13 da december 1872

Lavina cuviera ina casa a Selva

Sin reclamaziuns tuatschineras stuein nus en rectificaziun da nies davos numer rapportar, ch'ei hagi l'entschatta december dau a **Tujetsch** buca mo in bratsch neiv, mobein 7 quartas! Aschia eis ei da capir, ch'igl ei a **Tschamut** e **Selva** vegniu lavinas da tuts mauns, mo per ventira han quellas buca fatg considerabel donn. A **Tschamut** ei il hotel Rheinquelle mitschaus cun ina brava pugnada, a **Selva** era ina casa cuvretga en dalla lavina. Particulara ventira ha leu in affon giu, ch'era la sera s'entardaus empau da vegnir ord casa da scola, che schai sin in ault dadens il vitg. Sin siu retuorn vegn el surprius dalla lavina, per ventira ual sper in crest, nua che la lavina sesparta, aschia ch'el fuva sin tuts mauns serraus en da quella sco en in curtinet. In chischner ei vegnius stuschaus dalla lavina in toc tut sidretg. Ils avdonts dil pei dil **Badus** ein per quellaga mitschai culla tema.

Gasetta Romontscha nr. 50; 13 da december 1872

Zoppina

Sco unfrenda dalla zoppina grassonta en **Tujetsch** ein schon ina troppa vadials giuvens ventschi a **Tujetsch** – in donn da bia mellis en consideraziun da lur caraschia dad uonn. Armauls che han giu la malsogna avon paucs onns, tuornan a pigliar ella danovamein.

Gasetta Romontscha nr. 51; 20 da december 1872

Dubel cuors postal

Finalmein para era la **Surselva** da survegnir in dubel cuors postal temps da stad. Tier igl ordinari cuors sull'**Alpsu**, che va la damaun naven da **Cuera** ad **Ursera**, duei aunc vegnir ranschau en in secund che va naven da **Cuera** las $10 \frac{1}{4}$, cura ch'igl emprem tren dalla viafier ei leu arrivaus e vegn entuorn las 6 a **Mustèr** per l'autra damaun serender ad **Ursera**.

Gasetta Romontscha nr. 3; 17 da schaner 1873

1873

In bien e fidau spazzatgamin

vegn encuretgs per la vischnaunca da **Tujetsch**. Aspirants ston esser provedi cun buns attestats e tochen la fin dil present meins da mars tarmetter tier quels alla suttascrettia ed era dar en lur condiziuns en scret ni a bucca.

Sedrun, ils 10 da mars 1873

La suprastoza da vischnaunca

Gasetta Romontscha nr. 11; 14 da mars 1873

(24) Quella saluteivla ordinaziun communala mereta imitaziun.

Ina vadiala per 130 frs. – Ina schurnada da 7 - 10 frs. - Cun 300 stiarls fatg in splendid gudogn. – In bab maridaus treis ga cun 20 affons. – Sebarschai cun neolin. - In abnorm stan da sanadad dalla glieud.

Exorbitants prezis

Sco raritad vegn ei notificau a nus, ch'ei seigi vegniu vendiu a **Peiden** ina vadiala da 10 jamnas per 130 frs., mo a **Tujetsch** ei vegniu pagau 150 frs. per ina vadiala ed a **Mustér** vess ins aunc pagau dapli per ina, sch'ella fuss stada venala. Sin quels exorbitans prezis e grond esit dils tiers fuss ei da giavischar in carschament da quels, sco ei vegn raquintau dad ina caura a **Zignau** ch'ha fatg onn 5 anseuls ed uonn 4 e dad ina nuorsa en **Tujetsch**, ch'ha 4 tschuts.

Gasetta Romontscha nr. 13; 28 da mars 1873

La fiera da Tujetsch

che curdass uonn sin dumengia, vegn tenida gliendisdis, ils 9 da zercladur.

Sedrun, ils 28 da matg 1873

La suprastonza

Gasetta Romontscha nr. 22; 30 da matg 1873

Cuors dubel sull'Alpsu

Gl'emprem fenadur entscheiva la posta dall'**Alpsu** cun siu dubel cuors. Gl'emprem parta da **Cuera** la damaun las 5 e 30. ... ed arriva las 6 (18) e 30 ad **Ursera**. Il secund cuors banduna las 11 da miezdi **Cuera** ... e vegn ad **Ursera** allas 9 (21) e 55. ... **Uri** ha fatg uonn pli plaun ch'onn d'arver l'**Alpsu**, ils umens uranès han giu gronda lavur cun fierer ora la neiv dil **Gottard**, nua ch'ina troppa Tuatschins ein vegni en agid ed han fatg ina schurnada da 7 – 10 frs. sin quen dalla Confederaziun, che sto pagar quellas lavurs.

Gasetta Romontscha nr. 26; 27 da zercladur 1873

Generus susteniment

Contribuziun per susteniment dils persequitai spirituels catolics dalla **Svizra**.

Contribuziun da **Tujetsch** en duas ratas tras signur farrer e caplon 100 frs. ...

Il comité dall'Uniun da Pius

Gasetta Romontscha nr. 30; 25 da fenadur 1873

Reteniu il fiug

Duront il ferm temporal da venderdis sera ei il tun daus giu en in uaul a **Tujetsch** e mo cun gronda breigia han ins pudiu retener il serasar dil fiug.

Gasetta Romontscha nr. 32; 8 d'uost 1873

Fiera

Ils marcadonts da biestga entscheivan a semetter sin via per la fiera da **Ligiaun**, tgi cun tema e tgi plein speronza e fidonza sils aults prezis e bien esit. Sch'ei paghi sco onn, seigi ei aunc adina da gudignar, schegie ch'ins hagi cheu pagau car. La pli gronda roscha ch'in da nos marcadonts ha enzacuras catschau sur cuolm, ei quella da Paul Schmet da **Tujetsch**. El ei semess sin via cun 270 tgaus e zuar la gronda part mutgs. Sin ses 300 armauls, ch'el ha giu la stad per las alps entuorn ha el piars 11 – in bi capital - , mo aunc adina moderada sperdita sin ina tala massa tiers. Bien viadi e buna fortuna!

Gasetta Romontscha nr. 38; 19 da settember 1873

La fiera da Rueras

dils 12 d'october che croda uonn sin ina dumengia, vegn tenida il di suenter, gliendisdis ils 13 d.q.

Gasetta Romontscha nr. 41; 10 d'october 1873

Speronza sin buna fiera

Il renomau marcadont da **Ligiaun**, il qual ha cun ses 300 tgaus giu fatg in splendid gudogn sill'emprema fiera da **Ligiaun**, ei quella ga puspei semess sin via cun circa 280 armauls. Duess la gronda catschada da tiers buca lavegiar il giug, sche speresch'ins muort la gronda tscherca da tiers e la gronda abuldonza da pavel, sin ina buna fiera. Denton bien viadi!

Gasetta Romontscha nr. 42; 16 d'october 1873

Cadi.

Tuts quens dil defunct Placi *Sigisbert Monn* da (**Rueras**) **Tujetsch**, che seteneva si a **Lyon** (*morts el spital ils 9 da fevrer; 35 onns*), ein da consignar a siu curatur Tumaisch

Huonder da Rueras.

Gasetta Romontscha nr. 47; 21 da november 1873

Ils uauls

... aschia ch'ina tschuncheisma lenna en **Tujetsch** ha bia meins valeta ch'ina ellas **Pardialas d'Uors**. Taxaziuns dils uauls communals: **Tujetsch** 37'000 frs., **Medel** 25'000 frs., **Mustér** 80'000 frs., **Sumvitg** 168'000 frs. **Trun** 50'000 frs, **Schlans** 20'000 frs., vischnaunca da **Breil** 101'000 frs., vischinadi da **Breil** 6600 frs. ...

Gasetta Romontscha nr. 48; 27 da november 1873

Vegn affons

Sin nossa davosa nova da **Tavanasa** vegn ei communicau a nus, ch'ei vivi sisum la val **Tujetsch** a **Tschamut** ina lètg che seigi onn (*ils 24 da zercladur 1872 in Gion Battesta ed in baret*) ed uonn (*ils 8 da december 1873 in Gion Battesta ed ina Maria Giuseppa*) vegnida benedida cun schumellins, ils emprems seigien morts, mo ils davos sauns e viscals. Lur bab (*Gion Martin Peder*) ei 53 onns vegls, maridaus per la tiarzaga, da ses 20 affons ein 13 aunc en veta. Sia davosa dunna (*Anna Maria Riedi*), ch'ha en aschi cuort temps survegniu 4 affons ei 43 onns veglia. «Non erit statim finis!»

Gasetta Romontscha nr. 51; 17 da december 1873

1874

La votaziun suls 3 pugns da recapitulaziun (I lescha pils domiciliai, II lescha d'ingant, III lescha riguard pagar giu grevezias perpetnas) ha dau sequent resultat ella **Cadi**:

	I		II		III	
	pro	contra	pro	contra	pro	contra
Tujetsch	47	27		86		80
Medel	14	92		106	1	105
Mustér	122	19		138	9	113
Sumvitg	137			132	113	
Trun	91			91		91
Schlans	16	1		17		16
Breil	52			51	1	46
Total	479	139		621	124	451

Gasetta Romontscha, nr. 5, 30 da schaner 1874

In Bavarès

Sco raritad relatein nus ch'in marcadont bavarès hagi a **Tujetsch** perfin cumprau si vadialas giuvnas per saver catschar quellas ton pli bein e cheutras survegnir ton meglieras vaccas da nossa razza. Per destinguidas vadialas ual zavradas seigi vegniu purschiu tochen 8 marenghins.

Gasetta Romontscha, nr. 12, 21 da mars 1874

Neolin

En consequenza ch'ina dunna ed in giuven da **Tujetsch** ein dacuort sebarschai zun fetg cun ir entuorn cun neolin (*ina sort d'iel*), ha quella vischnaunca anflau per bien da totalmein scumandar da barschar neolin. Quella saluteivla ordinaziun communalia mereta imitaziun.

Gasetta Romontscha, nr. 17, 23 d'avrel 1874

Facultad

Quei onn haveva **Tujetsch**: rauba communalia 173'500 frs.; rauba privata 980'200 frs.; entrada d'industria 9200 frs.; taglia virila 216 frs.

Gasetta Romontscha, nr. 20; 16 da matg 1874

Posta

Il secund cuors postal sur l'**Alpsu**, menaus en onn, para muort schliata rendita d'anflar difficultads tier il departement postal a **Berna**, che less supplir quel tras in cuors postal denter **Mustér e Cuera**. Denton ei vegniu fatg reclamaziuns. Cuors postals pauc rendabels dat ei aunc biars.

Gasetta Romontscha, nr. 21; 22 da matg 1874

Ei vegn tschercau

da prender si per la proxima stad sut favoreivlas cundiziuns in s.h. cavagl mascal per l'alp da cavals dalla vischnaunca da **Tujetsch**. Da s'adressar tir la tit. suprastanza da leu.

Gasetta Romontscha, nr. 22; 30 da matg 1874

Sanadad

Ella vischnaunca da **Tujetsch** regia dad in grond temps enneu in abnorm stan da sanadad dalla glieud. Ils spirituals dil liug ed ils miedis da **Mustér** han cuntuadamein stuiu esser sin via, per porscher agid als malsauns. Ei ha dau el medem temps 16 – 18 malsauns, e da quels fuvan 11 mo en in vischinadi, el qual igl ei era el decuors da strusch in meins stau 4 baras en casas grad ina sper l'autra, aschia che la fama ni plitost tema u superstiziun dil pievel leva far esser quei ina malsogna contigusa. La malsogna principala, priu ora enqual cass, para dad esser stau il malcostas e la febra dils gnarvs. A proporziun dil diember dils malsauns ein aunc ussa ils mortoris buca numerus, mo ils allegai miedis han tier quei favoreivel resultat contribuiu zun bia tras lur promtadad, premura e savida, e merettan perquei nossa engrazieivladad e recumandaziun. Igl ei zuar aunc adina da biars malsauns en nossa pleiv, aber speronza ch'il prighel grond seigi removius e dustaus.

Curaschusadad enten il pigliar la malsogna e perseveronza e speronza el decuors da quella quentel jeu era sco facturs tiellas medischinas dils miedis, per forsa ad interim mitschar dalla faultsch dalla mort.

Gasetta Romontscha, nr. 25, 19 da zercladur 1874

(25) In temporal cun ina tempiasta aunc mai sudida

Dus mattatschs dai ell'aua. – Tujetsch cul bien exempl. - Stupenta aura sereina e caulda. – Strapazs per rumper via. - Vendita per 10'000 frs. – Cun 134 vuschs per mantener il cumin. - La tempiasta veva denter en garnials sco bialas nuschs.

Disgrazia

Dacuort ein dus pigns mattatschs da **Tujetsch** dai ell'aua en dus differents loghens e fussen stai ventschi senza spert agid. In da quels ei daus ell'aua si mises ed ei vegnius liberaus da siu resolut e curaschus camerat da 15 onns. Duri Huonder da **Sedrun**, che ha buca mo liberau la veta, mobein era tgirau il blessau cun tut pusseivel quitau entochen che siu bab ei arrivaus la sera.

Gasetta Romontscha, nr. 29; 17 da fenadur 1874

In tgaun

da grondezia mesauna, spezia da pudel, cun pelegna liunga tschuora nera, giudem las toppas alv, ei fugius tschella jamna naven da siu proprietari. Tgi che sa dar novas da quel survegn in commensurau „trinkgeld“ da Calleger, nurser a **Tujetsch**.

Gasetta Romontscha, nr. 30; 25 da fenadur 1874

Classena

En ina vischnaunca dalla **Cadi** ei vegniu claus 44 tschuncheismas lunghezia culla lenna fendida ord classena dus lenns; da far cun lattas vessien ins duvrau 100 da quellas. Speronza ch'ei vegni gleiti dapertut da quella da buca dar ora pli lattas per clauder, sco la vischnaunca da **Tujetsch** ei schon avon decennis ida ordavon cul bien exempl.

Gasetta Romontscha, nr. 32; 7 d'uost 1874

Vendiu tschien vaccas

Igl ei aunc massa tiers da vender; mo la vischnaunca da **Tujetsch**, che ha schon vendiu 100 vaccas, vess aunc da vender 100. Muort ilsaults prezis d'onn ei igl unviern vargau vegniu tratg tut pli bia tiers ch'igl ordinari. Per ventira ha ei tochen ussa fatg stupenta aura sereina e caulda, aschia ch'il thermometer mussava quels dis 18 grads Reaumur. Quei spargna bia fein, ch'ei schon ussa fetg cars.

Gasetta Romontscha, nr. 43; 23 d'october 1874

Scamond da neolin

La jamna vargada ein a **Danis** treis persunas sebarschadas malamein cun dar ora neolin da cazzola. **Tujetsch** e **Mustér** han scumandau da barschar quei prigulus ieli, speronza ch'era otras vischnauncas suondien quei bien exempl.

Gasetta Romontscha, nr. 44; 30 d'october 1874

Tschun grads freid

La stupenta aura da quest atun para d'haver priu sia fin cun s. Martin, nua ch'igl ei tuttenina vegniu ina ferdaglia da 4 grads Reaumur (5 grads C). ... Il pli remarcabel eis ei che a **Tujetsch** catschavan ils truffels novs schon in bi cagl en tschaler!

Gasetta Romontscha, nr. 46; 13 da november 1874

Cun tschien stiarls

Entgins marcadonts da **Tujetsch** e **Medel** ein malgrad la gronda nevada semess ils 18 d.q. a **Mustér** sin viadi cun circa 100 stiarls per serender sur il **Lucmagn** sillatiarza fiera da **Ligiaun**. (Quels paran d'haver pli gronda curascha ch'ils signurs conducturs dalla posta sursilvana.)

Gasetta Romontscha, nr. 47; 21 da november 1874

Prighel da lavina

Finalmein ha ei calau da never ils 21 suentermiezd. ... **Tujetsch** e **Medel**, nua ch'ei era il pli grond prighel da lavina, han persuenter survegniu in vehement suffel e cufla, ch'ei temevan ch'ei mass cullas casas. Ils umens han giu da far bia strapazs quels dis per rumper via si els mises, nua che glieud e tiers eran nevi en. ...

Gasetta Romontscha, nr. 48; 29 da november 1874

Nevadas

Odem il november ed all'entschatta da december ha ei dau duas grondas nevadas. A **Selva** e **Rueras** ella **Val Tujetsch**, eran plirs fugi ord casa per la lavina, mo per ventira ein els mitschai culla tema.

Gasetta Romontscha, nr. 51; 18 da december 1874

Tiara dalla cucagna

Tgei che selai reussir entras in bienmanipulau public ingant, quei ha semussau la jamna vargada a **Tujetsch**, nua ch'igl ei ella capitala vegniu vendiu ina pintga e schliata mesacasa, mo bein situada cun 1500 tschuncheismas prau grass ed in magher (il qual po dar 3 tschuncheismas fein) per la summa da buca meins che 10'000 frs. Cun quintar la casa caraschia vegn quei prau grass aunc adina sin 4 frs. la

tschuncheisma! Ei quei buca la tiara dalla cucagna, nua che latg e mèl flessegian en abuldonza.

Gasetta Romontscha nr. 10; 5 da mars 1875

Maturitad

Igl examen da maturitad ei dacuort vegnius mess giu da sequents students grischuns: ... Berther da **Tujetsch**. Ses studis ha el fatg a **Nossadunnaun** ed ei staus gl'unviern a **Cuera** per ton meglier saver sepreparar tier siu examen, ch'el ha fatg cun tutta honur. ...

Gasetta Romontscha nr. 13; 24 da mars 1875

Votaziun per mantener il cumin

La votaziun fatga ella **Cadi** pervia dalla moda co las elecziuns circuitalas duein vegnir fatgas, ha giu sequent resultat: per tener cumin sco tochen encheu han votau unanimamein **Medel** cun 109, **Tujetsch** cun 134, **Mustèr** cun 165, **Sumvitg** cun 120, **Trun** cun 120. A **Breil** eran 29 votants per tener cumin, 39 levan far las elecziuns sin vischnaunca, per il qual modus era **Schlans** ha sedeclarau unitamein cun 34 vuschs. Aschia ei pia cun 677 vuschs encunter 73 concludiu da far cumin sco vivon. **Trun** ha en sia risposta schau sentir il giavisch, ch'ei fussi forsa buca malfatg da midar giu u alternar il liug da tener cumin denter las treis vischnauncas **Mustér**, **Sumvitg** e **Trun**.

Gasetta Romontscha nr. 16; 16 d'avrel 1875

La posta va mo inaga

A raschun ch'il secund cuors postal da stad sur l'**Alpsura** rendeva buca bia, e che negin sehanava fetg da surprender quel dil maun d'**Uri**, vegn quel buca menaus en uonn. La posta va la stad mo inaga per di ad **Ursera**, da **Cuera** a **Mustér** e viceversa aber duasga. Per la communicaziun locala dalla **Surselva** ei quella midada buca disavantagiusa.

Gasetta Romontscha nr. 17; 23 d'avrel 1875

1875

Sco deputai ein eligi: il mistral regent, mistral Arpagaus, cusseglier guvernativ Condrau, professer Johann Baptista Cariget ed assistant Schmid da **Tujetsch**. ... La dertgira circuitala ei vegnida cumponida ord ils derschaders: mistral Arpagaus, gerau Bundi, **Medel**, assistant Schmet da **Tujetsch**, derschader Al. Huonder **Mustér**, gerau Martin Demont e gerau Tumaisch Fidel Decurtins, omisdus dalla vischnaunca da **Trun**. Sco suppleant vegn gerau Lurenz Jagmet da **Tujetsch** eligius cun tschun auters.

Gasetta Romontscha nr. 19; 6 da matg 1875

Il pass

digl **Oberalp** ei ussa aviarts per carrs.

Gasetta Romontscha nr. 2; 28 da matg 1875

Creisma

Ils 13 d.q. ei monsignur uestg Willi arrivaus a **Mustér** sin siu viadi da Creisma en **Surselva** e leu vegnius retschards dad ina gronda processiun. Ils 15 eis el, suenter haver cresmau a **Medel** e **Tujetsch**, puspei semess sin viadi da retuorn. Speronza ch'el hagi obteniu ina buna impressiun da ses diocesans sursilvans.

Gasetta Romontscha nr. 25; 18 da zercladur 1875

Turissem

Il til dils jasters sur l'**Alpsu** ha uonn entschiet pli baul ch'antruras; a **Mustér** passan mintgadi crotschas ed ils admiraturs dalla biala natira pon buca ludar avunda il

present magnific colorit dils bials funs.

Gasetta Romontscha nr. 26; 22 da zercladur 1875

Tempiasta

La sera dils 7 da fenadur ei vegniu sur **Mustèr e Tujetsch** dil maun digl

Oberalpstock in temporal cun ina tempiasta aunc mai sudida en quellas cuntradas. Il termometer a **Mustér** era quei di sesalzaus sin 26 grads Celsius e tier la tempiasta, che ha cuzzau in quart d'ura, sbassaus giu sin 15. Sut in horrent tunar e camegiar deva ei garniala che las vias ed ils cuolms eran tut alvs, ins ha anflau garnials dad in zoll e duas lingias grondezia! Mo a **Sedrun e Camischolas** par'ei d'esser stau ina aura aunc bia pli stermentusa. La tempiasta veva denter en garnials sco bialas nuschs, che han totalmein manizau si ils bials segals e glins e sfraccau tetgs e finiastras. Il tetg da guotas dalla casa dil depot da posta a **Camischolas** ves'ora sco in dratg; ella casa da caplania a **Sedrun** ei buc'ina schiba da finiastra restada entira, ed ella sala dalla Cruna era ei dau en ina tempiasta che cuvreve il plantschiu en ina altezia da dua detta. Tier tut quei ei il tun aunc daus giu quaterga egl uaul e vess sut il stermentus suffel dau fiug quel, sche la dracca e tempiasta vess buca stizzentau la flomma. Duront quella stermentusa aura a **Sedrun e Camischolas** ei la squadra da **Rueras** mitschada ualti bein ed a **Selva e Tschamut** ha ei gnanc pluiu.

Gasetta Romontscha nr. 28; 9 da fenadur 1875

(26) Mo treis quarts d'ura han sturniu e terrau las bialas e splendidas speronzas.

Garniala dad 1 – 2 zolls (1-2 polischs) diameter. - Dus umens han piars disgraziadamein lur veta ella Val Curnera. - Refusau la constituziun cantunala. - Dus cuors postals a di. - Il depot da posta a Rueras cun 100 frs. salari annual.

Correspondenza dil Badus

La sera dils 7 da fenadur ei stada terribla pella gronda part dalla magnifica val **Tujetsch**. In temporal cun grossa garniala dad 1 – 2 zolls diameter ei sesbuccaus oragiu dils pézs **Crispalt** e **Giuv** e serasaus entroma sillas bein situadas squadras da praus ed èrs sur **Rueras**, **Zarcuns**, **Camischolas**, **Gonda**, **Salins** e **Sedrun**, sfraccond giu e manizzond si pli u meins tut ils fretgs dil bi funs. Mitschai cun tema orasut il ruh unviern cun sia gigantica nevada senza considerablas sventiras, steva dapresent nossa cultura, muort la favoreivla primavera, ch'ei ha fatg, en in stan zun bein avanzau, ch'empermetteva biala pareta e reha raccolta per tuts fretgs. Mo treis quarts ura da quei ominus di han sturniu e terrau las bialas e splendidas speronzas da nos premurai agricolants. Ils bials segals ellas squadras sura numnadas (grad las principales da graun), ein totalmein destrui e veggan dapresent segai giu. D'atun e gl'unviern vegg ins a sentir la munconza da sternem bunamein ton sco quella dil graun. Pils dumiecs e truffels eis ei aunc grond dubi, sch'els pon dar ina tut mesauna raccolta; il renomau glin da **Tujetsch**, ch'era ussa ella fluriziun, sa dar aunc empau teglia, mo pauc sem. In donn quasi nunspitgau encorscha ins per ussa vid il fein, essend il zart e bien da feglia tut manizau giun plaun e formalmein catschau el tratsch, aschia ch'ina part mises veggan schon ussa fenai, avon che l'auter fein, ed in per alps han buca saviu veginir cargadas ad interim, essend il bi pastg entir da quellas spazzaus giu. – Il donn actual en general sin pastiras ed alps dalla communitad, sin praus ed èrs dils particulars astg'ins gagliardamein taxar sin 40 – 50'000 frs., senza quintar il donn che nescha pli tard ord las consequenzas da quella catastrofa. La devastaziun els uauls (nua ch'ei ha pigliau fiug en quater loghens) ei gronda. Igl ei ver, che beinenqual beinstont dils donnegiai po vertir il manco per quest onn, ed era ils veramein paupers han lur medem regress visavi als fondos pauperils da

vischnaunca; mo il pli fetg piteschan senza dubi quels dalla classa mesauna (e leutier auda la gronda part), ils quals ston cun breigia e lavur vegrir atras cun lur famiglia ord la rendita dils tiers e dil funs, forsa hipotecaus. – Dil donn succedius vid tetgs e baghetgs, vid finiastras e habitaziuns vi jeu buca far detagliada menziun. Sut talas trestas e deplorablas circumstanzias tertgass il suftascret correspondent bunamein, che nossa ludeivla vischnaunca astgass motivadamein spluntar per in subsisdi, u tiella cassa d'agid cantunala, ni tier la caritat beinvulenta da sias vischinonzas, tonpli ch'ils subsidis stuessen buca vegrir dai ussa ed immediat, sonder plitost sin d'atun e sil proxim unviern.

Sco ins ha schon udiu, ha nies ludeivel magistrat dalla **Cadi** dessignau in pèr delegai per inspectar e calcular pressapauc il donn en nossa vischnaunca. Quei conclus ei ludeivels e corrects e nus essan schon oravon engrazieivels persuenter, perschuadi, che nuot ei meglier ch'ina nunpartischonta persunala inspecziun, ton per far constatar il donn sez, sco era per promover a siu temps il sura indicau subsidi.

Maurus Desax, plevon a Sedrun

Gasetta Romontscha nr. 29; 16 da fenadur 1875

Fieras

Marcadonts da **Tujetsch** e **Medel** han malgrad la schliata fiera da **Ligiaun**, tuttina ughegau d'instradar leu novas roschas. ... Silla fiera dad **Altorf** dalla jamna vargada era ei catschau sull'**Alpsu** da marcadonts dalla **Cadi** circa 100 vaccas, mo muort il grond biestgam ei quella fiera ida mal, damai ch'ils Tessinès han turnentau sul **Gottard** lur vaccas. Era las vaccas da maz erien beinmarcau ad **Altorf**.

Gasetta Romontscha nr. 43; 20 d'october 1875

Marcadont bavarès

In signur bavarès d'**Ebersberg** ei staus tochen **Tujetsch** ed ha turnau a cumprar si ina roschada stiarlas per 80 – 120 frs. il tgau.

Gasetta Romontscha nr. 44; 28 d'october 1875

Correspondenza dil Badus

La vischnaunca da **Tujetsch** ha da registrar da temps en temps en sias annalas zun trestas catastrofas. Gliendisdis vargau, ils 10 d.q., han dus umens piars disgraziadamein lur veta ella **Val Curnera** dadens l'alp **Cavradi** da **Trun**. Els fuvan occupai da far via atras la neiv entochen tiellas meidias da fein a pastg, ch'els levan l'auter di menar a casa. Quater umens eran allas 10 avomiezdi s'avanzai ordavon cun spelar ora la neiv entochen ualts datier dallas meidias, duont che plirs auters reparavan la via circa duas uras pli anora ella val. L'auter di duevan circa 50 umens dumandai gidar a vegrir ora cul fein. Ils 4 umens ordavon ein gleiti vegin ella lavina cun tagliar atras in cuflau da neiv e mo in ha cun gronda breigia pudiu sefar libers dalla neiv ed arrivar en brauncas entochen tiels auters umens, per dar avis dalla disgrazia (el sa aunc ussa buca traversar la stiva, igl ei in giuven da circa 17 onns). Arrivond suenter circa 2 uras gl'agid dils auters, han quels aunc cavau ord la neiv in mat da 18 onns vivs, mo anflau ils dus auters schon morts. La disgrazia ei ton pli gronda e sensibla essend ch'in dils morts, statalter Stiafen Schmet – in brav e survetscheivel um, ei bab da casa da 9 affons en veta, denter ils quals siu fegl, che vess gleiti sez piars la veta, ei il pli vegl e dumbrava mo 17 onns. L'auter miert ei Gion Fidel Peder, fegl da Gion Martin Peder, ei in giuven da strusch 21 onn, fargliun d'ina vart cun 8 da sia madregna e 2 agens fargliuns, dils quals tuts el er'il pli vegl e fuss staus la petga dalla famiglia, ton pli che siu bab ei avon dus onns vegnius disgraziaus egl uaul, ha rut in bratsch ed ei aunc ussa buca bein habels tiella lavur. Il pli trest ei stau il transport dils cadavers ord quella macorta val entochen **Tschamut**, che ha czuzzau tochen las duas suentermiezdi; mo zun tresta ei era la sepultura dils 13 d.q. stada, nua ch'ins veseva tons orfans ed ina cumbrigiada vieua bargend spella

freida fossa da lur pli cars da casa, ils quals eran 3 dis avon schon vegni cavai ord ina quasi medema freida fossa, nua che la mort veva provisoricamein satrau els igl emprem. – Dieus, il bab dils orfans, dallas viewas da tuts sfortunai consoleschi quels ch'ein restai anavos e detti als morts il perpeten ruaus.

Gasetta Romontscha nr. 2; 13 da schaner 1876

Collecta

La collecta fatga ella **Cadi** per ils Franzos disgraziai entras las innundaziuns e per ils basignus vischins dil cumin, che han pitiu grond donn dalla tempiesta, ha giu sequent resultat. La vischnaunca da **Mustér** ha contribuiu 280 frs., **Tujetsch** 184, **Medel** 142, **Sumvitg** 104 frs 12 ct., **Trun** 180, **Schlans** 15, fa ensemes 905 frs. 12 ct. **Breil** ha giu collectau pli baul 50 frs. per la **Frontscha** e tarmess quei direct a **Cuera**.

Gasetta Romontscha nr. 3; 20 da schaner 1876

Refusau la constituziun

Suenter che **Tujetsch** ha refusau la nova constituziun cantunala cun 176 vuschs e **Medel** cun 126 ha l'entira **Cadi** 980 refusonts e mo 4 acceptonts.

Gasetta Romontscha nr. 15; 14 d'avrel 1876

Pass Alpsu

Finalmein eis ei tuttina vegniu decidiu a **Berna**, ch'il frequentau pass dall'**Alpsu** duei per la stad haver dus cuors postals a di. Plirs temevan, ch'enstagl dil secund cuors, dessi ei mo in cuors **Cuera – Glion**.

Gasetta Romontscha nr. 16; 20 d'avrel 1876

Ils cuors postals sull'**Alpsu** ein definitivamein ranschai en sco suonda: il cuors annual va naven da **Cuera** las 5 e 30 dalla damaun ed arriva ad **Ursera** las 6 e 35.

Gasetta Romontscha nr. 19; 12 da matg 1876

Inspecziun

Signur Oberbauinspector Salis ha quels dis inspectau la strada militara sur l'**Alpsu**, e sco ins auda eis el staus bein cuntents cul manteniment da quella.

Gasetta Romontscha nr. 33; 18 d'uost 1876

Plazzas postalas

Ei vegn cheutras scret ora en libra concurrenza:

Il depot da posta a **Rueras** cun 100 frs. salari annual.

Ils aspirants ston sin la fin da quest meins dar en al suittascret, metter vitier in attestat da conduita, notificar igl onn da naschientscha ed il num da lur liug nativ, descriver la situaziun da lur casa e dil local da biro.

Il dierctur circuital da posta:

Stäger

Gasetta Romontscha nr. 34; 25 d'uost 1876

La fiera da Rueras

vegn cun approbaziun dil davos Cussegl Grond tenida ils 7 d'october d.q. e la sonda avon la fiera d'**Altorf** digl october.

La suprastonza da **Tujetsch**

Gasetta Romontscha nr. 39; 29 da settember 1876

Annunzia e recumandaziun

Tier l'avvertura dallas scolas fa il suittascret enconuschen, ch'el vendi material da scola, pupi, hefts, tenta e plemas per in fetg raschuneivel prezi.

E. Deragisch, ligiacudischs a **Mustér**

Gasetta Romontscha nr. 41; 13 d'october 1876

Annunzia da mort

En profunda dolur fagein nus dalunsch da nossa veglia patria enconuschent a nos stimai parents, amitgs ed enconuschents ella **Cadi**, ch'ei hagi plaschiu agl Altissim da clamar naven da questa speranza tier ina megliera veta nossa preziada consorta e cara mumma

Maria Ursula Gieriet, nata Genelin da Sumvitg

Ella ei spartida ils 31 d'october vargau provedida cun tuts perduns e sacraments dils moribunds ella vegliadetgna da 35 onns e 10 meins.

Nus recumandein nossa carissima defuncta alla pia memoria da tuts nos parents ed amitgs.

Il combrigiau mariu

Stillwater, America, 4 da november 1876

Gion Antoni Gieriet e ses treis affons

Gasetta Romontscha nr. 48; 1. da decembre 1876

Piars

ina patenta (*Hausierpatent*) per rauba da bratsch, sut il num Carl Cavegn a **Sedrun**. Igl anflader ei supplicaus da remetter quella al proprietari encunter ina commensurada bonificaziun

Gasetta Romontscha nr. 1; 5 da schaner 1877

(27) A Rueras grassescha la difteria quasi en tuttas casas

In sulet bostger per Sursassiala. – Ei ha plitost pareta da vegnir unviern che primavera. - Ils dis canins han purtau gronda steppadad e ferms stempraus. - Sedrun tema ils druns. - In grond laud als cantadurs da Sedrun. - Igl ei miert leu dabia affons.

Strihau il secund cuors

Cun caschun ch'il Cussegl Federal ha strihau il secund cuors postal sull'**Alpsu** muort memia pintga frequenza da quel, ei il magistrat dalla **Cadi** s'adressaus tier la direcziun postala a **Cuera** culla supplica da procurar ch'ei vegni persuenter egl interess dall'entira **Surselva** ranschau en sillla stad in cuors local da **Cuera a Mustér**, enstagl sco vivon mo da **Cuera a Glion**.

Gasetta Romontscha nr. 5; 2 da fevrier 1877

La patenta alla scolasta

En dus particulars cass, nua che cussegls da scola ein passai si sco petents e susteniu da buns attestats digl inspectorat da scola, ha el fatg in'excepziun e dau la patenta alla scolasta Onna Maria Caplazi da **Surrein**, che ha schon dau 17 onns scola ed ils davos onns quella da **Sedrun** cun 50 – 60 scolars en otg classas e zuar cun generala cuntentientscha.

Gasetta Romontscha nr. 9; 2 da mars 1877

Bostger

Sin giavisch digl inspectorat cantunal han las vischnauncas da **Mustér, Tujetsch e Medel** seschau en da formar ensemen in revier forestal ed emploiar in bostger cun 1100 francs paga.

Gasetta Romontscha nr. 14, 5 d'avrel 1877

Stuiu better tiara

Ils marcadonts da stiarls entscheivan a seregheglier ella **Cadi** e spendan ludeivels prezis. Era ils vadials tumprivs pagan bein. Fein maunca ei buc, malgrad la schliat'aura dil mars ed avrel. Quella entarda las lavurs dalla cumpignia. En **Tujetsch** han ei stuiu better tiara per saver arar buca memia tard; entuorn quels englars terrenai era ei aunc massa neiv sils praus. Mo ils Tuatschins han per moda d'arar gl'emprem e per suenter better "ad jarva".

Gasetta Romontscha nr. 17, 26 d'avrel 1877

Avrel freid e bletsch

Gl'avrel cun sia aura bletscha e freida ei vargaus; il proverbi "Claras calondas e stgir meins" ei cheu severificaus. Calonda matg sei stada stgira e freida, lein ussa mirar, sch'il meins matg croda ora bials sco in desiderass zun fetg; mo oz, ils 2, ha ei plitost pareta da vegrin unviern che primavera. Il termometer muossa 2 grads freid. En **Tujetsch** ein ils funs aunc cuvretgs cun neiv ed ier cuflava leu sco da miez unviern.

Gasetta Romontscha nr. 18, 3 da matg 1877

Publicaziuns

Josef Anton e Martina Jacomet da **Sedrun** van ell'America. Lur quens ein da dar en enteifer 3 jamnas ad assistent Schmet.

Gasetta Romontscha nr. 19, 10 da matg 1877

In Tuatschin

Dumengia vargada ha monsignur uestg Willi benediu ora 11 spirituals en quei era in Tuatschin, signur Thomas Beer da **Sedrun**. La primizia ei dumengia, ils 19 d'uost.

Gasetta Romontscha nr. 32, 10 d'uost 1877

Messa nuviala

L'indicada messa nuviala a **Sedrun**, ils 19 d.q., ei vegrinada tenida a **Sedrun** cun biala solemnidad e sut gronda participaziun dil pievel. La respectabla cumpignia da students tuatschins ha legrau la sera ses convischins cun in fiug artificial – ina caussa aunc mai s'udida en quella val -, nua ch'ei flessegia latg e mèl en abuldonza.

Gasetta Romontscha nr. 34, 24 d'uost 1877

Alpsu

En **Surselva** ein ils dus hotels digl uaul da **Flem** stai empleni ualti bein, duront che **Breil** e **Mustér** han uonn buca giu schi bia currants sco onn, persuenter ei stau ton pli bia passants per l'**Alpsu**.

Gasetta Romontscha nr. 32, 10 d'uost 1877

Tema dil Drun

Ils dis canins han purtau questa jamna gronda steppadad e fermi stempraus. Ils tribels uradis cun ferm suffel, tunar e camegiar dalla notg dils 21 sils 22 han mess en alarm entirs vischinidis sco **Sedrun** e **Zignau** che temevan ils druns.

Gasetta Romontscha nr. 34, 24 d'uost 1877

Meglier ch'il "Domchor"

Tier la messa nuviala a **Sedrun** dils 19 d'uost, havein nus giu caschun d'admirar il bicant ecclesiastic da leu. Per nies grond plascher porta ussa la Allgemeine Schweizerzeitung da **Basel** ina correspondenza d'in viandont, ch'ha udiu quei cant ina dumengia, in grond laud als cantadurs da **Sedrun** ed a lur premurau instructer signur caplon *Giachen Antoni Augustin, Alvaschein*. Schegie che quella giuventetgna hagi negina cultivaziun musicala, hagi ella cantau meglier ch'igl aschinumnaa "domchor" da **Berlin** a **Basel**.

Gasetta Romontscha nr. 38, 21 da settember 1877

La fiera da Rueras

Vegn tenida la sonda avon la fiera d'**Altorf**, ch'ei sonda proxima, ils 6 d'october.

Camischolas, igl 1. d'october 1877

La suprastonza da Tujetsch

Gasetta Romontscha nr. 40, 5 d'october 1877

Annunzia da mort

En profunda dolur fagein nus da saver a nos stimai parents ed enconuschents, ch'ei hagi plaschiu agl Altissim da clamar ord questa speranza tier ina megliera veta nossa cara sora ed onda

Rosa Martina Berther

Ella ei spartida ils 23 d'october en ina vegliadetgna da 61 onns, provediada cun ils sogns sacraments e perduns.

Nus recumandein l'olma dalla cara defuncta alla pia memoria da tuts nos enconuschents.

Gion Andriu Berther, frar

er'en num dils auters parents

Tujetsch, ils 26 d'october 1877

Gasetta Romontscha nr. 44, 1. da november 1877

Ferventa donatura

Cun plascher notifichein nus, che la respectada matta Rosa Martina Berther da **Sedrun**, ch'ei stada leu circa 40 onns cantadura ed ei morta buca daditg, hagi fatg si per caussas pias datier da 2000 frs. Denter auter ha ella en siu testament era seregurdau digl institut orfanil a **Schluein**. Quel sco era il spital dalla S. Crusch a **Cuera**, ina dallas principales ovras da nies nunemblideivel pader Teodosi, lesssen nus cheutras haver recumandau cauldamein alla beneficenzia d'in ludeivel publicum.

Gasetta Romontscha nr. 46, 16 da november 1877

Annunzia da mort

Nus purtein cheutras a parents ed enconuschents tresta nova, ch'ei hagi plaschiu agl Altissim da clamar ord questa veta nossa cara mumma, sira e tatta

dunna Bundsweibel

Teresa Berther

Ell'ei morta ils 8 da november suenter ina liunga malsogna, provedida cun tuttas consolaziuns da nossa religiun en ina vegliadetgna da 65 onns.

Nus recumandein la preziada defuncta alla pia memoria da tuts parents ed enconuschents.

Cuera, ils 10 da november 1877

Anton Berther, fegl, salter cantunal

Carolina Berther, nata Vimermann

brit, beadis e beadias

Gasetta Romontscha nr. 47, 23 da november 1877

Duas cauras

Dapi entgins dis ei vegniu naven duas cauras cun noda en fuorma da tardent en omisduas ureglas. Tgi che sa da novas da quels dus tiers, ei supplicaus da schar saver Duri Berther a **Tujetsch**.

Gasetta Romontscha nr. 49, 7 da december 1877

Annunzia da mort

Nus fagein cheutras da saver a nos parents ed enconuschents, ch'ei hagi plaschiu agl Altissim da clamar ord questa veta temporalia tier la perpetna beedadad nies car bab

Vigeli Josef Monn

El ei spartius ils 17 da december suenter ina cuorta e leva malsogna ella biala vegliadetgna da 84 onns.

Nus recumandein sia olma alla pia memoria da tuts nos enconuschents.

Ils combrigiai affons:

Gion Antoni e Vigeli Josef Monn

Maria Librata e Barla Monn

Tujetsch, ils 26 da december 1877

Gasetta Romontscha nr. 1; 3 da schaner 1878

Difteria

A **Rueras/Tujetsch**, grassescha la difteria quasi en tuttas casas. Igl ei miert leu dabia affons ed auters ein aunc buca ametsch.

Gasetta Romontscha nr. 3; 18 da schaner 1878

Il senior dils spirituals

Cul niev onn ei cumpariu in niev schematismus dil clerus dalla diocesa curienda ch'ins sa retrer. Il present nonsignur uestg Caspar Willi ei il 94 avel, siu capitel cathedral consista ord 6 canonis residenzials e 18 extraresidenzials, siu seminari a s. Leci dumbra dapresent 27 alums cun 5 professers. Egl uestgiu da **Cuera** sesanflan 321 spirituals seculars, il senior da quels ei signur Vigeli Wenzin a **Tujetsch** naschius 1792.

Gasetta Romontscha nr. 5; 1. da fevrer 1878

(28) Il mèl da Tujetsch seigi enzatgei “non plus ultra”.

Uri ha selamentau tscheidiatsch. - Tras in'explosiun ein las flommas serasadas sin tuts mauns. - Sull'Alpsu cun 130 umens e 60 cavals. - Il mèl da Tujetsch (ni il mèl alpin) porta dapertut la plema e stat per prender en gl'emprem rang.

Fatg il cuolm sur notg ed arrivai cun peis schelentai

Tenor il Tagblatt ha **Uri** selamentau tscheidiatsch, che dus viagions mistergners, che hagien buca giu survegniù quatier a **Tschamut**, hagien stuiu far il cuolm la notg e seigien arrivai ad **Ursera** cun peis schelentai. Quella gasetta remarka, ch'els hagien buca giu dumandau da star sur notg en quella casa, nua ch'ei vegni per ordinari dau quatier, sonder mo tier duas paupras famiglias. Ella cusseglia denton, ch'ins duessi procurar sin quei pass alpin per quatier a paupers viandonts sco ei seigi il cass sil **Lucmagn**. Cheuencunter remarchein nus, ch'ins hagi vuliu far in'emprova da quellas varts e dumandau persuenter in pign subsidi dil ludeivel Cussegl Pign ord igl annual subsidi cantunal pil pauperesser, ch'en tals cass vegni sigl avegnir negin pauper viandont enviaus pli ord casa a **Tschamut**.

Gasetta Romontscha nr. 9; 1. da mars 1878

Barschament a Trun

Resultat dalla collecta ella **Cadi** pils donnegiai entras il barschament a **Trun**: dalla vischnaunca da **Tujetsch** 50 frs. ... En num dils donnegiai vegn ei cheutras mess giu in public engraziamenti

La suprastonza da Trun

Gasetta Romontscha nr.11; 15 da mars 1878

Legendas

Cudisch da legendas dalla secunda part san ins haver mo per 3 frs. il toc, sco era cudischs da quens, a vendiders vegn dau in rabat.

Emanuel Deragisch, ligiacudischs

Gasetta Romontscha nr. 16; 19 d'avrel 1878

Nurser

La vischnaunca da **Tujetsch** enquera per la proxima stad in bien nurser. Aspirants san s'adressar enteifer 10 dis tier la suprastanza.

Gasetta Romontscha nr. 24; 14 da zercladur 1878

Tragic cass

Sill' **Alpsu** ei ils 8 d.q. succediu in trest cass. Dumengia sera era ei vegniu si leu circa 30 persunas dad **Ursera** per entscheiver a cavar «torf» gliendisdis cull'alva dil di. Ellas ein manidas en ina casetta da duas alzadas, ils biars giu bass ed ils auters si sut il tetg, nua ch'ei era empau fein. Giusut vevan ei cazzola ed encunter catschar dis ha ina persuna vuliu derscher ell'ampla aunc empau neolin, mo l'entira butteglia ha pigliau fiug e tras in'explosiun ein las flommas serasadas sin tuts mauns. La glieud giusut ei fugida ed ha era susentau quels sisura; mo per cura che l'entira casetta era en fiug e flomma han ins observau ch'ei muncava aunc treis persunas che vevan durmiu si suren: in spus ed ina spusa cun in auter um, ch'ein pli tard vegni tratgs ora sut las ruinas barschai e sfigurai schi fetg, ch'ins vess buca enconuschiu pli els, in pèr umens ein blessai malamein. In crotschier, ch'era dumengia sera passaus leu speras ora, ha raquintau a nus, ch'el hagi viu leu sin esch ina biala e frestga giuvna e l'autra damaun, cura ch'el seigi turnaus dad **Ursera** sil cuolm, eri sia bara nera e macorta exponida sur la via sper la bara da siu spus. La glieud leu d'entuorn bargevien sco affons. Oz en possa, damaun en fossa!

Gasetta Romontscha nr. 28; 11 da fenadur 1878

Ingant per schar via per tscheins l'Alp da Nalps en Val Tujetsch.

Ils 26 d'uost las 9 avonmiezdi vegn ei en claustra da **Mustér** sin via d'ingant schau via per tscheins sin 5 onns l'alp, che quella posseda ella **Val Nalps**. Ils onns vargai vegneva quella alp cargada cun 1000 – 1200 nuorsas bergamascas e 20 - 30 armauls. Ulteriur sclarament dat sin damondas fatgas l'administraziun claustral.

Mustér, ils 6 d'uost 1878

Gasetta Romontscha nr. 32; 9 d'uost 1878

Viseta americana

Sechelmeister *Gion Benedetg Deragisch (1811–1901)*, oriunds da **Tujetsch** e domiciliaus a **Stillwater** en **Minnesota**, fa cheutras da saver a ses parents ed enconuschents ell'**America**, ch'el seigi suenter in'absenza da 18 onns puspei arrivaus cun sia consorta (*vieua Barla Turte' Livers-Beer (1835–1914), secunda dunna*) saunamein e da buna veglia en sia veglia patria per star leu sin viseta in per meins e silsuenter turnar en sia nova patria americana.

Gasetta Romontscha nr. 36; 6 da settember 1878

Annunzia da mort

A parents ed enconuschents purtein nus cheutras la tresta nova che nossa cara mumma

Margreta Nescha Cavegn, nata Monn (*29-12-1796)

seigi questa notg spartida da quest mund speronza tier ina megliera veta en ina vegliadetgna da 82 onns suenter ina cuorta malsogna ed haver retschiert ils sogns sacraments dils moribunds. Ella vegn satrada sonda, ils 28 d.q.

Nus recumandein sia olma allas oraziuns da parents ed amitgs.

En num dils affons en malencurada:

Vigeli Cavegn, fegl

Sedrun, ils 26 da settember 1878

Gasetta Romontscha nr. 39; 27 da settember 1878

Annunzia da mort

En profunda dolur notificein nus a parents ed amitgs, ch'ei hagi plaschiu agl Altissim da clamar tiella perpetnadad nies car fegl, frar e quinau

Pieder Paul Wenzin (19-07-1839)

El ei morts ils 24 d.q. provedius cun tuts sogns sacraments dils moribunds en ina vegliadetgna da 39 onns suenter liunga e dolorusa malsogna.

Alla pia memoria recamondan sia olma

La combrigiada mumma:

Maria Mengia Wenzin-Condrau.

En num dils fargliuns:

Flurin Wenzin, frar

Vigeli Cavegn, quinau

Selva, ils 25 da settember 1878

Gasetta Romontscha nr. 39; 27 da settember 1878

Militar sugl Alpu

Allas duas battarias montanas **Grischun** e **Valleis** che han fatg in cuors a **Thun** sut major Zuan, vegn ei dau grond laud per lur bien secuntener ed oreifer sittar. La grischuna vegn sonda sull'**Alpsu** cun 130 umens e 60 cavals, che prendan lur quatier ella vischnaunca da **Mustér** che ha quest atun schon giu treisga schuldada a quatier. Stagn gronda mulesta en in meins.

Gasetta Romontscha nr. 41; 10 d'october 1878

Sur dil mèl da Tujetsch.

(Correspondenza dil **Badus**) ... Quels signurs han intercuretg denter auter mèl svizzer, cristallisaus, vegls da dus onns; quel da **Tujetsch** nr. IV era totalmein alvs, ferm cristallisaus, ord la regiun dallas alps 4650 peis sur mar. Quel da **Tumein**, medemamein fetg cristallisaus, pli mellens, 2000 peis sur mar.

Denter 100 parts mèl da quellas sorts cuntegnan:

	substanzia	aua
Il mèl da Tujetsch, nr. IV	82.48	17.52
Tumein	81.39	18.61

Plinavon han els intercuretg ils medems mèls rars ni flessegionts, mo da $\frac{1}{2}$ onn vegls, lur resultat ei sequentamein stabilius. Da 100 parts mèl cuntegnan:

	substanzia	aua
quel da Tujetsch	79.59	20.41
quel da Tumein	78.53	21.47

Ord quellas cefras vesa mintgin ch'il mèl da **Tujetsch** (ni il mèl alpin) porta dapertut la plema e stat sco l'emprova per prender en gl'emprem rang. Jeu sun perschuadius, che nies mèl fagess aunc ina pli eclatanta cumparsa ella statistica, sch'ins intercuress el immediat el liug d'origin, enstagl per a **Vienna**. Fins gastronomi e lojals turists che gaudan nies mèl ella vallada sezza en siu cumplein aroma, san buca selamentar avunda sulla nunperdunabla sfalsificaziun dil mèl alpin, sco ella daventa dapertut dils maligns speculants. Leider ei la raccolta da mèl schon ver 2 – 3 onns stada fetg magra tier nus, en consequenza dallas tardivas e schliatas primaveras; aber ina pintga reserva da mèl exquisit per transport, ni enqual biala patgna mèl en natira grad ord magasins temps da stad, per schigiar ad enqual diletant, ei mintg'onn da survegnir. Talas queidas e marveglas ston ins per sesez pagar empau da car; aber la

chemia, ni il process, ch'il magun fa tier mintgin, dat gl'equivalent, ch'il mèl da **Tujetsch** seigi tonaton enzatgei "non plus ultra".

Maurus Desax, plevon a Sedrun

Gasetta Romontscha, nr. 9, ils 27 da fevrier 1879

Pader Gallus

Suenter ina liunga malsogna ei ils 2 d.q. miert a **Rumein** il beneficiat da leu signur pader Gallus Riedi oriunds da **Tujetsch** ella biala vegliadetgna dad 81 onn. RIP.

Gasetta Romontscha, nr. 10, ils 5 da mars 1879

Clom d'emigraziun

Per vegnir suenter l'ordinaziun dil Cussegl Grond, vegn ei cheutras fatg da saver che Gion Michel Derungs e sia sora Emilia Derungs da **Tujetsch** seigien intenziunai d'emigrar ell'**America**. Signur gerau Lucas Cavegn ei retschevider da quens dils numai emigrants.

Trun, ils 10 da mars 1879

Igl Uffeci circuital dalla **Cadi**.

Fegl Ufficial dil Cantun Grischun, ils 14 da mars 1879

Straduns alpins

dallas vias da communicaziun ein: a) l'**Alpsu** da **Sedrun** tochen ils cunfins uranès (vivon schon naven dil vitg da **Mustér**). ...

Gasetta Romontscha, nr.11, ils 13 da mars 1879

(29) Aventura cugl uors, fiera e barschament a Bugnei

Riedi cuchegia dalla tauna en ed encorscha ils egls digl uors, che tarlischavan el stgir sco duas cazzolas. El tacca sia buis, metta si in capsel, fa ina s. crusch e sieta, mo la buis disdescha per l'emprema e secunda ga; cun metter si il tierz capsel va il siet. - Nos tiers manedels ed armentivs pagassen in bien ton pli bia, sch'ei vegnessen teni empau meglier. – Dau fiug in clavau cun far termagls cun zulprins fosforics.

Pasculaiun, pescaria e manteniment da vias

Sco nus havein profetisau ei il secund pugn da recapitulaziun sulla pasculaziun dils tiers manedels vegnius fiers cun splendida maioritad, il tierz sulla pescaria ei probabel era refusaus, sulla sort digl emprem pugn, sul niev uorden dil manteniment dallas stradas, san ins aunc nuota rapportar enzatgei definitiv. **Mustér**, **Medel** e **Tujetsch** han fiers tut quasi unitamein, ferton che **Sumvitg**, **Trun** e **Breil** han acceptau igl I. pugn.

Gasetta Romontscha, nr.14, ils 3 d'avrel 1879

Cumin 1879.

.... sco derschaders ein numnai: ils presidents communals da **Tujetsch** e **Medel**, Luregn Jacomet e S. Beeli ufficial civil a **Tujetsch**: Soliva ...

Gasetta Romontscha, nr.19, ils 8 da matg 1879

Premiaziu

Per s.h. taurs han obteniu premi: gerau Gion Andriu Berther da **Tujetsch** ...

Gasetta Romontscha, nr.17, ils 24 d'avrel 1879

Catschadur Riedi

Il catschadur Gion Clemens Riedi da **Mustér** ch'ei morts ils 8 da matg 1879 en casa pauperila a **Mustér**, ei tras siu cumbat cugl uors vegnius eternisaus el renomau cudisch: *Das Thierleben der Alpenwelt* da Fr. Tschudi, mo ual aschi remarcabla ei stada

sia aventura ella lavina. Sco necrolog da quei valerus fegl dalla natira alpina, suonda cheu ina raquintaziun da quels dus aventurus schabetgs.

Naschius 1797 a **Selva** giudapeis dil majestus **Badus** eis el leu en ses giuvens onns vegnius ella lavina la stermontusa notg dils 12 sils 13 da december 1808, la medema notg, nua che pliras famiglias els cantuns **Berna**, **Uri**, **Sviz** e **Glaruna** ein vegnidias satradas cun casa e clavau confirmond il proverbi: "amiez la veta la mort seschluetta".

Sils cuolms era gronda nevada, la marschauna fuva rutta en ed in ferm suffel era levaus. Prevedend il grond prighel fa il caplon da **Selva** la sera suenter rusari aunc recitar ils vischins in paternies, che Dieus vegli pertgirar els dalla lavina. Avon baselgia secusseglian els lura sin tgei maun fugir, tgi temeva la lavina dil maun dretg e tgi quella dil maun seniester. Dividi en lur supposiziuns prendan els trestamein cumiau in da l'auter, sco la davosa gada ch'els sevesessen sin quest mund. Entgins enquenan lur refugi ellas casas dadens, ed ils auters ellas casas dado. Recumandond lur veta els mauns da Diu, semettan els a ruaus – biars en fossa per mai levar pli.

Entuorn mesanotg ramplunan las vals stermontusamein, ina sgarscheivla lavina vegn dalla **Val Ruinatsch** giu, neu sul **Rein** e sur in grond rieven si el vitg da **Selva**, sfraccond ensemen las casas dadens e tuts ils clavaus deno in sulet. 25 persunas han anflau cheu ina tresta mort e 17 ein vegnidias liberadas ord lur peinas ed anguoschas; era tschien tiers ein ventschi ella lavina. La glieud mitschada vegnan spert neutier cun pétgs e palas per cavar si ils sventirai, il venerabel caplon, cumpignaus dil caluster cun ina latiarna e provedius cul s. ieli, va pruamein entuorn per porscher agid e consolazion als moribunds cavai si. Denter ils liberai sesanflava la famiglia Riedi, ch'era la sera restada graderi en sia casa. Ils geniturs durmevan en stebli, sper lur letg sesanflava lur pli pign affon en tgina, il grond, Gion Clemens, era semess sin pegna stiva, cun siu frar pli giuven. Entuorn mesanotg bragia igl affon pign, la mumma pren el en siu letg, e beingleiti suenter aud'ella ina sgarscheivla canera e grescha: "Jesus! La lavina vegn!" In stausch - la casa ei sfraccada! Il plantschiu en stebli vegn giu sil letg, mo al lennplantschiu han ils geniturs d'engraziar, ch'els ein buca vegni smaccai cun lur affon. Igl uvierchel dalla pegna en stiva vegn spert fiers sin dus mauns e Gion Clemens e siu far dattan giu sillla lenna stuppad'en pegna. Vargaus il fraccass enquenan ils geniturs da susenttar ils dus buobs en stiva. "Nus essan en pegna, havein cauld e bien", rispondan quels dus frestgamein.

En bucca alla crudeivla mort, seconselond che tuts da casa seigien aunc vivs ed implond gl'agid da Diu cun caudas oraziuns, vegn la famiglia Riedi la sera sissu finalmein liberada ord sia horribla perschun. Ella auda lu a mond umens sulla neiv via, semptgai da turnar a casa schend: "Cheu savein nus far nuot, cheu sut ei tut ventschiu." "Udis buobs, tgei quels dian!", cloma la mumma, "ussa gri quei che vus pudeis!"

Clemens grescha e cloma cull'entira famiglia. La glieud suravi auda enzatgei ed entscheiva a cavar. Ventireivlamein vegn l'entira casada liberada ord fossa, ed en tgina anflan ei il giatcasa smaccaus dalla neiv, havend quel encuretg in bien igniv en tgina suenter che la mumma ha giu priu gl'affon en letg, che fuss tschelluisa era daventaus in'unfrenda dalla mort. Ils morts cavai si duront treis dis ein vegni zugliai en blahs, transportai sin sliusas a Sedrun e leu sutterai en ina fossa communabla. Clemens Riedi ei plaunsiu setratgs a **Mustér** e cheu ei lu succediu il november 1838 la renomada catscha sigl uors, il qual ha ina stad ora giu mazzau ina troppa stiarls. Adumbatten ha la vischnaunca da **Mustér** giu ordinau per s. Barclamiu ina generala catscha sin quella bestia, catschadurs eran postai pils cuolms entuorn, ferton che la glieud encurevan da leventar gl'uors cun grir, schumbrar e stgalinar, mo el ha buca schau seveser e silsuenter cuntuau sias spassegiadas da rapina.

L'entschatta november ein lura ils dus catschadurs e vischins a **Madernal**, Clemens Riedi ed Augustin Biscuolm vegni perina da far flucs cun quei malvugliu schani.

Gl'emprem di da catscha era Biscuolm sentardaus e Riedi semetta en siu ardiment tut persuls sin viadi. Ellas grauflas dalla **Val Barcuns** anfl'el fastitgs digl uors, el vegn en rocla e senza schientscha seretegn el sin ina platè. Revegnius continuescha el sia campagna, arriva tier in grep, nua ch'igl uors veva sia tauna. El cuchegia da quella en ed encorscha ils egls dalla bestia, che tarlischavan el stgir sco duas cazzolas. Riedi ei spert seresolvius, el tacca sia buis, metta si in capsel, fa ina s. crusch e tila, mo la buis disdescha per l'emprema e secunda ga. Cun metter si il tierz capsel va il siet, las vals ramplunan dil ferm plum ed igl uors dat si in terribel sgregn. Il catschadur seglia spert d'ina vart, prepara in niev siet, tuorna anavos, cuchegia dalla tauna en, mo encorscha negin uors. Nunsefidond da tut persuls irritar danovamein la bestia, va el per quella sera a casa e raquenta sia catscha a siu camerat Biscuolm.

L'autra damaun semettan omisdus sin viadi per far giu gl'uors. Biscuolm mava ordavon e tier in malpass sto Riedi star anavos entochen ch'il camerat va giu ordavon. Tuttenina audan ei in terribel sgregn ed igl uors seglia si dies a Biscuolm, che sederscha e rocla culla bestia d'ina pala giu. Vegrind giu encounter in pigniel vegnan els da part in da l'auter ed en in fiep ual sut reussescha ei a Biscuolm da catschar il calcogn da sia buis en bucca agl uors e cheutras tener el empau d'ina vart. Riedi seprofitescha da quella favoreivla posiziun, sieta sigl uors, quel pren la fuigia, mo vegn terraus dad ina secunda balla tarmessa da Biscuolm. La ventira per quel ei staus che Riedi veva il di avon sittau ellas missialas agl uors, aschia saveva quel buca ruir e Biscuolm ei en quella famusa cambrolla mitschaus cun enzacons sgreffels en fatscha.

Quella catscha d'uors ha 1838 fatg la ronda en tuttas gasettas ed ei silsuenter vegnida prida si sco remarcabladad egl allegau renomau cudisch da Tschudi, aschia ch'il mund posteriur vegn aunc a plidar dil catschadur Clemens Riedi. Possi el denton era haver anflau grazia sin l'auter mund!

Gasetta Romontscha nr. 22, 29 da matg 1879 (Feuilleton)

Piars

denter **Cavorgia** e **Mustér** in cudisch cun in summa ed ina brev da marcau. Da remetter alla stamparia encounter ina bonificaziun.

Gasetta Romontscha, nr. 23, ils 6 da zercladur 1879

Emprems signurs

Il 17 d.q. ei uonn gl'emprem signeradi passaus sull'**Alpsu** – ina famiglia englesa, vegnida en crotscha tochen sur **Tschamut** si e da leu naven serendida a pei frestg - e legramein sulla neiv - suenter ils umens che purtavan la bagascha. Las damas han schau plascher quell'emperneivla aventuretta, corunada cun in stupent appetit ed oreifer sien ad **Ursera**.

Fiera

Il negozi da nuorsas ha uonn buca giu la vivacitad d'onn. Ellas han l'entschatta pagau pli pauc e tier quei dueien quels che han cumprau si ellas, haver fatg pign gudogn, cun turnar a vender. Pli legreivel eis ei d'udir, ch'ina roscha purschals, catschai sulla **Alpsu** pella fiera d'**Ursera**, hagien leu pagau biebein, aschia che la **Cadi** ha aspects da saver vender ils tiers-casa pli bein egl **Uri** che giuviars. La fiera d'**Ursera** dalla jamna vargada ha danovamein mussau che nos tiers manedels ed armentivs pagassen in bien ton pli bia, sch'ei vegnissen teni empau meglier.

Gasetta Romontscha, nr. 25, ils 20 da zercladur 1879

Posta

Ils 29 da zercladur ei vegniu l'emprema posta sulla **Alpsu**, da nossa vart era la neiv fiers ora schon entgins dis avon, mo ils **Uranès**, ch'eran fatschentai pli fetg cun quellas lavurs sil **Gottard** e sillla **Furca**, han retardau l'avvertura. Il **Lucmagn** ch'era uonn surcargaus cun neiv, ei ruts atras per ier ed oz passa l'emprema posta quei

pass.

Gasetta Romontscha, nr. 27, ils 4 da fenadur 1879

Annunzia da mort

En profunda dolur fan ils suttascrets da saver a parents ed enconuschents, ch'ei hagi plaschiu agl Altissim da clamar ord questa tiella veta perpetna nossa cara consorta e mumma

Barla Catrina Decurtins, nata Cavegn

Ell'ei spartida ils 22 da zercladur suenter ina liunga malsogna e provedida cun ils s. sacraments e perduns pils moribunds ed ina vegliadetgna da 78 $\frac{1}{2}$ onns.

Nus recumandein sia olma alla pia memoria dils stimai parents ed enconuschents.

Rueras, ils 26 da zercladur 1879

Il mariu en malencurada

Giachen Decurtins

En num dils combrigiai affons

Hans Giachen, fegl

Gasetta Romontscha, nr. 27, ils 4 da fenadur 1879

Fiug a Bugnei

Sonda vargada han in per affons a **Bugnei/Tujetsch**, dau fiug in clavau cun far termagls cun zulprins fosforics; cun spert dar neutier glieud han ins pudiu riscuder ils baghetgs d'entuorn. In niev avis da metter meglier giudamaun quels prigulus zulprins.

Gasetta Romontscha nr. 31; 1. d'uost 1879

(30) A Sedrun, nua ch'ei flessegia rehamein latg e mèl, vegn construiu in local per ina cascharia communabla.

Scumandau da caveglier carrs ni autras caussas ellas chinettas, ni sillà strada. - Viu in marighel da 40 camutschs. - 76 nuorsas ein vegnidias en ina lavina. - Buca surcargar las alps e pastiras. - Amaturs dil delicius magnuc caura tuatschin fagein nus attents, ch'ei vegni la stad fatg magnuc caura.

Cadi

En consequenza d'in concediu beneficium inventari dueien tuts quens cul defunct pader Gallus Riedi da **Mustér** vegni dai en al president Franz Decurtins a **Trun**.

Gasetta Romontscha nr. 33; 15 d'uost 1879

Avis

Sin ina disgrazia, che vess maneivlamein saviu schabegiar cun ina crotscha ils 14 d.q. sillà strada dall'**Alpsu**, sesanfla il suttascret necessitaus da visar publicamein ils avdonts da quella da caveglier negins carrs ni autras caussas ellas chinettas, ni sillà strada per schar leu per pli ditg, cunzun temps da notg. Per tals surpassaments ha gl'uorden polizial da vias fixau in castitg da 2 – 10 frs.

Gion Poltera a **Tujetsch**, viè dall'**Alpsu**

Gasetta Romontscha nr. 34; 2 d'uost 1879

Catscha

Il davos d'uost ei ella **Val Nalps (Tujetsch)** vegniu viu in marighel da 40 camutschs, e l'emprema jamna dalla catscha han plirs catschadurs fatg buna raccolta, in da **Medel** ha sittau 14 muntanialas, dus quinaus da **Mustér** 7 camutschs, in da **Sumvitg** ha fatg giu egl uaul dadens la punt **Russein** in buc da camutschs che ha dau 70 glivras carn!

Gasetta Romontscha nr. 37; 12 da settember 1879

A piarder

Duas cauras da razza italiana ein idas a piarder da **Platta** tochen **Sedrun**. Tgi che sa novas da quellas ei supplicaus da schar saver gerau Lucas Caveng a **Sedrun**
Gasetta Romontscha nr. 38; 19 da settember 1879

Neiv

La jamna vargada ha ei en **Surselva** neviu giu tochen **Trun**, e las davosas alps han stuiu vegrin descargadas. Sils cuolms era ei nevada, e perquei ha la posta sull'**Alpsu** calau si avon l'entschatta d'october, ed ins ha giu gronda breigia da rabbitschar neu ils 29 e 30 da settember ils 60 – 70 cavals, ch'ils ustiers dad **Ursera** vevan priu si a tscheins per la stad en **Surselva**. A **Tujetsch** ein 76 nuorsas vegnidias en ina lavina e ventschidas. Ils èrs che eran aunc buca medi dapertut els aults, han leu danovamein pitiu dalla neiv e purgina.

Gasetta Romontscha nr. 40; 3 d'october 1879

Scumandar il caffè

Sin quels miserabels prezis dils stiarls pudess ins tuttina dumandar si **Tujetsch** ni **Medel**, nua chiei vegn a proporziun tratg ils pli biars stiarls, schebein ei fusi buca pli profiteivel da trer empau pli paucs e buca surcargar las alps e pastiras, mo persuenter buca cumprar ina tala massa pieun e caschiel jester? Quei patratg ei vegnius tscheidiatsch, cu ins udeva las schliatas novas da **Ligiaun** e veseva el medem temps in marcadont jester da pieun e caschiel, che mava en crotscha a **Medel** ed in vitturin tuatschin, che semudergiava dad ir a casa cun ina carga pieun e caschiel jester. Denton maniava in marcadont da stiarls, ch'il pli radical remedii encunter il consumar ton pieun e caschiel fusi – piglei buca tema stimadas lecturas – da scumandar il caffè. Basta, sur quei tema naziunal-economic lein nus arver la discussiun pli tard.

Gasetta Romontscha nr. 42; 17 d'october 1879

Plazzas en Baviera

Dus ni treis schinumnai „Schweizers“ che han da gidar a perver, vegn ei encuretg per ina possessiun en **Baviera**, umens da 18 – 35 onns. Els han cuost e quatier e lura aunc 6 marcs (7.50 frs.) pagaglia per jamna. Aspirants per quellas plazzas dueien ton pli spert s'adressar tier

Gion Antoni Monn, il giuven a **Sedrun**

Gasetta Romontscha nr. 44; 31 d'october 1879

Il suittascret fa cheutras da saver ch'ils „Schweizers“ per la **Baviera** seigien schon pladi.

Gion Antoni Monn a **Sedrun**

Gasetta Romontscha nr. 45; 7 da november 1879

Cauras

Sis cauras ein fugidas neu dad **Ursera**, ellas eran cumpradas ed han differentas nodas, 5 han denter auter ell'ureglia seniastra in snez davon enagiu entraviers e la sisavla, nera, ha giu miez l'ureglia seniastra. Denter las empremas ei ina gaglia, ina nera muota, ina cotschna cun tgiern uiersch, ina che tila sil grisch ed ina nera cun alv da mintga maun. Tgi che sa novas ei supplicaus da schar saver Martin Peder a **Tschamut**.

Gasetta Romontscha nr. 45; 7 da november 1879

Clom d'emigraziun

D'emigrar ell'**America** ein intenziunai Giachen Franzestg Berther, cun sia famiglia e

Condrau Anton Derungs, cun dunna ed affons, omisdus da **Rueras**, sco retschevider da quens ei numnaus assistent J. Antoni Schmit da **Sedrun**; pli il giuven Gion Giusep Giossi da **Bugnei**, che ha Sep Antoni Deragisch sco retschevider da quens; pli la giuvna Barbla Cathrina Geriet da **Rueras**, che ha gerau Stoffel Riedi da **Rueras** sco retschevider da quens. Tgi che ha quens cun ils sura numani emigrants duei dar en quels als sura retscheviders da quens el termin da 3 jamnas.

Mustér, ils 12 da schaner 1880

Igl Uffeci circuital dalla **Cadi**

Fegl Ufficial nr. 3 dils 16 da schaner 1880

America

Il suttascret fa cheutras da saver, ch'el seigi intenziunaus dad ir ell'**America** per la secunda ga e tgi che ha quen encunter el duei dar en el termin da 3 jamnas.

Hans **Tujetsch** (*da Falera*)

Gasetta Romontscha nr. 5; 30 da schaner 1880

Venal

Ina possessiun per in pur ei venala a **Rueras**, **Tujetsch**, consistenta ord:

- 1) ina mesa casa, clavau, truaisch ed iert, dasperas
- 2) 2750 tschuncheismas prau grass a **Dieni** cun dus maghers,
- 3) 1200 tschuncheismas prau a **Flurin Dadens** cun in toc magher, che sepeglia vid il grass. Quellas duas aclas schaian mo 5 minutias sul vitg da **Rueras**.
- 3) in bien mises.

Ulteriur sclariment dat Toni Derungs a **Rueras**.

Gasetta Romontscha nr. 6; 6 da fevrier 1880

Cadi

Pils suandonts emigrants da **Tujetsch** ei vegniu numnau sequents retscheviders da quen da leu:

- 1) assistent Schmet per las famiglias emigrantas da Giachen Franzestg Berther e da Condrau Anton Derungs.
- 2) Sep Antoni Deragisch per Gion Giusep Giossi
- 3) gerau Stoffel Riedi per Barla Catrina Geriet

Gasetta Romontscha nr. 6; 6 da fevrier 1880

Plevon Vigeli Venzin

Ils 6 d.q. ei igl aultreveriu signur Vigeli Wenzin da **Tujetsch**, il senior dil clerus dalla diocesa **Cuera**, vegnius surdaus al ruaus dalla fossa. Il defunct ei spartius ils 4 da quest (*fevrier*) ell'aulta vegliadetgna dad 87 onns e 10 meins, suenter ina dolorusa malsogna da 15 dis, la quala el ha surpurtau cun tutta pazienza e resignaziun.

Naschius a **Tujetsch** ils 3 d'avrel 1792, ha il defunct fatg siu gimnasium e liceum ella venerabla claustra da **Mustér**, sedecidius da leger ora il stan spiritual, ha el entschiet il studium dalla teologia tier igl erudit sur decan Hitz, da gliez temps farrer a **Sedrun**, e lura finiu quel el seminari clerical a **Cuera**. Ils 17 d'october 1817 eis el vegnius benedius ora sco spiritual, beingleiti suenter tarmess da ses superiurs a **Razen**, all'entschatta sco provisur, e suenter eis el dalla pleiv vegnius legius ora sco farrer. Sco fideivel e nunstunclenteivel pastur dallas olmas ha el pastorau cheu 36 onns, aschiditg sco sias forzas corporalas han ad el quei lubiu. Sco farrer a **Razen** era sur Wenzin respectaus e carezaus, e quei aschibein da sia entira pleiv sco era da ses signurs confrars, ils quals han legiu ora el sco secretari da lur capetel, enten il qual uffeci el ha funcziunau 32 onns. Essend la pastoraziun dalla gronda pleiv a **Razen** vegnida memia greva per sia avanzada vegliadetgna, ha el resignau quella ed ei sereratrags en sia vischnanca nativa a **Tujetsch** e surviu a **Sedrun** ed a **Rueras** sco caplon entochen 1867. Havend el cheu piars totalmein sia vesida, eis el staus

necessitaus da dar giu la caplania e seretrer anavos sin sia possessiun el pign vischinadi da **Bugnei**, nua ch'el ei aunc vivius 13 onns. Per sia gronda consolaziun ha el cheu aunc mintgadi saviu celebrar la s. messa, e quei entochen tier sia davosa malsogna. Era aunc en sia retratgadad a **Bugnei** ha sur Wenzin prestau bia buns survetschs a ses vischins. Entras sia gronda experienza era el el cass da gidar cun plaid e cussegli tut tgi che vegneva tier el, ed igl ei aschia buca da sesmarvegliar, che l'entira vischnaunca ha dau al venerabel defunct la davosa honur cun cumpignar el tiel ruaus dalla fossa. E nus tuts clamein suenter al defunct: «sin seveser ella perpetnadad». R.I.P.

Gasetta Romontscha nr. 7; 13 da fevrier 1880

Cascharia a Sedrun

Sche nus havein cun caschun dalla schliata fiera da **Ligiaun** digl atun vargau giu selubiu da cussegliar als da **Tujetsch** da trer empau pli pauc vadials e persuenter cumprar negin pieun e caschiel jester, sche legr'ei ussa nus da saver notificar, ch'ei vegni ussa ella capitala da quella vallada, nua ch'ei flessegia rehamein latg e mèl, construiu in local per ina communabla cascharia. Amaturs dil delicius magnuc caura tuatschin fagein nus attents, ch'en quella cascharia vegni la stad fatg magnuc caura, che vegn ad haver bien esit.

Gasetta Romontscha nr. 12; 19 da mars 1880

(31) Auters onns vegneva cheu vendiu in grond diember cauras per bials prezis

Dazier per Tschamut

La piazza da dazier cantunal a Tschamut cun 100 frs. paga, la quala sa vegnir alzada, sch'il traffic sull'Alpsu crescha tras la viafier gottardista, ei scrett' ora en concurrenza. Aspirants ston dar en sillia fin da quest meins alla administraziun dallas finanzas cantunalas.

Gasetta Romontscha nr. 17; 23 d'avrel 1880

Pass Alpu

Era gl'ault pass dalla Bernina ei cun pintga breigia vegnius fatgs carregiabels ils 6 da matg. Cun 50 frs. vegness era il pass dall'Alpsu aviarts da nies maun.

Gasetta Romontscha nr. 20; 14 da matg 1880

Ils 18 d.q. ei il stradun sull'Alpsu vegnius aviarts per carrs e crotschas.

Gasetta Romontscha nr. 21; 21 da matg 1880

Piars

In terschiel cun la noda T ed ina fuortga ei vegnius piars denter Mustér e Tujetsch la davosa fiera a Mustér. Igl anflader ei supplicaus da remetter el a Camischolas tier Paul Schmet, ni ella Cruna a Mustér.

Gasetta Romontscha nr. 22; 29 da matg 1880

Posta

Per cuntentar las reclamaziuns ed ils differents interess dalla Surselva ha il departement postal concediu a quella tiella posta dall'Alpsu aunc dus cuors locals. La posta dall'Alpsu va naven da Cuera las 4 e 35 min dalla damaun, gentar a Mustér ed arriva las 6 dalla sera ad Ursera; en siu retuorn vegn ella las 10 e mesa avonmiezdi a Mustér ed arriva a Cuera las 6 e 20 min dalla sera. Il cuors local denter Cuera e Mustér va las 10 e mesa avonmiezdi naven da Cuera, vegn a Mustér las 7 e 15 min dalla sera, la damaun allas 5 parta quella posta da Mustér ed ei allas 12 e 20 min da

miezdi a Cuera. ...

Gasetta Romontscha nr. 23; 4 da zercladur 1880

Manteniment dallas vias

Discussiun generala el Cussegl grond sur il niev project per manteniment dallas vias. Il paragraf 3 sulla cunfinaziun dils pass alpins dallas vias da communicaziun: Alpu, Lucmagn, Albula, Bernina, Fuorn e Flüela ha dau bia da far e cun 31 vusch encunter 30 ei sin proposizion da Peterelli e Manatschal stabiliu, che per regla duei vegnir considerau, ch'il pass alpin sestendi mo dalla davosa vischnaunca da quest maun dil cuolm tochen tier l'emprema vischnaunca da tschei maun dil cuolm.

Condrau ha garegiau, ch'ei duei vegnir quintau, ch'ils pass Alpu e Lucmagn entscheivien buca per a Sedrun e Platta, mobein el vitg da Mustér e quei tenor cunvenziun fatga cul cantun 1861. Il Cantun hagi quasi sfurzau si a Mustér e Tujetsch la strada dall'Alpu e sulettamein garegiau, che quellas duas vischnauncas surprendien l'expropriaziun, il dar il material, menar la gera, mo ussa vegli ins far supreender ellas gl'entir manteniment. Ella cunvenziun dil cantun, serrada giu culla Confederaziun, hagi il Cussegl grond claramein declarau da supreender il manteniment naven dil vitg da Mustér tochen sils cunfins uranès. Per far la segira hagi la vischnaunca da Tujetsch aunc giu fatg dar il cumissari guvernativ in agen revers, ch'ella seigi mai e pli mai obligada da purtar pli grondas grevezias pil manteniment dalla strada dall'Alpu ed ussa duei tut vegnir fiers dad ina vart. 1840 hagi Tujetsch dau en cullas outras vischnauncas sursilvanas sia scartira da mantener la via nova e garegiau che quella vegni baghegiada tochen Rueras, mo la cumissiun cantunala hagi 1841 declarau, che la strada sursilvana mondi mo tochen Mustér. Uss denton veglien ins far ir ella tochen Sedrun e quei en contradicziun cun cunvenziuns cul Cussegl Grond e culla Confederaziun. Quei seigi in agen dretg statistic, che la dertgira federala vegni ualvess ad approbar pil cass d'in recuors. Dad aunc far mantener Mustér la strada dall'Alpu tochen sils cunfins da Tujetsch e quella dil Lucmagn entochen la punt sper l'uniun dil Reinsu e Reinmiez, vegni ei cargau si a quella vischnaunca il manteniment d'ina tenda vias ella lunghezia dad endisch kilometers! Cheu encunter ei vegniu allegau, ch'ins hagi a siu temps concediu memia bia a quellas duas vischnauncas, ins stoppi tractar ellas sco las otras, da Mustér a Sedrun seigi negin cuolm, mobein ina biala vallada. Il davos ei vegniu, che la strada dil Lucmagn duei il cantun muort siu difficultus terren mantener naven dil vitg Mustér, l'Alpu denton per naven da Sedrun.

Gasetta Romontscha nr. 24; 11 da zercladur 1880

Manteniment della via

Il niev project stabilisescha che tiels pass alpins dallas stradas da communicaziun, hagien las vischnauncas territorialas da prestar l'expropriaziun, schar prender il material, menar la gera e dar ils necessaris umens per gidar a rumper via ni nua che la communicaziun vegni interrutta en cass extraordinaris. Gl'ulteriur manteniment ha il cantun.

Gasetta Romontscha nr. 24; 11 da zercladur 1880

Fiera

Sil marcau da Glion dils 7 d.q. (*zercladur*) ei cumpariu negins marcadonts tudestgs da sutsi e muort la pintga tscherca ein ils prezis dalla biestga sbassai considerablamein. Quei ha lu animau ils marcadonts da Tujetsch e Medel da cumprar si roschada armauls. Era ils pors eran quella ga bienmarcau. Sin quei fuva ei da preveder, che la fiera da Tujetsch (Sedrun) dils 8 d.q. (*zercladur*) vegni ad haver pintga vivacitad. Auters onns vegneva cheu vendiu in grond diember cauras per bials prezis, mo uonn pagavan quellas mo 18 – 20 frs. – Il negozi da nuorsas ei uonn era buca staus schi vivs sco auters onns, nuotatonmeins han ellas pagau andants prezis.

Gasetta Romontscha nr. 24; 11 da zercladur 1880

Piars

Ina bancnota da 20 frs., probabel zugliada en ina brev, ei vegnida piarsa denter Tujetsch e Cumpadials. Il recla anflader ei supplicaus da metter amauns quella alla stamparia a Mustér.

Gasetta Romontscha nr. 27; 1. da fenadur 1880

America

In emigrat Tuatschin, che sesanfla già varga diesch onns ell'America, ha dacuort notificau a nus, ch'ei seigi tras la Ligia Grischa da Stillwater, vegniu fundau ina nova colonia cul num Badus el territori da Dakota. Scadin commember dall'uniu grischuna ha stuiu pagar 15 dollars daner d'entrada e lu aunc in dollar per meins pil cuoz da 15 onns. Cun quels mettels han ins acquistau in adattau plaz per secollocar leu tutsensem. Quel ei vegnius anflaus ellas preras da Dakota (*dil Sid*), 300 miglias el vest da Stillwater. Il mars 1879 ei lu setratg leu ina gronda partida, che ha entschiet a baghegiar casas amiez ils praus entuorn in lag. Igl ei cheu ranschau en in'ustria, ina stizun ed ina posta jamnila. Badus sesanfla denter duas novas viasfier en, ella distanza da treis tochen tschun uras. Las casas ein baghegiadas si cun aissas e biares mo da tschespets, ch'ein leu fetg qualificai per material da baghegiar. En munconza da lenna vegn ei barschau fein e cotbla da crap. Igl ei vegniu construiu ina casa da scola, che survescha ad interim era per baselgia inagada il meins. Il liug Badus s'ingrondescha di per di e la Ligia Grischa ei renconuschida sco corporaziun, che ha ils dretgs da vender e cumprar tiara. Ils gronds e bials èrs han leu stupenta pareta. Possi il Badus american crescher e flurir pli e pli!

Gasetta Romontscha nr. 31; 29 da fenadur 1880

Spirituals

Dumengia vargada ha monsignur uestg benediu ora dus novs spirituals grischuns: signur Fidel Deflorin da Mustér e signur Thomas Berther da Tujetsch.

Gasetta Romontscha nr. 32; 6 d'uost 1880

Messa nuviala

Cun gronda solemnidad e bialas significantas decoraziuns ei ils 8 e 15 d.q. vegniu celebrau messa nuviala a Mustér e Tujetsch (*sur Tumaisch Giusep Berther 1853-1931*).

Gasetta Romontscha nr. 34; 19 d'uost 1880

Dieschma

En ina questiun denter ils vischins e la vischnaunca da Tujetsch pervia dil modus co cumprar ora la dieschma, fatga pendenta tiel Cussegl Pign, ei president districtual Tuor a **Rabius** eligius sco cumissari guvernativ.

Gasetta Romontscha nr. 36; 2 da settember 1880

Amiez la veta la

L'annunzia da mort cuntenida en quest numer fa puspei endamen a nus il vegl proverbi: amiez la veta la mort seschluetta. Sauns e fretgs ha Gion Antoni Deragisch a **Sedrun** assistiu ils 9 d'october allas funcziuns ed oraziuns fatgas leu quei di en sufragi da sia quinada morta a Stillwater ell'America; el tuorna lu a casa, mida vestgadira e va tiella lavur sils funs, cumpignaus dad in affon da 3 onns e miez. Havend el purtau il secund buordi risdiv, sesa el giu e sederscha tutteninaga.

Gl'affon peglia tema, cuora tier las proximas casas, bragia e di: il bab ei sederschius e morts. E leider han ins anflau quel morts. R.I.P.

Gasetta Romontscha nr. 43; 21 d'october 1880

Prefect

Signur Thomas Berther da Tujetsch, che ha fatg messa nuviala questa stad, ei numnaus prefect el seminari clerical da s. Leci.

Gasetta Romontscha nr. 47; 18 da november 1880

Ligiaun

La tiarza fiera da Ligiaun duei era esser ida mal per munconza da cumpraders. Sco raritad remarchein nus aunc, che malgrad ils bass prezis, hagi Tumaisch Monn da Tujetsch vendiu in stupent stierl da siu tratg per 190 frs., ferton ch'ei era il di avon vegniu vendiu in bov, in mutg da dus onns, per 60 frs. Tgei letga da tiers!

Gasetta Romontscha nr. 49; 2 da december 1880

(32) Muort la scartezia da fein han biars teniu uonn ad honur la rabetscha da truffels cun secentar ella

Ils tiers manedels, che pasculavan gl'entir di ora, han spargnau bia fein. - Tujetsch para dad esser la val dalla cucagna. - Ils Tuatschins han per quel obteniu circa 27 frs. enstagl mo 5 frs. - Fastitgs dad in uors. - Il mender ei stau, ch'igl ei sin via rut ora la zoppina en ina roscha da Tujetsch. -

Stupents dis suleglivs

Enstagl d'ina ferdaglia da 20 grads sco onn, ha l'emprema terzina dil december cuntinuau culla stad s. Martin dalla secunda mesadaad november. Ei era stupents dis suleglivs, la damaun sil pli in ni dus grads freid e da miezdi cauld e bien. Ils tiers manedels, che pasculavan gl'entir di ora, han spargnau bia fein, aschia che quel ei uonn bienmarcau. Per midar nuegl sin plauncas era ei denton pli malsegir, che da neiv, ed ella **Cadi** han cheutras plirs armauls piars la veta. Ad in beinstont pur da **Sumvitg** ein enten midar nuegl e passar sur in glatsch sgargliau sias duas principales vaccas idas surengiu, a **Mustér** ei era ruclau ina ed en **Tujetsch** duas.

Gasetta Romontscha nr. 51; 16 da december 1880

Val dalla cucagna

Tujetsch para dad esser la val dalla cucagna. Ferton ch'ils funs ein ils davos onns en consequenza dils sbassai prezis dalla biestga e da bia scussiuns quasi dapertut curdai en prezi, ei leu quels dis aunc vegniu vendiu entiras tschaveras prau per 3 frs. 40 ct. la tschuncheisma vedra (circa 4 meters quadrats).

Gasetta Romontscha nr. 8; 24 da fevrier 1881

Elegiu plevon

La pleiv da **Tujetsch** ha unanimamein elegiu sco plevon signur Giachen Antoni Beer, caplon a **Sedrun**, ed ha surdau la caplania a signur Tumaisch Berther da **Rueras**, che banduna da Pastgas il seminar clerical.

Gasetta Romontscha nr. 15; 11 d'avrel 1881

Cumpra da stiarls

Sperond ch'ils prezis dalla biestga sesaulzien gl'atun proxim, entscheivan ils marcadonts dalla fiera da **Ligiaun** a comprar si stiarls e vadials. Il grond e beinvesiu Furrer d'**Ursera** ha la jamna targada cumprau si mo ella vischnaunca da **Tujetsch** 115 stiarls e pagau 15 – 17 marenghins il pèr. Bravo!

Gasetta Romontscha nr. 17; 28 d'avrel 1881

Cumin 1881

Dertgira circuitala: Luregn Jacomet, **Tujetsch**; suppleant da mediatur: assistent

Schmed; supplenat per la dertgira circuitala: Christian Muggli da **Tujetsch**
Gasetta Romontscha nr. 18; 4 da matg 1881

Tarmess en

Als aultreveri signurs spirituals ed als signurs ugaus baselgia, che vulan metter tier paramenta ni vischala da baselgia, savein nus culla megliera perschuasiun recumandar il negozi da signur J. J. Deplazes (*Deplatz*) a **Regensburg** en **Baviera**. Quel ha ina gronda elecziun da tuts artechels, furnescha quels en biala lavur artistica ed el stil ecclesiastic e quei tut per fetg raschuneivels prezis. Quei signur ei nies cumpatriot, burgheis dalla vischnaunca da **Tujetsch**, e tier empustaziuns ord siu cantun nativ, pren el ton sco pusseivel particular risguard.

Gasetta Romontscha nr. 20; 19 da matg 1881

L'ustria Rheinquelle a Tschamut

ei da miez matg puspei vegnid'aviarta. Engraziond pella confidanza demussada encunter quella ils onns vargai, serecamonda danovamein ad in ludeivel publicum il proprietari da quella

Lucas Cavegn

Gasetta Romontscha nr. 21; 25 da matg 1881

Pass

L'**Alpsu** ei vegnida aviarta schon ils 28 da matg e da lu enneu ein schon pliras crotschas idas da **Cuera** ad **Ursera** cun jasters.

Gasetta Romontscha nr. 22; 3 da zercladur 1881

Ina buis ei vegnida brattada giu

tiella davosa inspecziun dallas armas a **Mustér**, ell'ustria dalla Cruna. La buis, ch'ei vegnida prida leu naven e che vegn cheutras reclamada, ha il numer 2137 dallas buis dil landwehr.

Quel che ha brattau giu ei supplicaus da schar saver Cristian Valentin Monn a **Sedrun**.

Gasetta Romontscha nr. 22; 3 da zercladur 1881

Dertgira

Suppleant dalla dertgira districtuala: capitani Muggli da **Tujetsch**.

Gasetta Romontscha nr. 23; 9 da zercladur 1881

Resultat

Tenor ufficiala publicaziun ei il niev project pervia dil manteniment dallas vias vegnius refusaus cun 5810 encunter 5782, aschia cun ina majoritad da mo 28 vuschs.

Gasetta Romontscha nr. 25; 23 da zercladur 1881

1881

Suenter in bien examen han treis gimnasiasts dalla scola cantunala ed il seminarist, Martin Berther a s. Leci da **Tujetsch**, obtenui gl'attestat da maturitad. Ils 9 d.q. vegn la scola cantunala serrada.

Gasetta Romontscha nr. 27; 7 da fenadur 1881

Recruts

Suenter haver fatg ina campagna sul **Pass Cunchels** per prender en la **Partsura Sogngagliësa**, nua che plievgia e suffel han leider impediui solits manevers, ein ils recruits a **Cuera** vegni relaschai. Ils Sursilvans eran fetg cuntents d'haver survegnii uonn la taxa montana per daner da viadi, aschia ch'ils Tuatschins han per quel obtenui circa 27 frs. enstagl mo 5 frs. Speronza che bein enqual spargnus recruit hagi

aschia saviu purtar daners a casa. Deplorabel eis ei mo, che aschi bia recruits vulan tier la partenza sefa gronds cun haver in stumbel cigara en bucca. Tresta parada!
Gasetta Romontscha nr. 27; 7 da fenadur 1881

Verduras

Tenor conclus guovernativ duei uonn puspei vegnir teniu in diember referats da viadi ed entgins cuors per mussar la cultivaziun da legums (verduras). Ils referats tracteschan dall'economia dallas alps e dil latg, dalla tratga da biestga, dall'agricultura, cultivaziun da pumera, da cultems etc. ed ins ha el senn da schar tener quels a Trin, Sagogn, Breil, Trun, Mustér, Sedrun, Tavanasa, Pitasch, Versomi, Razen, Urmein e Ziraun.

Gasetta Romontscha nr. 31; 4 d'uost 1881

Uors

En Tujetsch vulan ins haver fastitgs dad in uors che duei haver scarpau nuorsas en in per loghens. Quella vischnaunca ha vendiu uonn fein a pastg per circa 2000 francs.
Gasetta Romontscha nr. 37; 15 da settember 1881

Fiera

En rectificaziun dil davos numer da nossa gasetta relatein nus posteriuramein, ch'ils Glarunès seigien serendi sul cuolm **Pigniu** e **Lucmagn** cun pliras roschas biestga per la fiera da **Ligiaun**, resp. **Giubiasco**, essend ch'els passan buc il **Monte-Ceneri** cun lur vaccas. Persuenter eis ei uonn iu zun negina biestga glarunèsa sul **S. Bernardin**. Ils marcadonts da **Tujetsch** e **Medel** han giu uonn gronda furtina d'empruar lur fortuna ed ein gia semess sin via ils 19 d.q. A **Giubiasco**, nua ch'ei paga per ordinari il meglier, han ei uonn vendiu pauca biestga ed han lura instradau lur roschas per **Ligiaun**.

Gasetta Romontscha nr. 39; 29 da settember 1881

Fiera

La fiera da **Ligiaun** ei ida mal, schegie che negin seregorda, ch'ei seigi iu sul **Monte-Ceneri** schi pauca biestga sco uonn. Il mender ei stau, ch'igl ei sin via rut ora la zoppina en ina roscha da **Tujetsch**, che negin sa co igl ei iu tier. Quella ei lu vegnida serrada giu damaneivel da **Ligiaun**. Per ventira ei la malsogna buca seresada pli lunsch, mo la tema che quei savessi daventlar, ha fatg dar giu ils tiers pli bienmarcav. A **Sebiastg** era aunc vegniu vendiu stiarls per andants prezis; il meglier pagavan leu las grondas e bialas vaccas glarunèsas, fittaders han pagau per quellas tochen 50 marenghins il pèr ed aunc dapli, ferton che las mugias pagavien a proporziun mender. Ils purs talians vevien stuiu vender lur biestga gronda bienmarcav e levien a **Ligiaun** pagar pauc pils stiarls. Il davos seigi vegniu vendiu mo per 8 - 9 marenghins il pèr. Entgins marcadonts ein vargai giu per buca dar giu schi bienmarcav.

Gasetta Romontscha nr. 40; 6 d'october 1881

Ursera

La nova fiera d'**Ursera**, nua ch'ei fuva era vegniu catschau biestga da **Mustér**, **Tujetsch** e **Medel**, ei stada fetg viva, mo ils prezis erien permiezvi. Cull'avertura dalla viafier gottardista han ins speronza da survegnir ad **Ursera** ina gronda fiera centrala pil commers da biestga denter l' e la **Svizra**.

Gasetta Romontscha nr. 41; 13 d'october 1881

Secunda fiera

Cun quei che la secunda fiera da **Ligiaun** ei il davos puspei ida mal, aschia ch'ins ha stuiu vargar giu cun bia bietga e ch'ils marcadonts, che han cumprau si vaccas per catschar quellas giuviars e sull'**Alpsu** pellas fieras luzernèsas, han tenor lur

gudignau pauc ni nuot malgrad ils bass prezis, ch'els han pagau, va ei plau vinavon cun alzar empau ils prezis. - Denton ei schon vegniu vendiu ina tala massa biestga, ch'ins sto buca far naven pli biara per munconza da fein. Quel vegn ussa vendius ella **Cadi** per circa 40 frs. la veglia tschuncheisma gronda da circa 8 meters cubics. Il medem prezi ha era il fein a pastg en **Tujetsch**. Muort la scartezia da fein han biars teniu uonn ad honour la rabetscha da truffels cun secentar ella, far flucs ord la feglia e dar ils stumbels allas cauras, che maglian quels pli bugen che fein.

Gasetta Romontscha nr. 45; 10 da november 1881

Vinars

Vinars d'ansauna bien e real, niev e veder, magari 100 liters, venda per in raschuneivel prezi Leci Balzart a **Tujetsch (Cavorgia)**.

Gasetta Romontscha nr. 46; 17 da november 1881

(33) Il Rein mava fetg ault ed ha priu naven las punts da Sedrun Lubientscha d'astgar far la catscha. - Passau tras Turitg circa 60 personas dalla Surselva, las biaras da Tujetsch. - Da 5 cauras survegniu 11 anseuls e tuts sauns e frestgs. - En Tujetsch han ins stuiu rischlar risdiv la sera cun latiarnas. - Ins ha leu numnadamein anflau per bien da buca sittar pli tier nozzas.

Uolps

Muort il grond donn dallas uolps vid ils tschuts ha la val Tujetsch obteniu la lubientscha d'astgar far la catscha sin quellas tochen calonda mars. Cun quella caschun ha capitani Felix Vincens da Mustér, per gronda legria dils Tuatschins, sittau leu in stupent tschess rojal (Steinadler), che mesira cullas alas biabein 7 peis.

Gasetta Romontscha nr. 8; 23 da fevrer 1882

Tschess

En Tujetsch han dus tschess rojals quest unviern sfraccau si bia tschuts, tschancs e tgigischs; il grond da quels ei, sco schon relatau el davos numer, vegnius fatgs giu leu ils 18 da fevrer e l'auter ei ussa era vegnius sittaus ils 27 da fevrer dil catschadur Stiafen Fry da Sumvitg. En Valrein ei era dacuort vegniu sittau in grond e bi tschess rojal, che miseravi 16 peis (??) cullas alas stendidas ora.

Gasetta Romontscha nr. 9; 2 da mars 1882

Emigraziun

Buca ver! La Nova Gasetta da Turitg e suenter quella era il Rätier e Tagblatt raquentan, che mesjamna, ils 29 da mars, seigi passau tras Turitg circa 60 personas dalla Surselva Grischuna, las biaras da Tujetsch, per serender ell'America. Ils 28 seigien leu ir ordavon 20 auters Sursilvans, per la gronda part da Sursaissa, e sco quels hagien sincerau, vegnien questa primavera aunc biars a vegnir suenter els e l'emigraziun ord il Grischun vegni a prender ina extraordinaria extensiun. Quasi schi nunverdads sco lingias! Da Tujetsch van mo 6 personas ell'America, e quels ein semess sin viadi per ils 31 da mars. Da Sursaissa era ei stau iu in triep ordavon, mo sch'in pèr da quels, supponend forsa che ins laschi encrescher per els, han dau da crer, ch'aunc roschas Sursilvans vegnien a vegnir suenter els ell'America, sche pudessen ei secuglienar. Dad ina emigraziun en massa audan ins nuot ed ils vegls proverbis: «stai a casa e setila via undreivlamein» e «negliu sgolan utschals barsai en bucca», han aunc adina lur valur. Dentonlein nus haver agurau bien viadi e tutta ventira a nos cumpatriots emigrai.

Gasetta Romontscha nr. 14; 6 d'avrel 1882

Pials

Las pials ansiel pagan mal uonn, da biars onns enneu ein ils prezis da quellas buca stai pli aschi bass. Ei vegn plidau da 2 - 3 frs 50 ct. Cheu ei surviu sche ina caura fa dus anseuls ed aunc dapli, sco igl ei a nus vegniu raquintau dad in pur en **Tujetsch**, che ha da 5 cauras survegniu 11 anseuls e tuts sauns e fretgs. – Dil negozi da nuorsas audan ins aunc nuot, ferton che onn da quei temps era gia cumprau si biaras.

Gasetta Romontscha nr. 15; 13 d'avrel 1882

Fein a pastg

Diesch viertels fein a pastg ein venals tier Vigeli Werth a Selva.

Gasetta Romontscha nr. 15; 13 d'avrel 1882

Cuors postal

Sin remonstraziuns da vart d'**Uri** ei il planisau secund cuors da posta sull'Alpsu vegnius strihaus.

Gasetta Romontscha nr. 19; 11 da matg 1882

Pass

Cun quei ch'ils pass dall'Alpsu e dil Lucmagn ein stai aviarts schi baul, ei gia il matg schon passau dabia jasters tras la Surselva, che vegn speronza tras la viafier gottardista a survegnir pli numerusa frequenza da quels e pli gronda vivacitad.

Gasetta Romontscha nr. 23; 7 da zercladur 1882

La fiera da Sedrun

dils 8 da zercladur, che curdass uonn sillla fiasta da s. Sontgilcrest, vegn perquei tenida il di avon, mesjamna ils 7 da zercladur.

La suprastonza da Tujetsch

Gasetta Romontscha nr. 22; 1. da zercladur 1882

Fieras

Las fieras dad **Ursera** e **Sedrun**, che han uonn fatg concurrenza ina a l'autra, ei vegniu marcadau pauc ...

Gasetta Romontscha nr. 24; 15 da zercladur 1882

Dracca

Dumengia vargada suentermiezdì ha ella Cadi draccau zun fetg, il Rein mava fetg ault ed ha priu naven las punts da Sedrun a Surrein. ...

Gasetta Romontscha nr. 28; 13 da fenadurs 1882

Anflada

Capitani Mucli da Tujetsch ha quels dis fatg sillas alps ina rara anflada – ina cavazza camutsch cun corns bein conservai.

Gasetta Romontscha nr. 33; 17 d'uost 1882

Glin

Ch'ei vegneva tratg ora glin en Tujetsch per igl october, ei ina remarcabladad che mereta da vegnir nudada si.

Gasetta Romontscha nr. 40; 5 d'october 1882

Bletsch

L'emprema mesadad digl october ha cuntuau cul sbletschergnem ed ins ha giu tribla miseria da ventscher si ils fretgs. En Tujetsch han ins stuiu rischlar risdiv la sera cun latiarnas. Tuts fretgs empermettevan la stad ina reha raccolta, mo las

plievgias e neivs digl atun han destruiu la biala speronza.
Gasetta Romontscha nr. 42; 19 d'october 1882

Secund cuors

Sch'il Tagblatt fa attents sils avantatgs, che Mustér vegni a retrer la stad ord in dubel cuors da posta sull'Alpsu, sche savein nus notificar ad el ch'ils Uranè s hagien schon ussa instanziau tier lur regenza per far luvrar ora, che quei secund cuors vegni da **Berna** ano puspei strihaus, ual sco igl ei stau onn il cass. Vediamo!

Gasetta Romontscha nr. 52; 28 da december 1882

Lavina

Ils 26 allas 4 dalla damaun ei a Selva vegniu giu ina ferma lavina, che ha fatg tremblar las casas, mo ins ei mitschaus culla sgarschur e tema.

Gasetta Romontscha nr. 52; 28 da december 1882

Traffic

Per promover il traffic sull'Alpsu ed il Lucmagn vul il departement postal schar entscheiver ad ir la posta sur quels dus schon ils 15 da zercladur, enstagl per calonda fenadur ed ha perquei dumandau si nossa regenza, schebein ella vegli procurar, che quels dus cuolms seigien sin lura aviarts per carrs. Quella ha exprimiu promtadad cheutier, ed ei perquei semessa en correspondenza culla regenza d'**Uri**.

Gasetta Romontscha nr. 2; 11 da schaner 1883

Nurser

La vischnaunca da Tujetsch enquera suenter in taffer e bein versau nurser, sco pastur da sia entira muntanera nuorsas per il temps dalla proxima stad. – Aspirants han da s'adressar persunalmein tier la suprastonza da Tujetsch.

Gasetta Romontscha nr. 7; 15 da fevrier 1883

Marcadonts

Bavareò ein stai tochen Tujetsch e cumprau si leu vaccas, vadials giuvens e taurs per bials prezis, aschia ch'ils marcadonts da leu han saviu seperschuader, ch'ei seigi stau dad els ina schliata speculaziun da sez vuler serender cun vaccas sillà fiera bavareò a Sonthofen enstagl schar vegnir si tier nus ils Bavareò a cumprar si vaccas.

Gasetta Romontscha nr. 12; 22 da mars 1883

Fotografia a Sedrun

Cheutras notificheschel jeu, che jeu vegni ad esser sonda, ils 14 d'avrel a Sedrun, sch'igl ei favoreivla aura per far purtrets fotografics. Ei vegn exponiu sco musters pliras bialas fotografias. Per numerusas empustaziuns serecamonda cun tutta stema, J. B. Poetter, fotograf a **Glion**

Gasetta Romontscha nr. 14; 5 d'avrel 1883

Annunzia e recumandaziun

Il suittascret fa cheutras da saver ad in ludeivel publicum dalla **Cadi** e da siu contuorn, ch'el cuntnueschi culla industria da hafner, che siu defunct bab ha giu mess si a Bugnei (Tujetsch) e furneschi la medema vischala da tiaracotga per tutt basegns da casa, seigi per duvrar vid il fiug, en cuschina, vid latgiras, caffetieras, ruogs da flurs etc.

El engrazia per la gronda confidanza, ch'il publicum ha duront 50 onns mussau visavi a siu bab p.m., e supplicescha d'era schenghegiar quella ad el. El serecamonda perquei a negoziants ed a particulars e vegn a sespruar da survir cun buna rauba e bienmarcau.

Josef Anton Deragisch, fegl, hafner a Bugnei (Tujetsch)
Gasetta Romontscha nr. 14; 5 d'avrel 1883

Sittar da nozzas

Cun caschun ch'il far nozzas solemnas ei culla fin dil temps pascal ecclesiasticamein puspei lubius, fagein nus attents sin in progress dalla vischnaunca da **Tujetsch**, culla speronza ch'era en auters loghens vegni quei bi exempl da surengiu immitaus. Ins ha leu numnadamein anflau per bien da buca sittar pli tier nozzas. Contas sventiras ha ei schon dau cun quei terribel sittem. En bia vischnauncas ein ils giuvens aschi perderts da sittar, mo cura ch'il til da nozzas serenda en baselgia, mo en otras vegn ei per gronda mulesta da glieud malsauga ramplunau la sera fagessen in nizeivel schenghetg als spusai, enstagl far spesas cun sittar ora tonta puorla per far ramplunar las vals. All'emprema vischnaunca che suonda gl'exempel da **Tujetsch** clamein nus tier in honorific vivat!

Gasetta Romontscha nr. 17, 26 d'avrel 1883

(34) Ins tema pil negozi da biestga dil proxim atun

Segirau fadigia per plirs onns. - In blah cun in pac nittas. - Siu armaul era ussa malsauns dalla zoppina. - Beiba brav ed ha muort eivradad stuiu durmir en nuegls. - Sedrun ha survegniu la nota fetg bien. - Catschau roschada vaccas silla fiera d'Altorf.

In bien pegliatalpas

vegn encuretgts dalla squadra Rueras e Zarcuns en Tujetsch. Quel sto esser provedius cun buns attestats e stuess permanentamein setener si en Tujetsch, quei temps che selai pigliar talpas. Cheuencunter vegn segirau fadigia per plirs onns, sch'el fa sia lavur en uorden. El sto surprender quella ton pli gleiti. Aspirants dueien s'adressar tier gerau Cristian Muggli a Rueras ni tier Gion Paul Berther a Camischolas.

Gasetta Romontscha nr. 18, 2 da matg 1883

Cuors dall'Alpsu

Il secund cuors dalla posta sull'Alpsu parta da Cuera suenter ch'igl emprem tren dalla viafier ei leu arrivaus da S. Gagl a Turitg, va sur Versomi ed arriva la sera a Mustér. La damaun va el lura a Göschenen e stat en connexiun culs tils express dil di dalla viafier gottardista. Schi gleiti che quellas arrivan a Göschenen tuorna la posta a Mustér, nua ch'ella stat sur notg e parta la damaun per Cuera, aschia che ses passagiers san da miezdi ir a Turitg e S. Gagl.

Gasetta Romontscha nr. 23, 7 da zercladur 1883

Piars

denter Mustér e Sedrun in blah cun in pac nittas lien. Igl anflader ei supplicaus da schar saver Giachen Antoni Beer a Sedrun.

Gasetta Romontscha nr. 28, 13 da fenadur 1883

Zoppina

Ad Ursera ei quels dis rut ora la zoppina denter las „vaccas da caffe“, u da casa. Malgrad las precauziuns pridas cun serrar giu quella biestga, po quella malsogna tgunschamein vegnir sur l'Alpsu ...

Gasetta Romontscha nr. 30, 26 da fenadur 1883

Pli recent

Tras biestga d'in marcadont talian, che ha priu si l'alp Curnera en Tujetsch, ei en quella vischnaunca rut ora la zoppina. Quel veva schau urentar ses armauls ad

Ursera avon in nuegl da vaccas malsaunas dalla zoppina e survegniu sin quei in scret da sanadad. Sin viadi a Curnera ha el schau maner ses tiers en ina alp sur Tschamut, bandunada dallas vaccas il di avon. L'auter di vegn leu in pur da Rueras cun sia mugia per trer giu purment. Turnaus a casa ha el observau che siu armaul era ussa malsauns dalla zoppina, ch'ei ussa serasada el vischinadi da Rueras.

Gasetta Romontscha nr. 31, 2 d'uost 1883

Serrar en

Tuccond tier la zoppina rutta ora en Tujetsch supponan plirs, che quella seigi veginida runada neu dad Ursera dil spazzatgamin Stoffel, che va savens da Sedrun ad Ursera cun cristallas, beiba brav ed ha muort eivradad stuiu durmir en nuegls da biestga infectada. Cun quella caschun lessen nus dumandar ils capogiuists, schebein ei fussi falliu, sch'ins serassi en per 24 uras babs da famiglia, che van pellas ustrias entuorn, duront che dunna ed affons ston endirar fom, e cura che quels van silsuenter eivers pils vitgs entuorn dend scandal a pigns e gronds.

Gasetta Romontscha nr. 32, 9 d'uost 1883

Scolas dalla Cadi

Tujetsch alimentescha 5 scolas elementaras, quella da Sedrun ha survegniu la nota fetg bien, las scolas da Camischolas e Rueras han la nota bien, quellas da Selva e Cavorgia ualti bien. La scola tudestga a Sedrun ha la nota bien

Gasetta Romontscha nr. 34, 23 d'uost 1883

Buc aschi nausch

La zoppina fa progress ella Cadi, da Tujetsch ano eis ella sepropagada ella vischinonta alp da Nalps, che auda a Mustér, era l'alp Soliva ella val Medel ei infectada. Denton vegn ei pretendiu ch'ella seigi uonn buca aschi nauscha sco auters onns. Ins tema pil negozi da biestga dil proxim atun. Breil e Danis hagien era la malsogna, medemamein a Glion

Gasetta Romontscha nr. 34, 23 d'uost 1883

Tuttas vischanuncas

La zoppina ei ussa serasada pauc ni bia en tuttas vischnauncas dalla Cadi, bia alps sedattan tutta breigia da tener schuber las caschadas. Marcadonts da Tujetsch e Medel han schon spediù sur cuolm entiras marcanzias schubras per mitschar cun quellas avon ch'ils pass veginan serrai. Marcadonts tudestgs ein la jamna vargada stai tochen en Val s. Pieder ed han catschau ord Lumnezia 60 bialas genetschas, per las qualas els han pagau pli bials prezis che onn.

Gasetta Romontscha nr. 35, 30 d'uost 1883

Dadens Rueras schuber

Tujetsch sedosta da schar liber tut (muort la zoppina). Quella vischnaunca ei dadens e sur Rueras, aunc schubra ed ellas alps da quei intschess sesanflan 70 armauls, dils quals ins ha speronza da saver vender ina gronda part sillars proximas fieras el Tessin, Uri etc.

Gasetta Romontscha nr. 36, 6 da settember 1883

Mèl alpin

Nus deplorein vivamein, ch'ei sesanfla en quella roscha premis buca in Sursilvan. Il renomau mel alpin da Tujetsch e Medel ei schon vegnius premiaus sillà exposizion internaziunala a Paris dil temps dils renomai apiculturs plevons Durgiae e Huonder da buna memoria.

Gasetta Romontscha nr. 37, 13 da settember 1883

Bunas fatschentas

Il negozi da biestga selai en biebein. Ils marcadonts da Tujetsch, serendi digl Uri giu cun vaccas e genetschas en Baviera han fatg bunas fatschentas e dapresent traverseschan marcadonts tudestgs e romontschs las cuntradas sursilvanas, ch'ein buc infectadas dalla zoppina.

Gasetta Romontscha nr. 38, 20 da settember 1883

Raccolta admirabla

Il glin da **Tujetsch** ei da vegl enneu renomaus e la raccolta da sem glin ei leu savens admirabla; uonn ha in vischin da Rueras en siu stupent glin anflau plontas glin, che vevan tochen 187 borlas, ditgel tschienotgontasiat borlas per ina.

Gasetta Romontscha nr. 38, 20 da settember 1883

Tscharva

En **Tujetsch** vulan ei haver viu in tschierv (carteivel mo in buc-cavriel).

Gasetta Romontscha nr. 41, 11 d'october 1883

Neiv

Silla bialaura ha in ferm suffel purtau ils 22 d.q. (*october*) ina bischa tochen Rein (*a Mustér*), aschia che certas vischnauncas che senuspevan da tener serrau en il tiers infectai dalla zoppina per ton pli gleiti vegrir libers da quella, ston ussa far quei tras ordinaziun da surengiu. El Tessin ha la gronda dracca lavagau empau la fiera da Giubiasca. Il Lucmagn ha quasi negina neiv e l'Alpsu pauca.

Gasetta Romontscha nr. 43, 25 d'october 1883

Roschada

Marcadonts da Tujetsch e Medel han catschau roschada vaccas sillla fiera d'Altorf dils 7 ed 8 d.q. Per tener sidretg ella Cadi ils presents aults prezis, munglass quella gronda fiera ir bein.

Gasetta Romontscha nr. 45, 5 da november 1883

Zoppina

La Cadi ei ussa totalmein libra da quella calamitad.

Gasetta Romontscha nr. 47, 22 da november 1883

Il pass cun schletra

Igl ei uonn gl'emprem unviern che signurs e damas han da buna tempranza passau l'Alpsu en schletra. Tgi sa con ditg ch'ei va aunc avon ch'ei vegni ranschau en in direct cuors postal pli che per 3 meins denter la populada Surselva e la viafier gottardista.

Gasetta Romontscha nr. 48, 29 da november 1883

Noviz en claustra

Dumengia vargada ha era in beinaccreditau giuven grischun, che ha schon fatg ses studis teologics en Germania, seschau vestgir en sco noviz dalla claustra. Igl ei il signur premlitinent Giachen Martin Berther da Tujetsch (*pader Baseli Berther da Dieni*), il pli proxim vischin dil vegl casti da Putnengia, che ha dau alla claustra da Mustér il renomau avat Pieder de *Putnengia*, fundatur dalla Ligia Grischa. Nus gratulein dacormein.

Gasetta Romontscha nr. 51, 20 da december 1883

Aura

Il mars ha purtau la pli stupenta bialaura e terrenau tochen tiels aults selvadis da

Tujetsch e Medel.

Gasetta Romontscha nr. 12, 20 da mars 1884

Tgaun

In bien tgaun da nuorsas enquera il suttascret da prender si per la stad. Alois Curschellas a Rueras (**Tujetsch**)

Gasetta Romontscha nr. 16, 17 d'avrel 1884

Arver il pass

Sin instanza dil Cussegli Pign tiel Cussegli Federal d'obligar **Uri** d'arver l'**Alpsu** sils 15 da zercladur, sco ei davanti da nossa vart, ha il Cussegli Federal rispondiu, ch'**Uri** levi absolut buc arver quei cuolm avon gl'emprem fenadur, mo el hagi constrenschiu da far quella lavur sils 21 da zercladur.

Gasetta Romontscha nr. 18, 1. da matg 1884

(35) Tras el ed auters premurai umens survescha Tujetsch sco muster d'in spargnus tenercasa communal

Per sia vischnaunca eis el sco gerau e president communal sefatgs meriteivels cun promover ina bun'administraziun. - Ils Uranès han muncau e perquei ei quella buca stada viva. - Marcadonts tuatschins ein serendi cun ina roscha genetschas sillia fiera. - Sul Lucmagn ei vegniu instradau 7 - 800 armauls ord la Cadi. -

Sur Giachen Lorenz Riedi

Ils 24 d'avrel ha la vischnaunca da Tujetsch cumpignau tiella fossa cun tutta honur igl aultreveriu signur Giachen Lorenz Riedi, beneficiat a Rueras. Naschius leu 1820, ils 30 da december, era il defunct il giuven denter 8 fargliuns, e mussond el schon baul talent e buna veglia tiels studis, eis el da ses geniturs vegnius surdaus alla scola cantunala catolica ella venerabla claustra da Musteré. Il gimnasi ha el finiu a Friburg el flurend institut dils Gesuits ed ha lura obteniu in plaz liber el collegium da s. Carl Borromeus a Milaun per far ses studis filosofics e theologics. Ils 24 d'uost 1847 eis el vegnius benedius ora a Cuera sco sacerdot e suenter haver celebrau sia messa nuviala en sia baselgia parochiala da s. Vigeli a Sedrun, eis el vegnius eligius sco beneficiat da Rueras. Da leu eis el vegnius 1849 sco plevon a Surcasti e 1860 a Vrin, nua ch'el ha puspei operaou sco fideivel pastur dallas olmas tochen 1871. Lura ha el encuretg ina pli leva lavur ed anflau ina tala sillia caplania a Trun. Mo la divina provedientscha ha giu ordinai, che nua ch'el hagi entschiet sia pastoraziun, dueigi el era finir quella. 1877 ha el puspei surpriu la vacanta caplania da Rueras. Vegnend malsauns la davosa cureisma ha el sentiu, che sia fin vegni gleiti neutier, el ha fatg siu testament, recumandau en quel siu tgierp ed olma a Diu e fatg si 2000 frs. per caussas pias. Malgrad siu viv desideri da puder murir e s'unir cun Cristus, ha el aunc stuiu endirar ditg tochen ch'il zenn grond ha ils 22 d'avrel allas 10 avonmiezdzi annunziau als habitants da Tujetsch che lur preziau beneficiat da Rueras seigi spartius da quest mund. El ruaussi en pasch. A nos stimai vischins da Rueras agurein nus in bien successur.

Gasetta Romontscha nr. 18, 1. da matg 1884

Lucas Cavegn, Sedrun

Ils 13 d.q. ei miert a Tujetsch gerau Lucas Caveng sco ustier dalla Cruna a Sedrun e dalla Fontauna dil Rein a Tschanmut, bein enconuschents e bein accreditaus tiel publicum viagjont. Mellis da puels seregordan dil bien tractament, dall'emperneivla conversaziun e digl oreifer humor e viz dil vegl ustier dalla Cruna a Sedrun, recumandaus honorificamein en tuts cudaschs da viadi pella Svizra. El era ual aschi

renomaus sco il famus mel da Tujetsch che ha d'engraziar ad el siu renome. Bia students vegnan engrazievlamein a seregurdar con bienmarcau, ch'els vegnevan ora en sia renomada ustria. Per sia vischnaunca eis el sco gerau e president communal sefatgs meriteivels cun promover ina bun'administraziun, saluteivel spargn da lenna, ina commensurada indemnisiun pella gudida dils rehs beins communals, per promozion da bunas scolas, da meglieras vias e sco amitg da scadin saluteivel progress. Tras el ed auters premurai umens survescha Tujetsch sco muster d'in spargnus tenercasa communal e dalla vertit patriotica da pagar promt ed exactamein il dabien dalla vischnaunca. Il statalter communal ei gl'emprem deivet, ch'ils Tuatschins pagan, ferton ch'en biars auters logs han ils cassiers communals gronda breigia da trer en lur dabien pella vischnaunca. Lucas Caveng ei staus in diember onns el magistrat dil cumin e plirasga deputau sil Cussegl Grond. Gl'uffeci da mistral, d'in temps schi tschercaus, ha el mai vuliu surprender.

Arrivaus sin ina vegliadetgna datier da 70 onns eis el staus perdetga dallas grondas midadas en Surselva dapli in miez tschentaner e ses raschienis sul temps vegl eran interessants da tedlar tier. Nus lein sulettamein allegar las midadas ella veta dils vitturins. Havend schon siu bab in negozi, menava Lucas da giuven sia necessaria rauba naven da Glion ni Cuera, dad in temps ch'ei era aunc negins straduns en Surselva. La veta ch'in vitturin stueva da quei temps far, pon ins comprender ord quei, ch'els stuevan ellas ruinas da Danis, nua che la via vedra vegneva savens sgurdinada, descargar, prender il carr in ord l'auter e sez purtar sulla via ruinada il carr e la rauba. Mo ils vitturins duvravan era buca ton sco ozildi, da magliar per um e cavagl prendevan ei cun els. Sco Lucas raquintava, deva siu bab 5 bazs (circa miez franc) per far il viadi da Sedrun a Glion e turnar anavos e sin quei daner da viadi spargnava el aunc adinaenzacons bluzchers, ch'el vessi da cumprar ina ni l'autra ga enqual caussa. A Glion marendavan ils vitturins ord lur sitget e buevan communablamein cun lur cavals. Il loschi prendevan ei fetg savens elllas Pardialas sut tschiel aviert. Sulet cura ch'ei mavan a Cuera vevan ei ina stupenta tscheina e bien quatier tiella renomada Crusch Alva a Domat e quei tut mo per miez rensch ni 85 cts. e per ordinari arrivavan leu ils vitturins sursilvans cun particular appetit. Lucas fuva fetg discussius e perquei semegliava ei adina cuort en sia casa. El vegn aunc a restar ditg en buna memoria tier jasters e dumiastis. El rauassi en pasch!

Gasetta Romontscha nr. 21, 21 da matg 1884

Tagliacrappa

anflan ton pli gleiti biala e buna lavur tier Vigeli Berther, ugau baselgia a Sedrun.
Gasetta Romontscha nr. 22, 29 da matg 1884

Elecziun

Dertgira districtuala per 1885-1887: ... suppleants: ... assistent Schmed da Tujetsch.
Gasetta Romontscha nr. 23, 5 da zercladur 1884

La fiera a Sedrun

che curdass sin dumengia proxima vegn tenida gliendisdis ils 9 d.q. Tuts tiers che vegnan quei di catschai en Tujetsch sin quella fiera, ston esser provedi cullas prescrettas bullettes.

La suprastonza da Tujetsch

Gasetta Romontscha nr. 23, 5 da zercladur 1884

Cuors postals

Ils 15 d.q. entscheivan ils novs cuors postals sur nos pass alpins. Sull'Alpsu van puspei 2 cuors, in che va direct a Cuera, parta da Muster' las 3 suentermiezdì e l'auter las 7 e 35 minutias dalla damaun ...

... Il cuors principal sull'Alpsu entscheiva per ils 21 da zercladur e finescha ils 21 da settember. ...

Gasetta Romontscha nr. 24, 11 da zercladur 1884

Fiera

La fiera da Sedrun dils 9 han ils Uranès muncau e perquei ei quella buca stada viva ed ils prezis dallas cauras eran sbassai empau. Las nuorsas ch'eran stadas cumpradas si per 24 – 34 frs. il pèr, han ils marcadonts stuiu vender senza gudogn.

Gasetta Romontscha nr. 24, 11 da zercladur 1884

Cuors postals

Sil publicau niev plan dils cuors postals pella stad steva quei ner sin alv e perfin il postbureau a Cuera ha pils 15 da zercladur dau ora ad in jester passagier in bigliet da Cuera tochen Ursera, e quel ha cun raschun sesmervegliau d'udir tier sia arrivada a Mustér, ch'ei mondi aunc 8 dis negina posta sull'Alpsu! Ins giavischass sclarament sur quella malemporneivla muncada. *Gasetta Romontscha nr. 25, 19 da zercladur 1884*

Per rectificaziun da nies artechel postal el davos numer, remarchein nus, ch'igl jester setrumpaus pervia dil cuors sull'Alpsu, vevi priu a Flem e buc a Cuera siu bigliet per quel. *Gasetta Romontscha nr. 26, 26 da zercladur 1884*

Redactur

Signur Florin Berther da Tujetsch, che ha plirs onns studiau sillas universitads tudestgas, e meina ina zun versada plema, entra cugl emprem october ella redacziun dil Basler Volksblatt, che cumpara en grond format, treisga ad jamna ed ei per ses decisivs principis conservativs- catolics bein accreditaus ell'entira **Svizra** catolica. Nus gratulein tier quella acquisiziun. *Gasetta Romontscha nr. 27, 3 da fenadur 1884*

Anflau

El vitg Sedrun, vischnaunca da Tujetsch, seigi vegniu anflau zatgei daners da pupi, il qual vegn conform § 192 dil dretg privat cheutras fatg enconuschent.

Il respectiv proprietari ha, cun en medem temps sco tal selegitimar, da s'adressar el termin da treis meins a dato tier il suittascret uffeci.

Per igl Uffeci circuital dalla Cadi

il president A. Tuor

Rabius, ils 14 da fenadur 1884

Gasetta Romontscha nr. 29, 17 da fenadur 1884

Fiera a Sonthofen

Marcadonts tuatschins ein serendi cun ina roscha genetschas silla fiera bavaresa a Sonthofen (200 km da Tujetsch), nua che quels mavan pli da vegl per cumprar si biestga per catschar alla fiera da Ligiaun. Ils temps semidan e nus semidein cun els. *Gasetta Romontscha nr. 37, 11 da settember 1884*

Ligiaun

Silla fiera da Ligiaun paress da buca vegnir gronda catscha. Sul Lucmagn ei vegniu instradau 7 - 800 armauls ord la Cadi, 200 glarune's e sulla Greina po esser passau circa 300 tgaus. Ils davos dis ei da marcadonts talians en cumpignia cun Furrer vegniu cumprau giu entiras roschas cun schar in bi gudogn als vendiders. Ils Tuatschins, ch'eran stai serendi a Sonthofen, han leu buca saviu vender tut lur genetschas, mo han ussa aunc catschau giu leu in triep per dar meglier esit allas restadas anavos.

Gasetta Romontscha nr. 39, 25 da settember 1884

Secunda fiera

La secunda fiera da Ligiaun ei buc ida schi bein sco l'emprema, e per excepziun han ils marcadonts quellaga fatg meglier giu Ligiaun che si Giubiasco. Il meglier esit vevan ils stiarls, las vaccas tergevan meins ed il mender pagavan a proporziun las mugias, ch'ins vess a Ligiaun saviu cumprar pli bienmarcau ch'el Grischun. Cun dabia biestga han ins stuiu vargar giu silla fiera da Vareis. Ils marcadonts, principalmein da Tujetsch, che han puspei vuliu empruar lur fortuna sillas renomadas fieras bavaresas a Sonthofen, han malgrad las repetidas fieras buca saviu dar giu tut lur biestga. Aschia eis ei da capir ch'ils stravagants prezis tschessan. Per ventira ei lunsch ora la gronda part biestga venala vendida. ...

Gasetta Romontscha nr. 44, 30 d'october 1884

(36) Quei cass ei in niev e serius avis pils tubacheders.

Piars quest unviern ina massa vadials giuvens. - Tujetsch baghegia uonn ina nova casa da scola. - Vegniu anflau in um miert. - Il tratsch ei staus schelaus ed era il latg els tschalers. - La zoppina smanatscha danovamein alla Cadi. - El Grischun ei vegniu teniu 15 scolas realas, denter auter er'en Tujetsch.

Caschunar gronda sventira

Il far maluardau dils tubacheders vess sonda savigada saviu caschunar gronda sventira allas vischnauncas da Tujetsch e Mustér. In tubacheder tuatschin fuva quei di ad uaul cun entgins camerats sils cunfins da quellas duas vischnauncas. Envidond ina pipa, fiera el il zulprin ardent pli lunsch, ella gronda schitgira ha quel dau fiug il pastg e silsuenter in pluna roma. Serasond il fiug pli e pli han ins stuiu clamar agid, mo per l'auter di, la dumengia, han ins pudiu stizzar diltut. Ins ha giu grond cletg da buca stuer schar barschar bia plontas, mo quei cass ei in niev e serius avis pils tubacheders, ed igl § 35 dalla lescha da polizia plaida clar avunda sulla censura da talas «negligentschas».

Gasetta Romontscha nr. 46, 13 da november 1884

Curants engles

Tut che selegra giud la biala stad s. Martin. ... Enzatgei resch niev fuv'eis era da ver il november a Mustér crotschas cun curants engles d'Ursera, che fagevan excursiuns sull'Alpsu il meins dad unviern.

Gasetta Romontscha nr. 46, 13 da november 1884

Iu a piarder

Tgi che sa novas da duas cauras jastras, ina mesalva ed ina nera cun in F ed ina crusch sils corns (la noda dallas ureglas san ins buc) ei supplicaus da schar saver Gion Fidel Wenzin a Selva (Tujetsch).

Gasetta Romontscha nr. 49, 5 da december 1884

Piars vadials

La vischnaunca da Tujetsch ha piars quest unviern ina massa vadials giuvens, biars da quels ein ventschi 2 – 3 dis suenter esser naschi senza ch'ins fuss vegnius sissu danunder che quei derivi.

Gasetta Romontscha nr. 4, 23 da schaner 1885

Concurrenza per meisters da lenna

La vischnaunca da Tujetsch baghegia uonn ina nova casa da scola a Sedrun ed ha schon tratg la lenna sil plaz. Essend che quella vegr pella gronda part construida da lenn, sche vegr ei cheutras aviert la concurrenza per quella lavur, che sto vegrir

fatga en uorden. Meisters che aspireschan sin quella lavour ston tochen ils 25 da mars s'adressar tier la cumissiun da baghegiar.

Gasetta Romontscha nr. 9, 26 da fevrier 1885

Process

Cul process instradaus da quels dallas vias commercialas (ed era dalla vischnaunca da Tujetsch) encunter il cantun avon la dertgira federala pervia dil manteniment dallas vias, ei tochen ussa iu plaun vinavon, finalmein aud'ins, ch'igl avrel vegni da quellas varts priu en perdetgas a Cuera e silsuenter vegni il tribunal immediat a prender amauns il process, sil qual ins ei fetg spanegiaus.

Gasetta Romontscha nr. 12, 19 da mars 1885

Plevon

Unanimamein ha la pleiv da Tujetsch eligiu plevon igl aultreveriu signur Adalbert Baselgia da Sumvitg, dapresent plevon a Vrin. Igl aultreveriu plevon Berther a Pigniu vegn ad Andiast.

Gasetta Romontscha nr. 13, 26 da mars 1885

Legreivel impuls

Ella Cadi ha il traffic da biestga tut anetgamein survegniu in legreivel impuls tras la cumparsa da marcadont Russy d'Ursera, che ha en Tujetsch, Mustér e Medel, cumprau si varga 140 vadials e stiarls per fetg bials prezis. Sin quei ein era nos marcadonts spert semess en moviment ed han stuiu alzar ils prezis. Tuttas bunas caussas ein treis, e perquei ei lu aunc cumpariu in marcadont bavare's per comprar vaccas da vadi e da bials ivers. Quei ei stau aura pils purs e nuslein sperar, ch'era ils marcadonts seigien buca vegni menai egl avrel.

Gasetta Romontscha nr. 14, 2 d'avrel 1885

Premiaziun

da taurs a Trun: II. Classa: ... 7) in mutg da Joseph Berther a Rueras, 70 frs.; ... 12) quel da Bruno Soliva a Tujetsch 40 frs.

Gasetta Romontscha nr. 15, 9 d'avrel 1885

Cumin

Ella dertgira circuitala ein eligi: ... president communal Soliva da Tujetsch. Il candidat ch'ils Tuatschins vevan semtgau pil Cussegl Grond, che vess segiramein giu bials aspects, Florin Berther, redactur dil Basler Volksblatt, han ins, essend buca habitants el cantun, constituzionalmein buca saviu leger ora.

Gasetta Romontscha nr. 19, 7 da matg 1885

Um miert

La jamna vargada ei spel lag dall'Alpsu sin intsches uranès vegniu anflau in um miert, ch'ei tenor sias blessuras ed il cunti leu speras semazzaus ni vegnius mazzaus. Vid las scartiras anfladas tier el duei ei esser in cumiss sogngagliès.

Gasetta Romontscha nr. 19, 7 da matg 1885

Crius suffels, neivs e purginas

Il matg ei in bi meins pils poets, mo als purs fa el savens in streh tras lur quens. Uonn ha el puspei purtau crius suffels, neivs e purginas, il tratsch ei staus schelaus ed era il latg els tschalers sils cuolms, nua ch'igl ei en logs munconza da fein e pastg. ... Els marcaus da Berna e Turitg neveva ei zuar ils 15 d.q. (matg), ferton ch'ei cuflava ella Val Tujetsch sco il pli ruh unviern.

Gasetta Romontscha nr. 21, 22 da matg 1885

Avertura

Il pass dall'Alpsu ei vegnius aviarts ils 29 ed il Lucmagn ils 31 da matg. Uri e Tessin han priu l'iniziativa, feton ch'il Grischun ha giu pintga laver e mess maun per avon che schar finir las lavurs da tschei maun dil cuolm. ... Tenor rapport ufficial ha il cantun dau ora 1884 pell'Alpsu mo 2894 frs. ... Conclusivamein dein nus bugen tier, ch'era la letargia sursilvana seigi empau la cuolpa, che ses dus pass alpins vegnan buca aviarts pli baul e che l'aulta Surselva sa buca seprofitar pli bia dalla vischinonta viafier gottardista.

Gasetta Romontscha nr. 23, 3 da zercladur 1885

Plevon

A raschun ch'il signur plevon Baselgia ha buca vuliu bandunar **Vrin**, ha la pleiv da Tujetsch eligiu signur plevon *Francesc^tg Eduard Muoth da Breil* a Surrein per siu niev plevon, e la pleiv da Surrein ei vegnida surdada a signur caplon Thomas Berther a Sedrun. ...

Gasetta Romontscha nr. 24, 11 da zercladur 1885

Marcadau pauc

Alla fiera da Tujetsch dils 8 d.q. (*zercladur*) ei vegniu marcadau pauc, cauras ein vegnidas vendidas per 18 – 22 frs., las nuorsas eran buca fetg tschercadas. La fiera d'Ursera ei aunc stada mendra, paucs tiers, pauca glieud e bass prezis.

Gasetta Romontscha nr. 24, 11 da zercladur 1885

Zoppina

La zoppina (*Maul- und Kluenseuche*) smanatscha danovamein alla Cadi. Ina roscha nuorsas pigureras, ch'ei il matg vegnida catschada a Chiasso suls cunfins svizzers ed arrivada tochen Aquacalda sil Lucmagn, ha runau en quella malsogna ed infectau l'entira Val Blegno. ... La vischnanca da Medel ha gia daditg postau ina guardia sil Lucmagn, mo ei vegn raquintau, ch'ei seigi era sefultschau el Grischun nuorsas pigureras dil maun dall'Alpsu ed ins spetga ina rigurusa inquisiziun. Nuorsas pigureras han era runau la zoppina a Realp en Val Ursera.

Gasetta Romontscha nr. 25, 18 da zercladur 1885

Scola

Gl'unviern vargau ei vegniu teniu el Grischun 15 scolas da cuntuaziun (Fortbildungsschulen) u realas, denter auter er'en Tujetsch, ch'ha obteniu 200 frs. subsidi cantunal. ...

Gasetta Romontscha nr. 26, 25 da zercladur 1885

La zoppina

Sco enconuschent smanatscha quella malsogna contigusa danovamein alla Cadi dad omisdus pass alpins (Lucmagn ed Alpsu). La Val Blegno, principalmein dad Olivone tochen sin nos cunfins, ei totalmein impestada. La malsogna ha leu quellaga in fetg nuscheivel caracter. Egl Uri ei la malsogna a Realp, ed era ussa ad Ursera e sin in'alp dall'Alpsu. Sin camond da Berna han quels pass stuiu vegnir aviarts e dau liber pass a tutz tiers cun bulletta, ch'ein ni paran sauns.

Gasetta Romontscha nr. 27, 2 da fenadur 1885

Sur Gion Antoni Venzin

Ils 19 d.q. vegn monsignur uestg F. C. Rampa a benedir ora 6 teologs en il seminari da s. Leci a **Cuera**. Denter quels sesanflan 3 Romontschs: ... da **Tujetsch** signur Gion Antoni Wenzin che celebrescha sia messa nuviala ils 15 d'uost a **Sedrun**.

Gasetta Romontscha nr. 29, 16 da fenadur 1885

Zoppina

La zoppina fa progress el Grischun ed ei dapresent en 50 nuegls e sin 43 pasculaziuns. La Cadi ei malgrad la malsogna sill'Alpsu e Lucmagn aunc intacta.
Gasetta Romontscha nr. 33, 13 d'uost 1885